

سورة  
الغفران

رأى العلامة المكي

ترجمة  
ناريمان الساملي

# رسالة الغفران

ترجمة ناريمان الشامي



## (١) أصل الحكاية

اشمعى الكتاب دا؟ ومنين جت فكرة ترجمة كتاب من العربى لـ . . .  
"العربى"؟

الكتاب دا اشتريته من حوالى ١٣ سنة . كان أملى كبير وقتها إنى  
أعمل مقارنة ما بينه وبين دانتي وعمله الأدبى "الكوميديا الإلهية" ، خاصة  
بعد ما سمعت عن احتمالية إنه يكون سرق (مش بس اقتبس) الفكرة من  
المعري (عرفت بعد كدا إن تقرىبا خلق ربنا كلهم عملوا مقارنة بين الاتنين  
دول وصرفت نظر).

المهم، هدف المقارنة كان واضح فى دماغى وقتها، فقررت أقرا  
الكتاب، إذ أفتح أول صفحة من الكتاب كدا، مفهمش حاجة. أقلب  
الصفحة، برضه مفهمش حاجة. طيب سبني من المقدمة خالص، أدخل  
على البهاريز مباشرة، بس النتيجة مختلفتش كثير: مفهمتش حاجة والمثل  
كلنى وركنت الكتاب. ثمر شهور وسنين، وأفتح الكتاب وأقول بثقة:  
"معلش، أنا كنت لسه صغيرة، بس دلوقتى أنا عرفت عن العربى كثير،  
وأكيد هفهم المرة دي"، وكالعادة، مفهمتش أى حاجة. وفضل السيناريو  
دا يتكرر كل كام سنة وفضلت النتيجة واحدة.

اللي حصل جديد في حياتي، إني عملت ماجستير في تعليم اللغة العربية للأجانب. ومن هنا جه وعيي بأزمة الفصحى واللغة المصرية، ومن هنا جت فكرة ترجمة 'الرسالة' للمصري. وفضلت النية دي عندي من غير أي تقدم لكam سنة كمان بسبب دخولي في مشاريع ثانية. لغاية لما قررت التركيز في موضوع 'الرسالة'، وكان الموضوع في منتهى الصعوبة، ولا حتى مساعدة المبدعة "بنت الشاطئ" بتفسير بعض الكلمات والمواقف والأشخاص كان مفيد، مسهلش الأمور عليا إلا ترجمة مبدول فيها جهد كبير أوي وكاملة من السيد الدكتور/ عماد عبد الكريم طه عبابنه، من العربي للإسباني، معترفًا هو نفسه بصعوبة قراءة الرسالة دي حتى بالعربي.

## (٢) الهدف اللي في نيتي

غالبًا، فيه ناس كتير هتفكر في الترجمة دي على أساس: "تدمير الفصحى، وماذا سيحل بلغة القراءان، وزحف العامية . . إلى أين؟"

عشان كذا أنا هوضح أهدافي عشان ما يكونش فيه مجال للغموض . أنا بقول بوضوح إن أول أهدافي هو سد الهوة الكبيرة اللي حصلت ما بين لغتنا بتاعة اليوم وبين أدب أمهات الكتب والتراث واللغة والأسلوب اللي كانت مكتوبة بيه وقتها . يعني إحنا بنحاول نترجم أعمالنا للغات الثانية معتقدين إن الكتب ما دامت مكتوبة بالعربي يبقى إحنا فاهمين، ودا، في معظم الأحيان، مش حقيقي . أنا هضرب مثال بسيط للتوضيح، أنا هاخذ جزء من الرسالة بشكل عشوائي وكل واحد مع نفسه بصراحة يقول هو فهم ولا لأ .

"وقد وفق "أبو الفرج" وولده، وصار كاللُجَّة ثمده، لما درس عليه الكتب، وحفظ عنه ما يكون الترتب، فسلم العاتكة إلى القاري، والنافجة إلى المرء الداري، والرمح الأطول إلى "ابن الطفيل"، والأعنة إلى أحلاس الخيل."

السبب الثاني: إن اللغة متقاش حكر على اللي درسوها وبيفهموها بس . عشان يبقى لكل شخص الحق في فهم التراث من غير ما يبقى تحت

رحمة اللي دارسين لغة بس . محدش عاقل يقول إننا كلنا ملزمين إننا نضيع من عمرنا سنين عشان ندرس الفصحى عشان نفهم تراثنا، زي ما هو مش مطلوب من كل الناس إنها تعرف كل اللغات الأجنبية عشان تقرا أدبهم، دا دور المترجمين، مش دور الشعب كله .

السبب الثالث: عشان يبقى ممكن لولد أو بنت عندهم ١٣ أو ١٤ سنة، أو أصغر، يقرأوا واحدة من أمهات الكتب وبيقوا فاهمين إيه اللي بيتقال . ودا حقهم علينا مش تفضل منا .

السبب الرابع: إن دا حاجة طبيعية وبتحصل مع أي لغة . الدون كيوخوتي (الدون كيشوت)، مثلا، يكاد ما يمرش كام سنة إلا ويطلعوا منه نسخة جديدة مكتوبة بمفردات وأسلوب جداد، وحتى عملوا منه نسخة للأطفال برسومات .

شخصيا، أظن إن مفيش نهضة هتحصل للبلاد العربية غير لما نعرف نفهم أصولنا الأول، لكن إننا نحافظ على كتبنا متربة على الرفوف في سبيل الحفاظ على العربية الفصحى من الانهيار دا كذب وضحك على الدقون .

### (٣) هترجم لأنهي مستوى لغوي؟

دكتور السعيد بدوي ، الله يرحمه ، عمل كتاب عمدة بيوضح فيه المعاناة اللغوية اللي بنعانيها في مصر . الكتاب اسمه " مستويات العربية المعاصرة في مصر " . دكتور بدوي قال إن في مصر فيه ٥ مستويات للغة :

- ١ . لغة التراث : زي أمهات الكتب والكتب القديمة .
- ٢ . الفصحى المعاصرة : زي الكتابة اللي في الجرايد الأيام دي ونشرات الأخبار .
- ٣ . عامية مثقفين : ودا اللي المتعلمين أوي بيتكلموا بيه ، ويعملوا في كلامهم خلط بين العامية والفصحى .
- ٤ . عامية المتنورين : اللي هو كلام الناس اللي مش متعلمين أوي أو كلام الناس براحتها (زي ما واحدة تكلم صاحبها أو الست في البيت مع جوزها) .
- ٥ . عامية الأميين : ودا اللي هما متعلموش خالص .

رسالة الغفران ورسالة ابن القارح ، مفيش خلاف إنهم من المستوى الأول بتاع فصحى التراث ، المستوى اللي أنا ترجعت له هو المستوى الرابع

بتاع عامية المتنورين ، بمعنى إن وانتو بتقروا ، هتחסوا إن حد من أهلكو  
بيحكيلكو موقف حصل معاه ، من غير أي تعقيد أو تكلف .

عموما ، المستوى الأول والخامس ييختفوا وهيقرضوا قريب لأسباب  
كتير ، اللي عايزين يعرفوا الأسباب دي ويعرفوا أمثلة أكثر عن الفرق بين  
مستويات اللغة ، أنصحهم بشدة إنهم يقرأوا كتاب دكتور بدوي .



## ٤) منهجية الترجمة

الرسالة ما ترجمتهاش بحذافيرها، عملت فيها شوية تغييرات عشان تبقى أسهل . من التغييرات اللي عملتها في الرسالة :

- حذفت كلمات وتعابير مكررة ومبتدئش أي معنى جديد للنص .
- ضفت كلمات لتوضيح مين هو الفاعل في الجملة مثلا ، وغيرت تركيب بعض الجمل للتسهيل .
- ضفت كام حكاية مكانتش موجودة في الرسالة لأنها ممكن مكناش محتاجة تتذكر وقتها ، بس في الأيام دي ، كان لازم تتذكر عشان السياق يتفهم (مقولتش فين الحاجات القليلة اللي أنا ضفتها عشان ما أقطعش جبل أفكار القارئ ، خاصة لو كانت حاجة صغيرة أو مذكورة بالفصحي في هوامش بنت الشاطي) .
- ترجمت الأحاديث النبوية الشريفة دون أي إسفاف أو إخلال بالمعنى . (عموما ، احنا كلنا فعلا بنترجم الأحاديث النبوية للمصري من سنين ، بس كل الحكاية إنها بتم بشكل شفوي ، فتلاقي حد مثلا بيسأل : يعني إيه " إذا أراد الله أن يوتغ عبدا أعمى عليه الحيل " ؟ والناس ترد : " يعني

لو ربنا عايز يضل حد يخليه معمي عن الحلول والطرق الكويسة .  
والكتاب هنا هيقدم الترجمة الشفوية للأحاديث النبوية بشكل مكتوب ،  
لا أكثر ولا أقل).

• الآيات القرآنية ما ترجمتهاش عشان فيه كتب تفسير كتير ممكن ترجعولها  
لو عايزين ، وعشان مفيش تفسير واحد متأكدين إن هو عنده المعنى  
الحقيقي الوحيد .

• أنا ما أشرتش لأصول الأحاديث والأشعار ، ابقوا شوفوها انتو ، لو  
عايزين ، في النص الأصلي لكتاب المعري .

• غيرت في أحيان قليلة أوي في ترتيب جزء من الرسالة عشان ما أقطعش  
حبل تفكير القارئ ، يعني مثلا هو كان بيتكلم مع مجموعة ، وفي النص  
حكى حكاية طويلة ملهاش علاقة بالموضوع ، فنقلت الكلام بحيث  
يخلص كل كلامه مع المجموعة دي الأول وبعدين يحكي الحكاية براحتة .

• ماراعيتش الإعراب الصح في الكلام وخاصة في الهمزة وفي الأسامي لأن  
اللغة المصرية مفيهاش إعراب زي إعراب الفصحى ، فمثلا : أي حد  
اسمه فيه " أبو " بتفضل " أبو " مش " أبي " ولا " أبا " .

• ما التزمتش بعدد الأبيات بالظبط في كل الشعر المذكور ، بس التزمت  
بالمعنى تماما ، وحاولت ألترم بالقافية في معظمه (وإن خانتني الموسيقى في  
معظمه برضه) .

• كل أسامي الشخصيات وأسامي المدن اللي مش مشهورة حطتها بين  
علامتين " تنصيص " للتسهيل .

- أي شتايم في الترجمة هي في الأصل شتايم، ومش من عندي .
- بعض الكلمات بالمصري ملهاش شكل كتابة موحد معروف، عشان كدا، أنا كاتبة بالشكل اللي أنا شايفاه صح، واللي ممكن جدا يكون غلط، زي مثلا كلمة "برضه" . وأصل الكلمات ومنين جت عايز بجهاني، والكتاب دا مش عشان كدا .

## ٥) فهرس رسالة ابن القارح

الكتاب بيتندي بجواب من شخص اسمه ابن القارح، بعث الجواب للمعري، والمعري رد عليه برسالته اللي هي موضوع الكتاب نفسه: رسالة الغفران. رسالة ابن القارح نفسها فيها مشاكل كتير في الترابط، عشان كذا أنا هحاول على قد ما أقدر إنني أربط المواضيع ببعضها، وهقسمها بالشكل التالي (في شكلها الأصلي مش متقسمة):

١) ابن القارح بيتندي الجواب وبيمجد في المعري ويقوله على سبب كتابة الجواب دا.

٢) بيتكلم عن الملحددين والزنادقة واللي ضلوا الطريق.

٣) شكوى عامة من حال الدنيا.

٤) حكايات عن النبي.

٥) بيعاتب نفسه على تقصيره وانشغاله بالدنيا.

٦) محاولة لتصليح صورته قدام المعري (حكايته مع أبو القاسم).

٧) بيمجد في المعري ويشكره ثاني.

٨) يشكي من ضعفه وقلة حيلته.

٩) نهاية الجواب.

## ٦) فهرس رسالة الغفران

برضه الرسالة مكتتش متقسمة ، والتقسيم دا من عندي عشان التسهيل  
ب القراية والمتابعة :

- ١) بيسلم عليه ويتكلم عن رسالة "ابن القارح" وجزء ربنا ليه على قيمة رسالته الأدبية والأخلاقية .
- ٢) المعري بيتخيل ابن القارح في الجنة .
- ٣) المعري بيتخيل إزاي ابن القارح دخل الجنة .
- ٤) عزومة الجنة .
- ٥) الحوريات .
- ٦) رحلة "ابن القارح" لأهل النار .
- ٧) الرجوع للجنة .
- ٨) رد المعري على كل جزء من رسالة ابن القارح .

## آخر كلام

أنا بعتذر مقدما عن أي معلومة أنا فهمتها غلط ، وبالتالي ترجمتها غلط . وبتمنى إن الترجمة دي توصل لأهدافها اللي ذكرتها قبل كدا .  
وبشكر كل اللي ساعدوني بشكل مباشر أو غير مباشر في الترجمة دي .

ناريمان الشامي

اغسطس ٢٠١٤ ، طوكيو

## رسالة ابن القارح

بسم الله الرحمن الرحيم

( ١ )

## بداية الجواب

استعنا على الشقا بالله ، والحمد لله على كل نعمه ، سبحانه ، ملوش  
شيل ولا زي .

يكتب رسالتي دي لمولاي الشيخ الجليل أبو علاء المعري ، ربنا يعزه  
ويسعده .

هحاول أكون صريح وصادق في كلامي ، بعيداً عن أي نفاق أو تسجيد .  
عشان أنا مش زي اللي يروح لواحد صاحبه عيان ويقوله : " إيه أخبارك  
دلوقتي ؟ ياريتني كنت بدالك " ، ويعمل نفسه مهتم بصحته وهو في الحقيقة  
بينافقه ، ويبقى قاعد بعد كذا مستني إن صاحبه دا يردله الجميل لما ربنا يقومه  
بالسلامة ، وكأنه هو اللي شفاه لما اتكرم عليه بزيارته ومن عليه بطلعته البهية .

وربنا وحده اللي يعلم إن حنيني ليك لو كان زي حنين الناقة لابنها ،  
أو العصفور لعشه ، أو الحمامة لوليفها أو الغزالة لابنها الصغير كان هيتغير  
مع الأيام والسنين ، ولكن رغبتني في إنني أقابلك وأشوفك زي حنين



العطشان للمية، والخايف للأمان، ورغبة اللي لدغته حية سامة للحياة،  
والغريق للنجاة، والقلقان للراحة، وزِي رغبتك انت نفسك لحمد ربنا  
وشكره.

لو ربنا مد في عمري لحد ما أشوفك، هكون أسعد إنسان في الدنيا،  
هكون زي المسافر اللي وصل بالسلامة أخيرا للمكان اللي رايحله، أو اللي  
عمره ما حصله حاجة وحشة ولا خانه عدو، أو اللي طول عمره عايش في  
راحة بال. نفسي ربنا، اللي ثقتي فيه ملهاش حدود، يمن عليا باليوم دا  
قريب.

وبطلب من ربنا العلي القدير إنه يمتعك دايمًا برزقه، ويزيدك من نعيمه  
لغاية لما يوصل شرق الأرض وغربها. فوالله اللي يمر على بحر علمك ويتأمل  
جمال نور قمرة، هيعرف ليه القلم في إيدي بيترعش وأنا بكتبلك، وهيفهم  
ليه حتى أنا ممكن أخجل إنني أمضي بإسمي على الرسالة دي.

وما قداميش دلوقتي غير إنني أسلمك زمام أموري وأطلب منك إن  
تديني مفتاح من مفاتيح علمك، وإنك تقبلني كواحد من أصحابك أو  
مريدينك. ويكفيني إنني أبقي شرارة من نارك، أو نقطة ميه في محيط علمك.  
لكن أنا بقارن إيه بإيه؟ هو اللي عينيه متكحله خلقة زي اللي حاطط كحل،  
ولا اللي مولود كريم زي اللي عامل نفسه كريم، وخاصة لو حد أخلاقه  
ملازمه زي ما لون جلدنا ملازم لجسمنا، فلا الأبيضاني يقدر يبقى أسمر،  
ولا الأسمراني يقدر يبقى أبيض، ولا الشجاع هيقرب في يوم جبان، ولا  
الجبان بطبعه هيقرب في يوم شجاع.

وعلى رأي ' أبو بكر العرزمي ' :

يهرب الجبان عن الدفاع عن أهله وناسه . . . أما الشجاع فيدافع حتى  
عن اللي ميخصهوش  
ويعطف كريم الأصل حتى على عدوه . . . والبخيل حتى لو حد من  
أهله ما يديهوش  
واللي ما يمنمش الأذى عن اللي بيحبوه . . . هيتلدى بكرة من اللي ما  
بيحبوهوش

أنا فين وانت فين؟ هو الغراب زي النسر؟ دا انت بقيت أشهر من نار  
على علم واسمك بقى على كل لسان زي الأدان . واللي ينكر دا، ويحاول  
بضحك على الناس بأي كلام تاني غير دا، ويوصل بيه الكذب والإفتراف  
للدرجة دي، يبقى إنسان في منتهى الوقاحة، أو يبقى عامل زي القبيح اللي  
بيقارن نفسه بجمال القمر، وبيهزي بأي كلام وخلاص ويبقى مُسخة الناس  
كلها ويبقى على رأي " الأعشى " لما قال :

يا ناطح راسك في الصخر عشان تفلقه . . . مش هتفلقه ، وهتتعب  
قرونك على الفاضي

والرسول صلى الله عليه وسلم قال : " لعن الله أبو لسانين ، وكل  
الكذابين ، وكل النمامين " .

أخيراً وصلت حلب ، يحميها ربي ويجرسها ، بعد ما عانيت الأمرين في  
شوارعها . وياريته على كذا وبس ، دا أنا وصل بيا الأمر إنني معرفتش المكان  
اللي اتولدت فيه ، كل صحابي وجيراني راحوا . بكيت وقتها وقلت :

يا اللي تزور بلادك بعد طول غياب . . . تلاقيها على حالها لكن  
هتخسر الصُحاب

وخرجت من حلب إيد ورا وإيد قدام، زي "أبو القطران، المرار ابن  
سعيد الفقعسي" اللي كان بيعحب بنت عمه "وحشية" اللي كانت ساكنة في  
نجد أيامها، بس اتجوزت واحد من الشام وسافر بيها على هناك، فوجعه  
أوي بعدها، وقال في قصيدة:

لوسابت حبيبتك "وحشية" نجد . . . عينك مش هتلاقي لدموعها دوا  
نظرة واحدة منها وهي ماشية . . . خلت الدموع زي المطر من الهوى  
وكنت قبل ما تمشي بتكره رياح الشمال . . . لكن بسببها بقت الريح  
دي هي الدوا

وإذ فجأة، ألاقى واحد جايب سيرتك قدامي كدا من غير مناسبة  
ويقول: "المعري أحسن من "سيبويه" في النحو، وأحسن من "الخليل"  
في اللغة وأوزان الشعر، فلاقيتني بقول للناس اللي حواليه: "سمعت كمان  
إن أستاذنا المعري بيستخدم التصغير لما يحب يكبر حد أو حاجة، ويستخدم  
التكبير لما يحب يصغر الناس أو الحاجات"، فأكد لي المعلومة الأساتذة اللي  
كانوا هناك، ربنا يارب يطول في عمرك يا أستاذي أكثر منهم ويكرمك  
ويباركلك في صحتك وفي عمرك.

الحكاية وما فيها إن "أبو الفرج الزهرجي"، سكرتير عالي المقام  
الباشا "أحمد ابن مروان"، إداني جوابين: واحد ليا، والثاني لحضرتك،  
وحلفني إن أنا اللي أقرأهولك، وإني متأخرش في توصيله. بس للأسف،

اللي كان مرافقني في الرحلة سرق مني كل حاجة بما فيها الجوابين . فقررت  
إني أكتب الجواب دا عشان أشكيلك همي ، وأحكيلك على كل اللي  
لابتكم في سكتي من مدعين العلم والأدب ، وهم في الأدب والأخلاق صفر  
على الشمال ، ويغلطوا في اللغة غلطات شنيعة ، ومش قادر أرد عليهم ،  
عشان لو رديت عليهم ، هيتبلوا عليا ويعملوا رباطية عليا ويقولوا إن أنا  
اللي ما بفهمش حاجة في اللغة ، وإن أنا اللي عملت الغلطات دي .

لما قابلت " أبو الفرج الزهرجي " كان في مكان اسمه " آمد " في تركيا  
وكان معاه شوية كتب فرجني عليهم . قتلته : " كتبك دي كلها يهودية  
وبعيدة تمامعن الشريعة الحنيفية " . زعل من كلامي أوي ، فقتلته : " راجع  
كتبك دي مرة ثانية مع نفسك ومع الناس القريين منك وابقى قولني  
رأيك " . فقراها تاني هو وابنه ، وعرف إنه كان عندي حق ، فبعثلي جواب  
بمدحني فيه بأسلوب يدل على نبيل أخلاقه .

إلهي ربنا يلعن عبيد النجوم . . . واللي يقول عنها إنها بتفهم

أو هيبقى عامل زي اللي ربنا قال عليهم في كتابه الكريم: "مذبذبين بين ذلك لا إلى هؤلاء ولا إلى هؤلاء".

بيقولوا إن "القطربلي" و"ابن أبو الأزهر" ألفوا كتاب روعة هما الاثنين، حتى في بغداد ومصر قالوا إنه كتاب تحفة، رغم إن حجمه صغير. المهم، قالوا في الكتاب إن "المتنبي" لما خرج من السجن، راح يقابل الوزير "أبو الحسن، علي ابن عيسى"، الله يرحمه، فالوزير سأله:

- انت بقى أحمد المتنبي؟

- أنا أحمد النبي.

وعرى بطنه ووراه وحة فيها وقاله: "دا دليل نبوتي وعلامة رسالتي". فراح الوزير مقلّع "المتنبي" جزمته، وضربه بيها خمسين مرة ورجعه السجن.

ساعتها كتب شعر لسيف الدولة قاله فيه:

ليه كل الغضب دا على اللي بيعجبكم . . . وبتعاقبوه بعد ما غرقتوه  
برضاكم وخيركم

بس المتنبي كان كذاب، وكان يتمحك في الأخلاق، ومكنش بياخذ حاجة إلا عن طريق الكذب والخداع واللؤم.

وإن كان دا ما يمنعش إنني أقول إن المتنبي شعره رائع، أنا بس كل اللي بيضايقني هي الناس الملحدة اللي ميعرفوش ربنا وبتلاعبوا بالدين عشان

يشككوا المسلمين في دينهم ويشككوا في نبوة الأنبياء كلهم عليهم ألف صلاة  
وسلام، ويستظرفوا ويترأوا عليهم ويبقوا مبسوطين أوي وهم يعملوا  
ثدا، وعلى رأي "أبو نواس" لما قال:

غرور مغني وظرف ملحد

وافتكرت لما الخليفة العباسي "المهدي" حكم بالقتل على "بشار ابن  
برد" عشان كان ملحد، فعرف "ابن برد" الموضوع فخاف وحاول يدافع  
عن نفسه فقال:

يا ابن نهيا، إذا كانت راس واحدة ثقيلة عليا، فما بالك براسين؟

والله واحد كفاية عليا، روح اقنع حد غيري يعبد إلهين

ويقولوا برضه إن الخليفة المهدي جاب الشاعر "صالح ابن عبد  
القدوس"، وكان السياف في انتظاره عشان يطير رقبته، فـ "صالح" سأله:

\_\_ انت هتقتلني بمناسبة إيه؟

\_\_ عشان الشعر اللي قلت فيه:

أنا كاتم سري ورابط لسانني عشان مقولش اللي في بالي

عشان لو الناس عرفت ديني الحقيقي، كنت هتحبس طوالي

وكمل المهدي وقاله:

- ومش انت برضه يا كافر اللي قلت:

ربنا بيسترها عليك بس لو معملتش فواحش... لكن متعتمدش

عليه في أكثر من كذا

- عندك حق أنا فعلا كنت ملحد، بس تبّت .

- احنا هنستعبط؟ مش انت اللي قلت :

اللي فيه عادة مبيغير هاش إلا لومات . . . ولو انصلح حاله فترة

ينتكس ثاني زي المريض

وراح السيّاف مطير رقبتة، وفجأة بقت راسه مرمية جنبه على الأرض.

وفي نفس الفترة دي برضه، ظهر في مدينة "البخارى" واحد أعور اسمه "المقنّع الخرساني"، وكان عمل لنفسه قناع من الذهب يداري فيه شكله الوحش، وكان الناس بتكلمه كإنه رب العزة، وكان عمل كمان حاجة شبه القمر وحطها فوق جبل عالي. الخليفة "المهدي" عرف الموضوع، فحاوطه هو وقلعته، فراح "المقنّع" حرق كل حاجة فيها، وخلي كل أهل بلده يشربوا حاجة مسمومة، فماتوا كلهم، وهو كمان شرب منها، فمات وراح على مصيره في جهنم.

وفي السنة الثالثة من الهجرة، واحد شيعي راديكالي اسمه "المنصور الصناديقي" كان متحكم في مدينتين في اليمن اللي هما "المدنجرة" و"سفينة"، وكان الناس بينادوه برب العزة ولما كانوا بيعتوله جوابات برضه كان بيكتبوا: "إلى رب العزة . . .". الراجل دا كان عنده قصر كبير جداً لامم فيه كل ستات البلد، وكان سامح لأي راجل من رجالته إنه يجي بليل وينام مع أي واحدة فيهم. وواحد ثقة قالي إنه دخل مرة القصر عشان يتفرج، فسمع بنفسه واحدة

ست بتقول لراجل: 'دا انت ابني!' ، فالراجل قالها: 'معلش يامه، أنا عبد المامور وطاعة ولي الله أمر واجب' .

وكان 'الصناديقي' بيرر الموضوع دا ويقول: "لو عملتوا كدا، محدش هيميز أملاكه من أملاك غيره ولا ابنه من ابن غيره، فتبقوا كلكم نفس واحدة' .

فجه 'الحسني' حاكم صنعاء وهجم عليه وغلبه، فاتجرح 'الصناديقي' وهرب منه وراح استخبي في حصن هناك. فراح 'الحسني' بعنله دكتور بمشرط مسموم، فقتله بدل ما يعالجه الجرح.

نفس الحكاية كانت مع الخليفة الأموي 'الوليد ابن يزيد' . حكم لمدة سنة وشهرين وكام يوم، وكان مشهور عنه إن ما سبش حاجة حرام إلا وعملها، وكان قال مرة:

ابقي اتجوزي بعد موتي يا سمرا، ومنشغلش بمقابلتنا مرة ثانية بالك  
لو فاكرة إن هيقى فيه بعث، فتبقي هبله وعرفوا يكلولك دماغك  
ويقولوا إنه رمى القراءان بالسهم وعمل فيه خرم وقال:  
لما تشوف ربك يوم الحشر، ابقى قوله: الوليد هو اللي خرمني

وبعت لمكة راجل بنأ مجوسي عشان ينيله خارة فوق الكعبة، بس مات  
قبل ما يتم مشروعه، وبقي الحجاج وقتها يقولوا وهم يلفوا حوالين  
الكعبة: لبيك اللهم لبيك، لبيك ياللي قتلت 'الوليد ابن يزيد' لبيك .



ومرة ثانية جاب "الوليد" حاجة زي تاج من الذهب وفيه جوهرة على شكل راجل، فسجد للجوهرة وباسها، وقال لواحد كان واقف معاه:

- اسجد لها يا حمار .
- هي إيه دي أساسا؟
- دا تمثال 'ماني' ، راجل كان شأنه عظيم زمان، بس اتنسى مع الوقت .
- مينفعش أسجد لغير الله .
- طب قوم غور من وشي .

وفي مرة كان قاعد "الوليد" يشرب في البلكونة، وقدامه زي حلة كبيرة إزاز، وكاسات، فسأل اللي كانوا حواليه: فين القمر النهاردا؟ ، فراح واحد رد عليه وقاله: "في الإزاة"، قاله "الوليد": "يرافو عليك، أنا كمان كنت بقول كدا، طب والله العظيم لأقعد أشرب سبع أسابيع بحالهم ورا بعض" .

ونهاية "الوليد" كانت لما كان قاعد في مكان قريب من دمشق اسمه "البحرا" وقال:

وواحد من بني هاشم ادعى النبوة . . . وهو ولا نزل عليه وحي ولا كتاب

فاتقتل "الوليد" بسبب الكلام دا وراسه اتقطعت ووقعت في الحلة الإزاز اللي كان عايز يشرب منها سبع أسابيع ورا بعض .

ولا "أبو عيسى" ابن "هارون الرشيد" لما قال:

«حل عليا شهر الصوم، يخرب بيت أم دا شهر... ولغاية لما أموت مش  
هصوم منه ثانية

ولو كان الأمر بإيدي وكنت أقدر عليه... لكنت محبته من على وش الدنيا  
فجاله صرع بعدها على طول، وفضل كدا لغاية لما مات قبل ما يلحق  
رمضان.

أما "الجنابي" أو "أبو طاهر القرمطي" فدخل مكة، وقتل كل الحجاج  
اللي فيها لغاية لما وصلوا لحوالي ٣٠ ألف واحد، واستولى على ستة  
وعشرين ألف جمل. حرق كل الأسلحة بتاعة أهل مكة، وخد كمية مهولة  
من الستات والأولاد لدرجة مبقاش عارف يحطهم فين، وخلع الحجر  
الأسود من مكانه وخاه عشان كان فاكر إنه له سحر المغناطيس على الناس،  
وسرق حتة من سقف الكعبة اللي كان بيتجمع فيها مية المطر. وحد قالي إنه  
سمع راجل بيصرخ في ولد ويقول: "يا رخة، اخلعها بسرعة". والولد  
اسمه كدا، "رخة"، مش "رحمة" زي ما ناس كثير بعد كدا حرفوا اسمه.

والناس برضه حرفت كلام "علي ابن أبو طالب" لما قال إن مدينة  
البصرة هيدمرها رياح جامدة، بس "علي" غلط، لأن اللي دمر المدينة هم  
الزنوج. واللي حصل هو إن زعيم الزنوج وقتها "علوي البصري" قتل  
أربعة وعشرين ألف واحد، وكانوا بيعدوا الميتين بعيدان القصب، كل ميت  
يساوي عود قصب، وحرق الجامع بتاع البصرة، وقال في خطبته وهو  
بيخطب في الزنوج: "انتو ربنا ابتلاكم بمظهر قبيح، خلوا جوهركم كمان  
قبيح زي مظهركم، وخلوا كل الأخضر يبقى يابس، وحولوا كل البيوت

لقبور". وواحد قال لي لما كنت في دمشق إن "علوي البصري" دخل المدينة مدعي إنه من نسب رسول الله، عليه الصلاة والسلام.

المهم، نرجع "للجنابي" اللي دخل مكة ورفع سيفه على الحجاج، وبعد ما واحد من جنوده قتل مجموعة منهم سأل: يا كلاب، مش محمد المكي قال لكم: "ومن دخله كان آمناً"، فين الآمن دا؟. فرد عليه واحد اسمه "أبو عبد الله الكوفي":

- لو تدينني الأمان من سيفك أجاب عليك.

- إديتك الأمان.

- فيه خمس إجابات لتفسير الآية دي، الأولى معناها إنه هيكون آمن من عذاب ربنا يوم القيامة. الثانية معناها إنه مش هيبقى مضطر يعمل بعض الفروض اللي ربنا فرضها عليه، زي إن يوجه نفسه ناحية القبلة. الثالثة إن ربنا بيؤمرنا بكدا مش بيدينا خبر، يعني الواحد لازم يدخل الكعبة ويصلي عندها عشان يكون في أمان. الرابعة إنه هو بيبقى في أمان من العقاب على أي جريمة عملها طول ما هو في مكة. والخامسة هي الآية اللي بتقول: "أنا جعلنا حرماً آمناً ويتخطف الناس من حولهم".

- تصدق عندك حق، تفتكر ربنا هيسامحنى؟

- أيوة، إن شاء الله.

فسابه وراح لحال سبيله.

أما "الحسين ابن منصور الحلاج" من مدينة "نيسابور" أو "مرو" كان عامل نفسه فاهم في كل حاجة وعارف كل حاجة. كان شجاع وعابر يقضي

على كل الدول، وصحابه كانوا فاكريته إنه ربنا متجسد في هيئة إنسان، وهو كان عجبه الموضوع دا، وكان بيعمل نفسه شيعي مع الملوك وصوفي مع العامة، وكان يحاول فعلا التأكيد على فكرة تجسيد ربنا فيه .

فضل كدا لغاية لما الوزير "علي ابن عيسى ابن الجراح" جه وقرر إنه يعمل معاه مناظرة، فلقيه صفر في العلوم، فنصحه إنه يتعلم ويدرس الأول بدل ما يقعد يكتب كلام أهيل زي: يا جمال المكان أبو النور الملمع، اللي بيلمع بعد ما يلعلع .

حكالي مرة النحوي 'أبو علي الفارسي' إنه شاف "الحلاج" في حلقة ذكر كان عاملها الزاهد "أبو بكر الشبلي" اللي قاله إنه مش كويس كدا إنه ينشر بين الناس حكاية إن ربنا متجسد في هيئته وإنه لازم يخاف من ربنا . فقال "الحلاج":

آه يا سر الأسرار يا اللي ما يقدرش على وصفك بشر  
يا ظاهر وباطن وموجود في كل شيء وفي كل البشر  
أنا منك وانت مني، يبقى إزاي لنفسي أعتذر؟

"الحلاج" اللي عامل نفسه صوفي كان بيعتقد إن اللي عارف ربنا بيبقى زي شعاع الشمس، منها جه، وليها هيرجع، ومنها بياخد نوره . عثمان كدا الشاعر "الظاهر" قال في المتصوفين:

مفيش أسوأ من المتصوفين . . . ولو شفت واحد منهم أسألهم  
هو ربنا قالوا لما عشقته . . . كلوا زي البهايم وارقصولي؟

في مرة، حرك "الحلاج" إيدته فانتشرت ريحة مسك على كل اللي قاعدين حواليه، حرك إيدته مرة ثانية فانتشر على الناس دراهم، فواحد بيْفهم من اللي قاعدين حواليه قاله :

- حرك إيدك مرة ثانية كدا، ولو جدع خرج منها دراهم مختلفة مشفنهاش قبل كدا، ولا أقولك، خرج دراهم مكتوب عليها اسمك واسم أبوك وأنا أو من بيك .

- ودي أجيبها لك إزاي؟ دا مستحيل .

- والله اللي يقدر يجيب حاجات من الهوا زي المسك والدراهم، يقدر يجيب حاجات متعملتش قبل كدا .

وصل بـ "الحلاج" مرة إنه كتب : "أنا اللي غرقت قوم نوح، وأنا اللي أهلكت قوم عاد وثمود" . فانتشرت حكاياته في كل حته ووصلت عند السلطان تقريبا في أواخر سنة ٩٢٢ ميلادي، ولما اتأكد السلطان من صحة الحكايات دي، أمر بضربه بالكرباج ألف ضربة، وقطع إيديه، وحرقه . وساعتها قال "الحلاج" للوزير "حامد ابن عباس" :

- أنا هخلص عليك وههلكك .

- دلوقتي بس اتأكدت من صحة اللي اتهموك بيه .

والمُلحد الثاني اللي اسمه "أبو جعفر السَّلْمَغانِي" اللي جه هو وأهله من قرية اسمها "سلمغان" في العراق، ويشبه "الحلاج" الخالق الناطق، وبرضه فيه ناس كانوا فاكرينه إله، لأنهم كانوا فاكرين إن ربنا اتجسد في آدم

ويعبدون "شيث" ابن آدم، ويعبدون في كل الأنبياء والأوصياء والأئمة، لغاية  
 ١١ العدد في الإمام رقم ١١ من الأئمة الإثناعشر الشيعة "الحسن ابن علي  
 العسكري" ويعبدون اتجسد في "الشلمغاني". "الشلمغاني" خدع ناس  
 منهم "ابن أبو عون" صاحب كتاب "التشبيه"، والأتنين اتقطعت  
 لهنهم في نفس الوقت. كانوا مریدین "الشلمغاني" ساييبنه بحكم ويتصرف  
 في ما هو عايز في أملاكهم وستاتهم. كان كيميائي وليه كتب كثير معروفة.

برضه كان الفيلسوف "أحمد ابن يحيى الراوندي"، وهو من أهل  
 مدينة "مرو الروذ" في خراسان، راجل متواضع وعلى خلق، ولكن فجأة  
 اتقلبوا لأسباب لا يعلمها إلا الله، وكان علمه أكثر من عقله، وكان عامل  
 في ما الشاعر قال:

ومين يستحمل طيش الشباب . . . ومين يستحمل الطيب لما أخلاقه تبوظ

و "الراوندي" ألف كتب كثيرة، منها:

- كتاب التاج: اللي بيحاول يثبت فيه إن الحياة أبدية، ولكن "أبو الحسن  
 الخياط" نقض فكرته.
- الزمرد: واللي حاول فيه إن يثبت بطلان رسالة النبي، وبرضه نقضه  
 "الخياط".
- نعت الحكمة: واللي شاف فيه إنه مش من الحكمة إن ربنا يخلق  
 مخلوقات عشان بعد كذا يطالبهم بعبادته ويكلفهم بأوامر ونواهي،  
 وللمرة الثالثة نقضه "الخياط".
- الدماغ: واللي اعترض فيه على تركيب وأسلوب القراءة.

● القضيبي: واللي قال فيه إن علم ربنا مش من الأزل، وإن ربنا مكش عنه علم وخلق لنفسه علم، ونقضه "الخياط".

● المرجان: واللي ذكر فيه التناقضات بين أهل الإسلام.

أما الشاعر "علي ابن العباس ابن جريج الرومي"، فقال عنه "أبو عثمان الناجم": "شفته مرة وهو في مرضه اللي مات بسببه، كان فيه جنب راسه كباية مية متلجة وخنجر طويل لو دخل من صدره يطلع من ضهره، فسألته:

- إبه دا؟

- المية عشان أبل بيها ريقى وأهدي عطشي، أصل فيه أسطورة بتقول إن محدش ييموت وهو عطشان. أما الخنجر فعشان لو زاد عليا الألم أقتل نفسي بيه. أنا محكيكلك حكايتي عشان تعرف إن نهايتي قربت مفيش مفر. يا سيدي القصة وما فيها إني في يوم كنت في بغداد وكنت عايز أروح من حي "الكرخ" للبصرة، فسألت صاحبي "أبو الفضل" اللي اسمه جاي من الأفضال، فقال لي أبو الفضل: "بصر، لما توصل للكوبري احود يمين (اللي جاية من كلمة "اليمين")، وروح لشارع النعيمة (اللي جاية من كلمة "النعيم")، واسكن في بيت ابن المعافي (اللي اسمه جاي من "العافية")، ولكن مسمعتش كلامه لسوء حظي، فسألت صاحبي الثاني اللي اسمه جعفر (واسمه جاي من جوع + فرار)، فقال لي: "لما توصل عند الكوبري خد شمالك (اللي جاية من الشؤم) واسكن في بيت ابن قلابه (يعني كل حاجة مقلوبة وملغطة)، وبالفعل، الدنيا اتقلبت بيا، واكثر حاجة مضايقتني هي صوت العصافير: سو سوسوسو، وأنا فعلا حالي كلها بقت سو (= سيئة).

وبعدين راح قلالي الأبيات دي :

الحق واتمتع برؤية صاحبك . . . عشان مش هتشوفه ثاني أبدا

وباعيني ما عرفش يتحكم في بوله ، فنبهته إنه ابتدى يتبول على نفسه فقالي :

بكرة يروح البول ويحيي مكانه العياط والنواح

ولقا ربنا هو اللي مخوفني ، ومش مخليني مرتاح

وفعلامات "ابن الرومي" ثاني يوم على طول . وأتمنى إن ربنا يرحمه  
وسامحه على تفكيره في الانتحار ، عشان الرسول قال : اللي يغز نفسه  
عابدة ، يجي يوم القيامة بنفس الحديدية ويفضل يغز بيها نفسه في النار للأبد ،  
واللي يرمي نفسه من مكان عالي ، يجي يوم القيامة ويفضل يقع من مكان  
عالي على وشه في النار للأبد ، واللي يشرب سم ، يجي يوم القيامة ويفضل  
بشرب سم في النار للأبد .

مرة "الحسن ابن رجاء الكاتب" حكالي حكاية وقالني : "الشاعر" أبو  
لمام "سافر مرة "خراسان" عشان يزورني ، وكنت سمعت عنه إنه ما بيصلش ،  
لبعتله واحد يراقبه ، فما شافهوش ركعها ولا مرة واحدة ، فعاتبته ، فقالي : "يا  
سيدي بتكلمني في إيه؟ عيب عليك تكلمني في الحاجات دي وأنا قاطع المسافة  
دي كلها من بغداد لهننا ، واتحملت تعبها ومانطقتش ، كل دا عشان أشوفك  
وبس . وبعدين أنا لو كنت أعرف إن الصلاة هتتفعني بحاجة لو صليت أو  
هتضرني بحاجة لو سبتها ، مكتتش سبتها ."

كمل "الكاتب" : "كنت عايز أقتل "أبو تمام" لما سمعت منه الكلام  
دا ، بس خفت لحسن الناس يفهموني غلط " .



وحسب حكايات كثيرة من أكثر من مؤرخ، قالوا إنهم قبضوا على الأمير "المازيار" وقدموه للخليفة العباسي "المعتصم"، وكان المعتصم قبلها بيوم اتعصب على الكاتب والسكرتير بتاعه "الأفشين" لأن القاضي "ابن أبو دواد" قال للمعتصم: "يعني السكرتير بتاعك يبقى مش مختون وكمان بنام مع ست عربية؟ وفوق كل دا يروح يكتب "لما زيار" عشان يساعده على قلب نظام الحكم ويشجعه على العصيان".

فراح المعتصم جاب سكرتيره وهدده، فاعترف السكرتير إنه كتب جواب "للمازيار" وقاله فيه: "مفيش في أيامنا دي، ولا على الأرض كلها، حد يقدر على تنفيذ قلب نظام الحكم غير أنا وانت و"بابك الخرمي"، بس "بابك" خلاص راح، وأنا مكتتش عايز أقتله لولا إنه عمل اللي عمله واستسلم ومانفذش اللي طلبته منه، فما فضلش دلوقتي غير أنا وانت، أنا بعتلك جنود من طرفنا عشان ينضموا ليك، فلو هزمت الخليفة المعتصم، هتكفل أنا بنفسى بتصفية حساباتك مع العرب وهستولى على بغداد عاصمة خلافتهم، وساعتها ينتصر ديننا إحنا."

"المازيار" رد عليه بجواب احتفظ بيه الكاتب "الأفشين" عنده في علبة حمرا.

المهم، بعث المعتصم ناس عشان يقبضوا على "المازيار" ويحيوه، وواجه "المازيار" بـ "الأفشين"، فاعترف "المازيار" بكل حاجة. وفيه ناس قالوا للمعتصم: "إحنا لو منك نستفيد من الفلوس المتلثة اللي عند الـ"مازيار"، فغضب المعتصم وقال:

الأسود، زي الفرسان اللي بيهمهم وقت الحرب . . . إنهم يفوزوا  
على العدو، مش السلب والنهب

اتحكالي برضه إنه كان فيه شخصين لابسين هدوم حمرا ومعاهم خناجر  
طويلة دبحوا ٣٠٠٠ واحد. كان اسمهم ابتدى يتردد منين ما نروح، والناس  
كانت بتقول إنهم لما قتلوا الـ ٣٠٠٠ واحد، خدوا من كل واحد علامة:  
اللي خدوا منه الخاتم بتاعه، واللي خدوا منه هدومه، أو منديله، أو حزام  
بنطلونه، وكأنهم فيضان بيدمر المدن.

كنت بتناقش من فترة مع واحد عن "علي ابن أبو طالب" وعن  
"الحاكم بأمر الله". أصل ظهر واحد في البصرة كان بيدعي إنه الإمام  
"جعفر الصادق"، الإمام السادس من أئمة الشيعة الإناشر، وإنه متصل  
روحانيا بسيدنا "علي" لدرجة إن روحه متجسده فيه.

(٣)

## شكوى عامة من حال الدنيا

أنا لو كنت دورت أكثر في موضوع الإلحاد دا كنت هقعد أتكلم فيه من  
هنا للسنة الجاية، بس :

ميجي يوم واللي في القلب يطلع وبيان . . . واللي مكتوم في الصدر يطلع  
عاللسان

دا أنا لو قلت كل اللي أعرفه، كان زمان في السجن، ولكن على  
راي الشاعر :

زهقت من ثقل راسي وتعبانى . . . ملاقيش شاب يشيلها مكاني؟

وعموما، أنا بستريح أوي لما بقول :

مقدرش أشفي غير جروحي ومقدرش أشفيك . . . أنا اللي فيا مكفيني،

وانت اللي فيك مكفيك

بس هي الدنيا كدا، أنا لو اشتكيت منها ومن ظروف، يبقى بضيع  
وقتي على الفاضي، لأنها ولا بتبسط حد ولا بتسيب حد على حاله، ترفع

الواطي وتوطي العالي ، ومابتعملكش معروف غير لما تاخذ حاجة قصاده ، ولو سلفتك حاجة تبقى بتعملها وهي مضطرة ، ولو مرة ابتسمتلك ، تكشر في وشك ثاني في لحظتها وتسبيك وتغشي وهي عينيها بتطق شرار . متعرفش يعني إيه الوفاء بالوعد وعمرها ما عرفت يعني إيه دموع الخجل . من برة تفتكرها حاجة حلوة ، لكن من جوة أجارك الله ، حزن وبؤس ، ودائما تخيب ظنك فيها ، ومتعملكش أي معروف . دنيا ما تسمعش شكوتك وتفرح في بلوتك .

شفت بقى؟ يعني أنا قعدت ألوم على "المتني" عشان شتم الزمان وفي الآخر أنا كمان وقعت في نفس الغلط . بس أنا أصلي عامل زي الغريق اللي عايز يتعلق بقشة ، أو السجين اللي ما يفكرش غير في الهروب . عشان كدا بحب شعر "ابن الرومي" اللي بيقول :

يعني انت هتروح من الشيخوخة فين . . . فاتصرف كويس دلوقتي أحسن  
من بعدين

وسبيك من شكوى الدنيا واللي فيها . . . مش هتسمعك حتى لوليكها ودينين  
فمتخفش من كبر السن واللي بيحصل فيه . . . يعني هي هتبقى مونة واحدة  
ولا اتنين؟

وأنا في شبابي مكنتش بحب حد قد اللي يقولي : "ربنا يطول  
عمرك" ، دلوقتي وأنا فوق السبعين ابتديت أخاف واترعب . حق ربنا ، أنا  
المفروض ولا أخاف ولا أحزن ، لأن كل اللي اتمنيته في حياتي أو حتى اللي  
اتناه ليا أهلي حققته . هعزن على إيه؟ عشان الستات بيبعدوا عني يعني؟

١١. وحده اللي يعلم إنه أنا اللي ببعد عنهم ، وإن مفيش حد عارفهم  
، مايرهم قدي . ومش أنا اللي أتخسر عليهم وأقول :

«... السود خلّت شعرنا منها يشيب . . . والشيب خلّى جمال الستات عنا  
يغيب

ولا الثاني اللي بيقول :

خفت لما لقيت الشيب ابتدا يحتل كل شعري

١٠. بيمجنيش شعر " أبو عبادة البحري " اللي بيقول :

«... البيض بيخلوا نهارنا أبيض . . . وشعرهم الاسود الجميل هيفضل اسود  
، اهل البلد دي رجالة من ضهر رجالة . . . ولو الحرب قامت يبقوا زي الاسود  
ونار يخهم وحكايتهم كلها مشرفة . . . وحكايات سيوفهم ملهاش حدود  
دي بلد حتى عيالها أول ما يستنوا . . . يبقوا رجالة وفرسان زي الجددود

وإن كانت الأبيات دي تنطبق على صفات أهالي بلدة " معرة  
العمان " اللي انت يا شيخنا جاي منها وجاي منها اسمك ، " أبو العلاء  
المعري " ، ربنا يحفظك يا رب ويطولنا في عمرك ، أهل بلدك ما بينكروش  
حمايلك عليهم . يعني " أبو العباس الممتّع " مسابش موقف إلا وذكر فضلك  
عليه .

(٤)

## حكايات عن النبي

قريش سألت مرة النبي: يعني انت شايف إن شوية العبيد اللي بيبيعوك دول زي "بلال" و"عمار" و"صهيب" أحسن من جدودك أشرف قريش زي "قصي ابن كلاب" و"عبد مناف" و"هاشم" و"عبد شمس"؟ فرد عليهم النبي: "أبوة أحسن، وهيجي يوم لو كانوا عددهم قليل هيكثروا، ولو كان مستواهم الاجتماعي مش قد كدا هيقوا من أشرف خلق الله، لغاية لما يبقوا نجوم الناس تهتدي بيها وتاخذهم قدوة، ويقولوا: زي ما قال فلان، وزى ما عمل علان، فمتجوش تفتخرولي بجدودكم اللي ما توا في الجاهلية واللي ما يسووش حتى الزبالة اللي بتدحرجها الخنفسة بمناخيرها. لو سمعتوا كلامي هخليكم أشرف، وأقسم بالله لأخلي كل كنوز كسرى وقبصر بين ايديكم. " فقال له عمه "أبو طالب": "يا محمد، خد بالك من اللي بتقوله حفاظاً على نفسك وعلياً". النبي افكر إن عمه باعه وإنه هيسلمه للأعداء، فقال له: "والله يا عمي لو حطوا الشمس في إيدي اليمين والقمر في إيدي الشمال في مقابل إنني أسبب الدعوة في سبيل الله، والله ما أسببها غير لما ربنا يوفقني وأكمل دعوتي أو أموت وأنا بنشرها".

وقام وهو بيعيط، فناداه 'أبو طالب' وقاله: 'تعالى يا ابن أخويا' فرجع محمد، فقال له "أبو طالب": 'روح وقول للي انت عايزه، وأنا عمري ما هيبعلك ولا هخذلك أبداً' .

في مرة من المرات كان النبي بيعحكي عن يوم كان تعبان ومنهك فيه أوي، فقال: "قعدنا مرة أنا و"أبو بكر" في الجبل ١٠ أيام بحالهم من غير ما ناكل أي حاجة غير الآراك، ودي فاكهة صغيرة ومدورة لونها أحمر على بنفسجي وشبه النبق جداً وبياكلها الحيوانات والناس" .

وكان لما النبي بيتدي يحكي عن المصاعب اللي اتعرضلها، كان "عتبة ابن غزوان" يضيف ويقول: "احنا قعدنا فترة ما بناكلش حاجة غير ورق شجر البشام (نوع من الشجر ريحته حلوة فالناس بتستخدمه عشان تنسوك بيه، بس ملوش فاكهة) لغاية لما كان بقنا بقرح، واليوم اليتيم اللي لقيت فيه بلحة، قسمتها بيني وبين "سعد ابن أبو وقاص"، بس سبحان مغير الأحوال، أنا وسعد دلوقتي كل واحد فينا أمير على إمارة بحالها. في الأيام إياها، كان يقولوا إن لو حد لقي ثمرة وقسمها مع الثاني، اللي حفظه حلو فيهم هو اللي يطلع نوى البلحة من نصيبه، عشان هيلاقى حاجة يمضغ فيها اليوم بطوله عشان ينسى الجوع." وبرضه حكى الرسول مرة إنه كان بيرعى غنم أهل مكة مقابل شوية بلح.

أول ما ابتدا النبي في الدعوة وقف عند "الصفاء" ونادى: اصحوا يا بشر .

الناس اتجمعت عليه وقالته :

•مالك يا محمد؟ فيه إيه؟

•أنا مشهور بينكم بإيه؟

•حمد الأمين .

•طلب هتصدقوني لو جيت قتللكوا إن فيه شوية فرسان هيهجموا على

الوادي ، وإن فيه عساكر جايين يقطعوا عليكم الطريق للمدينة؟

•اه هتصدقك عشان الصراحة عمرنا ما شفتاك بتكذب .

•طيب أنا بقولكم إن اللي انتو فيه دا مش من ربنا ومش لربنا

ومايرضيش ربنا . قولوا لا إله إلا الله ، واشهدوا إني رسوله ،

واسمعوا كلامي واتبعوني هتلاقوا كل العرب تحت أمركم ، وهتبقى

إيران ملككم . ربنا قالي : استفزهم زي ما استفزوك ، وابتعلهم جيش

وأنا هبعت من عندي خمسة " ، ووعدني إنه هينصرني بناس منكم ،

وقالي كمان : " اقتل اللي عصوك بمساعدة اللي طاعوك " وأكدلي إن

سلطاني هيبقى أكبر من سلطان "كسرى" و"قيصر" .

•وفعلا ، بعت الرسول ٣٠ ألف واحد في غزوة تبوك ، ودا كله بأمر ربنا

اللي بيخلق كل حاجة من ولا حاجة ، ويمكن برضه يخلي كل حاجة ولا حاجة ،

بخلي السابل ناشف والناشف سايل ، زي ما بيعجمد البحر ويفجر الصخر بالمية .

•النبي بمساعدة ربنا عامل زي اللي يقول : أنا بالإزاة الرفيعة دي

هحك الجبل الكبير دا فيتكسر فتافيت ، أو النملة الصغونة الحلوة دي هتهزم

الجيش الكبير دا كله بكل أسلحته .



وهو النبي كان كذا فعلاً، يعني لما "عروة ابن مسعود الثقفي" رجع من "الحديبية" قال لأهل قريش: "أنا عديت على "النجاشي" و"كسرى" و"قيصر" وشفيت جنودهم، ملقيتش حد فيهم بيطيع القائد بتاعه ولا بيحترمه ولا بيبهاه زي ما أصحاب محمد بيعملوا، بيقوا واقفين حواليه وكأن فيه عصافير واقفة على راسهم خايفين لتطير، يعني بمجرد بس ما يقول أمر تلاقيهم كلهم طالعين يجروا عشان ينفذوه، ولما يتوضأ، ياخدوا مية وضوءه ويتوضوا هم بيها بعد كذا، ولو اتنخم (يعني نف برايره)، يخذوا تفاعته ويدلكوا بيها وشهم ودقنهم وجلدهم."

وفضلوا يطيعوه بعد موته أكثر كمان من لما كان عايش، لدرجة إن هم قالوا: "يا جماعة محدش يشتم أصحاب محمد، عشان هما أسلموا من خوفهم من ربنا، لكن باقي الناس أسلمت من خوفها من سيوفهم."

فشوف انت بقى إزاي ابتدا "محمد" دعوته وهو ضعيف ولوحده وشوف وصل لإيه. لكن الحقيقة إن هو كان واثق من اللي بيعمله وبصيرته بالمستقبل كانت عالية، لغاية لما كل الناس، العدو قبل الصديق، اتأكدوا من صحة كلامه. انت عارف، محمد دا كان عامل زي ما حد يجي يقول: "ذرة التراب دي بكرة هتكبر وهتبقى جبل يغطي الأرض كلها."

في يوم جه النبي وحب يدخل الكعبة، فمنعه واحد اسمه "عثمان ابن طلحة العبدي"، فالنبي قاله:

- ماتمنعنيش يا "عثمان"، أنا كنت عارف إن اليوم دا هيجي، وإن مفتاح الكعبة هيكون في أيدي في يوم من الأيام، أدخلها وقت ما أعوز.

اليوم اللي هتدخلها فيها هيكون آخر يوم لعز قریش وكرامتها وهيقبل  
هددها .

بالمكس يا " عثمان " ، اليوم اللي هتدخلها فيه هيزيد عز قریش وهيزيد  
هددها .

(٥)

## ابن القارح بيعاتب نفسه على تقصيره وانشغاله بالدنيا

أما بالنسبة لي أنا "ابن القارح" ، فأنا بدعي ربنا ليل نهار إنه يقويني على نفسي ويغلبني على شهواتي ، وبدعيه إنه يخليني أتعلم من الدروس اللي الحياة بتديها لي . لكن للأسف أنا فكري مشغول بالمشاكل اللي كاتمة على صدري ، ورغبتني في الدنيا اللي مش لاقني حد يساعدني في البعد عنها . فبن العقل والعلم عشان نفهم حقيقة الدنيا؟ يعني احنا مطنشين على كل القرف اللي بيحصل في الدنيا وطالعين نجري على سعادة هشة وسطحية بتدل على إن الأسوأ لسه جاي ، زي "كثير" لما قال :

كأنني يوم ما بعدت الدنيا عني كنت بنادي . . . على صخرة اتطرشت ، لا  
بتسمع ولا بترد عليا

وأنا ، على رأي "كثير" ، مستغرب الحياة اللي ما بتعديش لحظة فيها من غير ما تبكييني ، وما فكرتش فيها مرة إلا واتغميت وركبني النكد ، ولا بتوفي بوعد ولا بتسهل الطريق لي . عايز يروح لها ، ومحدث حاول يثق فيها

مرة إلا وخذله . اللي فاكرين إنهم ملكوا الدنيا ، مخدوش في الحقيقة غير  
الظاهر ، لكن الغنى اللي بجد هو زهد الفقرا في الدنيا . ما أنا ياما شفت إيام  
زي الفل ، الشمس الجميلة ، والجو الرائع ، والضحك اللي ما بيبطلش ،  
لكن إزاي؟ لازم الدنيا تبخل عليا بكل دا وتاخده مني ، ويتقلب الوش  
البشوش لو ش حزين كثيب ونفترق بعد ما كنا روح واحدة . ويا عيني على  
اليوم اللي هموت فيه وأنزل القبر ، وأكتشف ساعتها إن ضيعت عمري في  
تفاهات بدل ما كنت أعمل اللي المفروض أعمله فعلا . وكل ما أفكر بيت  
"ابن الرومي" اللي بيقول :

يعني انت هتروح من الشيخوخة فين . . . فاتصرف كويس دلوقتي أحسن  
من بعدين

أقلق وأعيط ، بس من غير فائدة ، فأبكي على حالي وأقول :  
لساني بيقول كلام ما بنفذهوش . . . وقلبي عايز حاجات ما بعملهاش  
وعارف طريقي وما بروجهوش . . . وأعرف حاجات ، وحاجات تانية  
معرفهاش

في مرة عرضوا عليا كاس ، فرفضت وقتلتهم سيبوني في حالي أشرب  
الخمرة المطبوخة اللي علمهالي الشيخ "الأوزاعي" ، وقتلتهم : فكرتوني لما  
"إبراهيم ابن المهدي" عرض على "محمد ابن حازم" خمرة ، فرفض وقاله :

يعني عايزني بعد الشيبة تطلع مني العيبة؟ والشيبة والجهل ما يجتمعوش  
يعني يبقى سني وشعري الأبيض وكمان الجهل ، مع بعض كلهم ما  
ينتموش

وأنا صغير آه كنت مقضيها حريم وما بعثش

لحد عايزني دلوقتي أنا أشرب والناس حواليا حتى الحج ما يفوتوهوش؟

وساعات بقعد أكلم نفسي وأقولها: ربنا بيديك فرص كثير والمفروض  
بخون عندك دم وتقدر دا. نفسي أبقي زي الأطفال، كل اللي محتاجه يبجي لحد  
هندي من غير حتى ما أطلبه، وأي شر يبعده عني من غير ما أعمل أي  
حاجة. ما سمعتش النبي صلى الله عليه وسلم وهو يقول: "يا رب ارزقني  
واحميني زي الطفل الصغير اللي لا عارف هو عايز إيه ولا الناس عايزه منه  
إيه". وأسأل نفسي: لسه عندك أمل تعيش حياة طويلة؟ طب حضرت  
نفسك لرحلتك الأخيرة؟ لو نفسك تلحقك مكان في الصفوف الأولى يبقى  
لازم تشتغل من دلوقتي. بس ما هو بعد كدا بترجع تشتكي لو ربنا منعك من  
شهواتك عشان خايف عليك، النبي قال مرة: "اللي ربنا يحبه يحميه من  
الدنيا"، وانت بتشتكي لو حاك، ومش عايزه يخلي باله منك، وانت ملكش  
غيره، المفروض تروحله، مش تهرب منه. يارب يا اللي انت ما بتحتجش  
لحد والكل ليك محتاج، ومحدث له غنى عنك، ارحمني. لما جبريل سأل سيدنا  
إبراهيم: "مش محتاج حاجة؟" قاله: "مش منك انت، من ربنا". ويقول  
لنفسه: انت اللي محتاج تطيعه وتسمع كلامه، سيب نفسك ليه عشان  
نرتاح، هو مقلب القلوب وكل شيء في إيدِه:

ليه تقسى على اللي مهما عملت بيحبوك،

واللي لو نسيتهم، هما يفتكروك،

واللي مهما بعدت عنهم عمرهم ما سابوك؟

يعني تبعد عن اللي لو نسيته ونسيت ذكره، وما نفذتش أوامره،  
ومعملتش اللي يرضيه، دايمًا هيفضل باباه مفتحك لأنه قال: "وإذا سألك

عبادي عني فإنني قريب ؟" يعني ربنا أول ما ينولك اللي نفسك فيه تسييه وتمشي: " وإذا أنعمنا على الانسان أعرض ونأى بجانبه ". ولما ربنا يسألك: " انت باللي الغلط راكبك من ساسك لراسك، إيه اللي مفرعك ومخليك تفتكر إني هصبر عليك؟ " ، فترد وتقول ' حلمك وصبرك عليا يا رب " ، ويرد عليك ربنا: " لولا صبري عليك، لكنت بعتلك أصغر حشرة تعذبك لغاية لما ترجعلي نادم " .

يا دنيا الحقيني وخدي بإيدي قبل ما من كتر عشقي أغرق في البحر

أنا عبدك، فخليكي زي الناس اللي لما ترضى عن عبدها تحرره من الأسر

كان فيه واحد في بغداد راسه كبيرة وودانه عاملة زي ودان الفيل اسمه " فاذوه " . الراجل دا ما سبش معصية إلا وعملها، فالناس تقوله: " يا فاذوه توب لربنا " ، فيقولهم: " وانتو تدخلوا ليه بيني وبين ربنا، هو ربنا اللي بيقبل التوبة ولا انتو؟ " . المهم، الراجل دا كان ما شي في يوم في شارع أوله واسع، وآخره ضيق أوي، في اللحظة اللي كان ما شي فيها في آخر الشارع، كان فيه واحدة ست بتناول جارتها إيد هون، ففلت منها ووقع على دماغ فاذوه هرسه، وبقت دماغه عاملة زي الهريسة، ومات قبل ما يلحق يتوب لربنا، وبقي الناس تقول ربنا يكفيننا شر مودة " فاذوه " .

وقال سيدنا جبريل مرة في حديث: " خفت إن " فرعون " يقول الشهادة ويتوب، فخذت حنة من طين البحر وحدفتها في وشه عشان يتلهي ومايقولش الشهادة " . بس أنا بصراحة مستغرب من تصرف جبريل دا عشان اتصرف من دماغه ومنع " فرعون " من التوبة لو كان عايز يتوب .

(٦)

## تصليح صورته قدام "المعري"

وصلني إن أستاذي ومولاي الشيخ المعري، لما حكوله عني قال: "سمعت عنه قبل كذا، مش دا اللي هجا ابن صاحبه الوزير والشاعر والسياسي "أبو القاسم المغربي"؟" وأنا خايف لتفهمني غلط وتأخذ عني فكرة إني راجل شرير وبشتم في الناس الطيبة، عشان كذا أنا هحكيلك الموضوع من طقطق لسلامو عليكو.

أنا كنت في حلب بدرس عند أستاذ النحو السيد "أبو عبد الله ابن خالويه"، الله يرحمه، وكنت بروح أقعد ساعات مع الوزير "أبو الحسن المغربي" أبو "أبو القاسم". لما مات "ابن خالويه" سافرت بغداد وقعدت في بيت أستاذ النحو "أبو علي الفارسي" وفي نفس الوقت درست عند علما ء كتبر زي "السيرافي"، و"الرماني"، و"المرزباني"، و"الكتاني"، و"ابن مجاهد". وكتبت هناك حديث الرسول صلى الله عليه وسلم، لغاية لما تعبت من كثر التعليم، فرحت على مصر، وهناك قابلت صاحبي "أبو الحسن المغربي" ثاني وفضلت ملازمه زي ضله، وهو بصراحة كان

بيعاملني زي الإخوات وأحسن . في يوم قالي سر ، قالي : ' أنا خايف على ' أبو القاسم ' ابني ، خايف عليه لطمعه يوديه في سكة آخرها وحش ، فلو تقدر تراقبه وتقولي حتى عدد أنفاسه اللي اتنفسها ، يبقى عملتلي جميل عمري ' .

وفي يوم قابلت " أبو القاسم " فقالي :

- الواحد زهق من الحياة المملة دي .
  - حياة إيه اللي مملة ؟ ما انت بتاخذ من أبوك كل سنة ٦ آلاف دينار ، دا غير إن أبوك من أعيان البلد وسمعته زي الفل .
  - بس أنا عايز كل حاجة تبقى ملكي ، كل حاجة ، الخدم والحشم والخيول ، كله ، لكن هما بيعاملونا زي العيال والنسوان .
- فقلت لأبوه على الحوار دا ، فقالي : " ياخوفي ليكون الدم هو آخرة طريقه " . فعرف " أبو القاسم " إني حكيت لأبوه على حوارنا فزعل وبقي بيني وبينه خلاف .

في نفس الوقت اللي كنت فيه في مصر ، كان القائد العام للجيش " الحسين ابن جوهر الصقلي " شرفني بإنني أكون في خدمته . وعرفت وقتها إن الحاكم بأمر الله كان كل ما يقطع راس واحد من الرؤساء الثانيين ، كان بيعتها لـ " الحسين الصقلي " ومعها رساله بتقول : " دي راس عدوي وعدوك " . لما عرفت الحكاية قلت لـ " الحسين " : " بكرة هيجي عليك الدور ، فمتأمنش للزمن " . كان وقت الحج وقتها ، فاستأذنته ورحت على مكة سنة ٣٩٧ هجري ( ١٠٠٧ ميلادي ) ، وقعدت هناك ٥ سنين ورجعت على مصر ، ولما رجعت عرفت إن الحاكم بأمر الله قتل " لحسين " . ساعتها



ولاده جولي في السر عشان عساكر الحاكم بأمر الله كانت مراقبهم،  
لعلهم: "أحسن حاجة نعملها دلوقتى هي إننا نهرب من هنا، أبوكو كان  
ساهر في بغداد وديعة بـ ٥٠٠ ألف دينار، فاهربوا وأنا معاكو" وفعلا  
هربنا، بس بعد كذا وصلني خبر قتلهم في دمشق، وأنا كنت ساعتها في  
طرابلس. رحت أنطاكية، ومنها على "ملطية" في تركيا وقابلت هناك  
"حولة بنت سعد الدولة" فقعدت عندها كام يوم لغاية لما جاني جواب من  
"أبو القاسم المغربي" بيقولي فيه تعالى نتقابل في حته اسمها "ميفارقين"،  
اشهر مدينة في "ديار بكر" في جنوب تركيا. فرحت بس ندمت بعدها رغم  
إن هو قابلني كويس في الأول، بس بعدين قالني:

بقالنا كثير ما شفتناش بعض.

خير، عايز إيه؟

ولا حاجة، عايز ألعنك.

طب ما كنت تلعني في غيابي.

لا، في وشك ليها طعم ثاني أحلى.

وليه أساسا عايز تلعني؟

عشان ما وقفتش في صفى ورحت فتننت عليا عند أبويا.

ويهون عليك تلعني رغم إن أنا وانت اتولدنا في نفس البلد، وأبوك

رباني، وأنا رببت اخواتك؟

ولا يسوى عندي أي حاجة الكلام دا، البلد وأهي أرض وأربع حيطان،

تربية أبويا ليك مجرد حسنة ومنة مننا عليك، وتربيتك لاختواتي كنت

بتاخذ عليها فلوس، مش بالمجان.

كنت عايز أقوله : "عيشتك الكويسة دي بفضل تعب أهلك اللي أخلاقهم وسمعتهم زي الجنيه الذهب" بس خفت ليجن جنونه عليا، وهو أساسا زعله وحش وجنونه غبي، وعلى رأي الشاعر :

جنونك مجنون وهتجيب منين . . . حد يعالج جنون جنونك؟

ولقيته فجأة بيرقص وفكرني بيت الشعر اللي يقول :

دا جنونه راكمه عفاريت ، وإن كان حتى العفاريت أعقل منه

وهنروح بعيدليه ، ما هو مرة قالي :

- أنا عايز أجمع أوصاف الشمعة السبعة في بيت واحد ومش عارف .

- أنا أعملها لك دلوقتي لو عايز .

- طب ورينا شطارتك .

فخذت القلم وكتبت وهو جانبي :

والشمعة شبهي في حبي وكل اللي بيحصل لي وكل ظروف حياتي

بترفع وبتتحرق وبتختفي ، ووحيدة ، ومصفرة وبتدمع وعينيها سهرانة

ليلاي

فاتغاض وقال لي :

- انت البيت دا كتبه قبل كذا .

- انت اللي مضايقت إنني عندي سرعة بديهية ، وفاكر وكإني عندي علم

بالغيب وعارف إنك في يوم هتسألني السؤال دا . طب انت مش فاكرا لما

أبوك خلاني أنا وانت و "البتّي" و "المحسن" نتسابق على كتابة شعر؟ وقال

اللي هيفوز هيعلق شعره عنده في البيت وأنا اللي فزت وأبولك عجبه سرعة  
بديهتي وجودة الشعر بتاعي، وعلقه عنده في البيت وإداني الجائزة.

"أبو القاسم" كان راجل بيمل بسرعة أوي، وبيشيل في نفسه ويرقد  
للمناس. بس مرة واحد قاللي:

هلى فكرة بقى، انت بقى اللي شخص حقوق، مش "أبو القاسم".  
انت ما تعرفهوش، والله العظيم دا واحد مفيش خير يجي من وراه أبداً.  
كل أفكاره شريرة وعمره ما صان حقوق حد. براوي ومش ودود،  
مغرور وراسه في السما. وأنا مش عايز أصالح واحد زيه، أنا خلاص  
أساساً شلت اسمه من دماغي خالص، وكل اللي كان بينا خلاص راح.  
فيه ناس بنت حلال تفضل معاك مهما حصل، لكن خلاص الواحد  
مفيهوش نفس يقضي اللي باقي من عمره مع ناس زيه.

ورحت قابل للراجل بيتين أعتذرله فيها عن قطع علاقتي بـ"أبو  
القاسم":

أنا لو كنت شفت منه خير... كنت قلت معلىش أهو خير يشيل شر  
وكنت صبرت وقلت ما شي الحال... لو مكنش عنده لا خير ولا شر  
لكن دا كتلة شر مفيهاش خير... ومفيش على كل الأذى دا صبر

وربنا يشهد إن كرهى لـ"أبو القاسم" حي أو ميت كان عشان هو  
سيطر على كل خير الكعبة، ودهبها وفضتها، وحولها دنانير ودراهم  
وسماها "الكعبة"، وكمان عشان سرق "الرملة" اللي في فلسطين من

العرب ، وعشان خرب بغداد . ومش عايز أتكلم عن كمية الدم اللي سالت بسببه ، الستات اللي استحلهم لنفسه ، الستات اللي رملها ، والعيال اللي يتمها .

(٧)

## بیمجد فی "المعري" وبیشکره تانی

أنا آسف يا شيخنا عشان طولت عليك في الموضوع دا، وإن كان أولى بيا  
إني أستغل وقتي في إني أشكرك وأشكر فضلك على كل الناس بأعمالك الرائعة  
اللي بتنور للناس طريقها زي الشمس في النهار والقمر بالليل. انت أعمالك  
المفروض تحفظ وتنخلد زينا زي أي أعمال عظيمة تانية. يعني أنا لما بكتبلك  
سواء شعر ولا نثر، كإني بحط نقطة مية في بحر. انت يا شيخنا عليك أسلوب في  
الكتابة بديع ومفيهوش غلطة، ومريدك بيزيدوا كل يوم أكثر من اللي قبله.

أنا كنت سمعت شوية من رسايلك، ووالله ملقيتلهاش وصف من  
روعتها، ولو وصفتها يبقى ظلمتها. وربنا يشهد أنا اتمزجت وأنا بسمعها  
قد إيه ولا كإني بسمع موسيقى. دي الرسايل مكتوبة بطريقة في غاية  
الجمال، وفوق كل دا يا شيخنا، لا بتنقل من كتب ولا من مراجع، لكن  
كله في ذاكرتك. أنا أعرف علماء كبار، ومنهم النحوي "ابن خالويه"  
نفسه، ما بيكتبوش كلمة غير لما يرجعوا للكتب وللمراجع عشان خافين  
ليغلطوا في أي حاجة.

ربنا يحفظك ويحميك . لكن اللي أنا مستغبرله فعلا ، هي ذاكرتك الحديدية دي . يعني يا شيخنا انت من الناس القليلين اللي ربنا أنعم عليهم بحفظ أسامي رجاله كثير بأسماء أعمالهم وحكايتهم ، دا غير حفظك للشعر . والناس لما تسمع حكاية الحفظ دي تفتكرها حاجة سهلة كدا وإن أي حد يقدر يعملها ، بس محدش يقدر يعمل كدا إلا قليلين أوي .

" أبو علي الصقلي " النحوي قال لي لما كنت في دمشق : " كنت قاعد مع ابن خالويه " النحوي ، ودخل عليه واحد جاييله شوية أسئلة في اللغة من " سيف الدولة " ، فلقيت الرجل اتوتر وقام دخل مكتبته وطلع كتب اللغة ووزعها على اللي قاعدين معاه عشان يدوروا فيها على إجابات للأسئلة " سيف الدولة " . سبته ورحت لأستاذ اللغة " أبو الطيب " وكان برضه قاعد في مجلس علم ، وجاتله نفس الأسئلة من " سيف الدولة " ، وبنفس القلم اللي كان في يده ، قعد يجاوب على الأسئلة فوراً .

" أبو الطيب " نفسه كان بيقول إنه حفظ كتاب " الفصيح " و " إصلاح المنطق " عشان يقرأهم قدام " أبو عمر " ، و " أبو عمر " قال إنه كان بيكتب الملاحظات اللي بيقولها أستاذه " ثعلب " على خزف ، ويقعد عند نهر دجلة ، واللي يحفظه يرميه بعد كدا في النهر .

أما أنا فقضيت نص عمري أتعلم وأحفظ ، والنص الثاني قضيته في اللعب . أصل أنا درست في بغداد وأنا شاب ، وبعدين رحنت على مصر ، وهناك سبت الحبل على الغارب لشهواتي ورغباتي الدنيوية ، وقضيت كل وقتي أستمتع بالحياة ، بعد ما كنت بقضيه في التعليم ، ونسيت إن شرف الإنسان ونبله هو العلم .

يعني زمان كنت بكتب ٥٠ صفحة في اليوم وأقرأ ٢٠٠ ، دلوقتي لو  
 ١٠ ورقة واحدة بس عينيا تهرشني وتوجعني أوي ، ولو قريت ٥ ورقات  
 مريباً تبوظ خالص . وبعدين عدت عليا فترة مكتش حد ، وأنا منهم ، بيهتم  
 لا بالعلم ولا بالتعليم ، لكن بجمع الفلوس ، وبعد ما كانوا يشبهوني  
 بـ "إياس" القاضي في ذكاؤه وعلمه ، بقيت عامل زي "باقل" في كسله .  
 وبقيت لو أحط كتاب على يميني أدور عليه على شمالي . وأنا عايز أشتغل  
 داخل عيش ، بس بقيت معدوم العافية ، ضهري محني ومش قادر أفرد  
 طولِي ، وكل ما أقعد ، مؤخرتي توجعني وكِيفي قاعد على دمل ، ولو  
 سبت كإن كل جسمي اغملى دمايل . لسه معايا حبة فلوس من الثروة اللي  
 عملتها ، ياريتني كنت ألاقي حد ثقة أديله الفلوس اللي باقية ويديني منها  
 اللي يعيشني لغاية لما أموت ويربحني من الحركة ووجع الدماغ ، وأكيد ممكن  
 ألاقي حد أديله الفلوس ، المشكلة إنه مش أكيد هيرجمهالي .

زي الحكاية إياها بتاعة الراحل اللي ساب الجارية بتاعته أمانة عند  
 واحد صاحبه لغاية لما يرجع من السفر . فصاحبه دا قال لواحد ثاني :  
 " الناس خلاص ما بقاش عندهم أمانة ، واحد صاحبي سابلي الجارية بتاعته  
 هلى أساس إنها عذراء ، وجربتها لقيتها مش كذا " .

طب اسمع الحكاية الظريفة دي . كان ليا بنت أخت سرق مني ٨٣  
 دينار ، فهددها السلطان بإنه هيعاقبها ، فرجعت جزء من الفلوس وقالت :  
 " لو أعرف اللي فيها ، كنت قتلت خالي أحسن " .

---

١ واحد مشهور جدا بكسله للدرجة إنه مرة اشترى غزالة بـ ١٠ دينار ، وهو راجع في الطريق ناس  
 قابلوه وسألوه اشتريتها بكام ، وعشان هو كسلان حتى يتكلم ، فتح إيديه الاتنين وطلع لسانه  
 برة ، فهربت منه الغزالة .

والله يا شيخنا لولا عجزني وضعفي كنت سافرتلك، واتشرفت بمقابلتك والقعاد معاك، وسمعت محاضراتك، وإن كانت الذاكرة مش مساعداني خلاص إنني أحفظ أي حاجة واستولى النسيان عليها، وقلبي بقى مشغول بالهموم والأحزان. وأنا بشتكي لربنا مش منه، وماينفعش أساسا ولا هو من الحكمة إنني أشتكى اللي بيرحم للى ما بيرحمش. وكان الصوفي 'أبو بكر الشبلي' بيقول: "مش هتلاقي حد غير ربنا، ولا هتلاقي خير غير عند ربنا" وقال كمان في يوم: "يا جواد" وبعدين سكت كدا، وقعد يفكر شوية وبعدين قال: "إيه الوقاحة اللي أنا فيها دي، إزاي تجيني الجرأة أناديك باسم بينادوا بيه عبادك أحيانا، زي ما قالوا قبل كدا عن عبد ليك:

والله لو مكنش فاضل غير روحه لادهالهم عن طيب خاطر، فياريت اللي  
بيسأله يتقي ربنا فيه

أو زي اللي قالوا فيه:

لو جيت تطلب منه حاجة تلاقيه مبسوط... وكأنك انت اللي ادبتله اللي  
هو عايزه

عشان كدا هقولك: يا رب يا جواد فوق كل جواد، ياللي بكرمك  
انت خليت الناس الكريمة كريمة".

مرة "هارون الرشيد" طلب من الزاهد "ابن السماك" إنه يعظه وينصحه، كان "هارون الرشيد" ساعتها معاه كوز مية في إيده هيشرب منه، فقال "ابن السماك":



استنى يا أمير المؤمنين، تعمل إيه لو ربنا سلط عليك واحد قوي وقالك  
مش هتشرب المية دي إلا لو ادتني نص ملكك؟ كنت هتعمل كدا فعلا؟  
اه، كنت هديله نص ملكي .

مليب اشرب بالهنا والشفاء .

وبعد ما شرب هارون الرشيد ، ' ابن السماك ' قاله :

مليب تعمل إيه يا أمير المؤمنين لو نفس الشخص قالك إنك مش هتخرج  
المية اللي شربتها دي إلا لو ادتني ملكك كله ، كنت هتعمل كدا؟  
اه، كنت هعمل كدا .

مليب انتقي ربنا بقى في مُلك ما يساويش إلا بولة .

(٨)

## بيشتكي من ضعفه وقلته حيلته

وأنا إزاي بس أشتكى من ربنا اللي آواني وأكلني فوق السبعين سنة؟ لما ابلدت، ربنا رزقني بأب وأم في منتهى اللطف والحنية والركة، ولما بقى عندي ١٢ سنة وبقيت يتيم، ربنا تولاني برحمته وعمره ما حرمني من حاجة ولا «وعني ولا عراني»، والذي هو يطعمني ويسقين، وسيدنا إبراهيم كمان قال «أدب: "واذا مرضت فهو يشفين" فنسب المرض لنفسه رغم إن النبي آدم ملهوش يد في المرض، زي ما هو ملهوش يد في حاجات كتير زي النوم والصحيان والضحك والبكا والفرح والحزن والخصوبة والعقم والغنى والفقر. دل دا من ربنا، وربنا مش بيستخدمها كتهديد ولا كعقاب. بس برضه فيه حاجات احنا لينا يد فيها، يعني مثلا محدش يتوقع من واحد بيكتب كتاب إنه هيقوم الصبح بلاقي نفسه بنى بيت، والعكس صحيح، ولو مثلا برضه واحد ايده بترعش، طبعي إنه ميعرفش يتحكم فيها، والعكس صحيح.

كنت مرة في حنة اسمها "تنيس" جنب دمياط في مصر، وكان قاعد فدامي واحد عمال يقرأ قرآن وصوته معيط، فيقول: "يوفون بالنذر ويخافون" ويعيط، ففكرت بيني وبين نفسي إن أنا ش من الناس الكويسة

دي، موعدتش أساسا ربنا بحاجة عشان أوفيهها، عشان كدا ما بخفش، ولو كنت خفت، كنت قضيت حياتي كلها قلقان. ويمكن كان المفروض هو ذا اللي يحصل.

مرة شيخ زاهد بثق فيه قالي: "كنت مع المتصوف أبو بكر الشبلي في بغداد، فشوفنا راجل يشوي خارج من القرن بخروف صغير متحمر ومشوي شبه التمر المستوي، وجنبه كان فيه حلويات شهية أوي، فوقف "أبو بكر" يبصلهم، فقلتلهم يا مولانا خليني أشتري حنة من الخروف وشوية حلويات وعيش، وأنا بيتي قريب، وتشرفني النهاردا وترتاح عندي وتاكل معايا. فقال لي: انت فاكرا أنا نفسي فيهم؟ أنا بس كنت عمال أفكر إن الحيوانات كلها ما بتدخلش النار إلا بعد ما تموت، لكن احنا بندخلها واحنا عايشين".

ودا فكرني ببيت الشعر:

يارب سامح الشيخ العجوز اللي شكله من خوفه من النار بقي من المجانين  
دا طول عمره بيعبد عن الحرام حتى من قبل ما يعقل ويبقى عنده دين

(٩)

## نهاية الجواب

وبكدا تبقى نمت الرسالة والحمد لله على أفضاله ، وألف صلاة على النبي وعلى أهله أحسن الناس كلهم .

يا دوبيك الحبر خلص من هنا وحسيت إن أنا فيا حاجة مش مظبوطة . أنا آسف لو فيه أي خطأ أو غلطة حصلت مني ، والغلط يتصلح ويتغفر لو اللي عمله نيته صادقة فعلا في كدا ويحاول يتفاداه ، وانت عارف إن الكمال لله وحده ، وزبي ما قال " عمر ابن الخطاب " : " يا رب ارحم واغفر اللي بيحاول يوريني عيوب عشان أتفاداه " .

وأنا بطلب منك يا شيخنا ، ربنا يدوم عزك ، إنك ترد على جوابي دا . فعلى الرغم من الأخطاء اللي ممكن تكون فيه لكن أنا حسيت إن الجواب سواء وأنا بجليه على اللي كتبه أو وأنا بسمعه تاني لما قرأه عليا إنه مش بطل . دا كفاية بس إنه اتذكر فيه اسمك واتشرف بذكرك فيه .

والرسالة التي كتبها " الزهرجي " ليا هي السبب إني رحت حلب ،  
ولو رديت عليا ، هنشر جوابك إن شاء الله في حلب وفي مدن ثانية .  
وصلى الله على سيدنا محمد وعلى آله وسلم .

# رسالة الغفران لأبوالعلاء المعري

جبي

بسم الله الرحمن الرحيم

(١)

## بيسلم على ابن القارح

يارب سهلها علينا وأعنا ،

يعلم ربنا اللي من أسماء " الجبر " يعني الملك ، واللي جاي منها اسم  
الملك " جبرائيل " <sup>١</sup> يعني عبد الملك ، إن أنا في بيتي شجرة ميتة لدرجة إن  
منى التعابين مش عابزة تسكن فيها ، ومع ذلك لسه بيطلع منها ورد ،  
والمعجزة دي أكيد من كراماتك يا مولانا الشيخ الجليل ، ربنا يا رب يبعد  
عنك العدوين . وأنا شايل في قلبي حب كبير ليك يا شيخنا - ربنا يعمر بيتك  
ولا حب الحية لعيالها ، اللي مش فارقة معاها بقى إذا كان عيالها سامين  
ولا لأ .

---

<sup>١</sup> كلمة جبرائيل دي عليها حكاية طويلة ، فيه ناس بتقول إنها متقسمة لجبر يعني عبد ، وإيل يعني  
الله فيبقى معناها " عبد الله " وناس ثانية بتقول إن جبر يعني الملك أو الله ، وإيل يعني عبد ، فتبقى  
برضه عبد الله ، ويبدو إن المعري استعمل التفسير الثاني .

والله لو كان قلبي يقدر، كان سافرك يا شيخنا يا ابن القارح،  
ومكنش همه أي تعب ممكن يشوفه. وأنا بحاول دائما أحكمه على قد ما  
أقدر، لكن مفيش فايده. وقلبي بيفرح بذكرك في حضورك أو في غيابك زي  
ما كان الشاعر "سحيم" بيفرح بحبيته "عميرة" أو زي الشاعر "نصيب"  
وحبيته "سعدى".

أنا وصلنتي رسالتك اللي مليانة ببحر حكم ومواعظ، واللي هيقرأها  
أكيد هيستفيد منها عشان بتؤمر بشرع الله وبتعيب على الناس اللي بتمسك  
في الفروع والشكليات وبتسبب الأصل. وأنا بصراحة انبهرت بأسلوبها  
وبجمالها وبطريقة كتابتها الحلوة، والرسائل اللي من النوع دا تشفع للواحد  
وتنفعه، وتقربه عند ربنا وترفعه. ولقيتها بادية بتمجيد الله من واحد بليغ  
وعارف هو بيكتب إيه. وربنا قادر يحول كل حرف من حروفها لنور يبعد  
الكذب عن الناس، وربنا برضه قادر يرحم ويغفر للي كتبها ليوم الدين. أو  
يكن ربنا، سبحانه وتعالى، يخلي سطورها تنقذ الناس من الجحيم وتبقى  
عبارة عن سلال من فضة وذهب تستخدمها ملايكته عشان تطلع له الكلام  
الحلو دا، بدليل الآية: "إليه يصعد الكلم الطيب، والعمل الصالح  
يرفعه". والحكمة الطيبة اللي في رسالتك زي ما تكون هي المقصودة لما ربنا  
قال: "ألم تر كيف ضرب الله مثلا كلمة طيبة كشجرة طيبة أصلها ثابت  
وفرعها في السماء، تؤتي أكلها كل حين بإذن ربها".

ورسالتك مليانة كلام ربنا راضي عنه. أنا حاسس وكإن بسبب  
رسالتك دي، ربنا إن شاء الله غرسلك شجر فواكه حلوة وكل شجرة ضلها  
واسيع وكبير من أول شرق الأرض لغربها. ودي مش زي شجر "ذات



الدواط " اللي كانوا بيعلقوا عليها أسلحتهم ويعبدوها في الجاهلية، حتى  
مالوا مرة للنبي: "ماتعملنا شجرة "ذات النواط" زيهم عثمان نعيمنا"  
ورفضه زي ما قال الشاعر:

ربنا هو اللي بينصرنا على عدوينا . . . بحق ما رفضنا نعبد "ذات النواط"

الشجر بتاعك بإذن الله هيبقى الولدان المخلدون قاعدين زاعمين في  
صلها، ويقولوا: "أحنا والشجر دا هدية من ربنا لابن الفارح"،  
وهفضل هنا لغاية يوم القيامة". وهيبقى عند الشجر دا أنهار من الحارة،  
وبعدي عليها ويسقيها نهر الكوثر، اللي ياخذ منه شربة ما يمشي أبدا،  
وهفضل قاعد هناك مستمتع طول عمره. وكمان أنهار لبن واسعة،  
مبتغيش طعمها أبدا مهما طال الوقت. ومعها أنهار شجرة من نوعية  
فاخرة. خرة ما بتخلصش ومش ممنوعة ولا حرام، لكن زي الحرة اللي  
وصفها الشاعر "علقمة" وقال:

بتشفي المرض والصداع . . . ومتخلص الواحد بتوه ولا يتعب

واللي هيشرب منها هiestخدم كاس ذهب، وأباريق الماظ، من جمالها  
كانت هتخلي الشاعر اللي كان يشرب كثير "أبو الهندي"، الله يرحمه، لو  
شافها بتكسف من نفسه لما قال:

"أبو هندي" عايز يبدل اللبن بنبيت نضيف . . . ومش حمضان وأباريق  
ملفوفة في حرير

ونبقى رقة الإبريق عاملة زي عرايس . . . البحر اللي اتخففت من رعا خطاير

و أبو الهندي رجل مسلم واسمه الحقيقي عبد المؤمن ابن عبد القدوس ، ودول اسمين يستخدموهم المسلمين كثير ، وأنا ما ذكرتش بيتين الشعر بتوع الخمرة دول إلا عشان أنا عارف إن أبو الهندي راجل مثقف وفصيح . بس لو فعلا أبو الهندي بي فهم في الشعر ، المفروض يعرف إن كدا وزن البيت مش مضبوط ، إلا لو كان خلى آخر الأبيات عليها سكون ، يبقى ساعتها ممكن تمشي .

وكمات الشاعر "أبو زيد" لو كان شاف الأباريق دي ، كان حس إنه ما يسواش حاجة ، وكان اتريق على نفسه لما قال :

ورقة الأباريق طويلة كأنها . . . طيور متغطية بقماش كنان أبيض

ومش هتبقى بس أباريق ، لكن أباريق شايلها أباريق ، وأباريق الأولى يعني أباريق عادي ، لكن الثانية يعني جوارى ، عشان زمان كان يقولوا على الجارية إبريق من كتر ما هي بتبرق من الجمال ، وساعات برضه إبريق بتيجي بمعنى سيف عشان بيلمع ، وزى ما قال الشاعر "سعيد ابن مسعدة" :

حتة "إبريق" دلوعة ، طعم ريقها . . . ولا الشهد اللي ممزوج مع النبيت الأحمر  
أو الثاني اللي قال :

انت خدت "الإبريق" وعلقت جعبة السهام . . . عشان تموت واحد كان  
في يوم غني أوي

ولو كان شاف الأباريق دي "علقة" المسكين كان زمانه اتفرع وانجن ، لكن يا عيني هيشوفها فين وهو تلاقيه دلوقتي بيتقلب على الجنين

«ابشريش غير مية مغلية، يا حسرة على "علقمة" واللي زيه، مش هو  
» صه اللي قال :

ابريتهم ولا كانه غزال شارد . . . متغطي بقماش طويل من الكتان

الابريق أبيض وخمرته حمرا . . . وريحته جميلة وبطعم الريحان

نظرة واحدة لأباريق الجنة دي أحسن من كل الدنيا باللي فيها، الدنيا  
اللي بتخدع الناس ودايما بتنزل العالي على جدور رقبتة .

ونفس الحكاية كانت هتحصل لـ "عدي ابن زيد" اللي لو كان شاف  
أباريق الجنة كان اتلهى عن الشرب والصيد، وكان اعترف بنفسه إن كل  
أباريق الخمرة بتاعته وكل اللي شربه وكل صحابه اللي شرب معاهم ما  
يساووش ذرة تراب .

أنا كنت ما شي مرة في مكان اسمه "مدينة السلام" في بغداد، فسمعت  
واحد من اللي بينسخوا الكتب يسأل عن قصيدة لـ "عدي ابن زيد" اللي  
أولها يقول :

حواسي استعجلتني الصبح بدري . . . وقالتلي بعتب: مش هتصحى؟

وشربت خمرة الفجر اللي . . . جابتها لي الجارية في يمينها

والناسخ قال إن "ابن حاجب النعمان" ملقاش أي نسخة من القصيدة  
دي في أي ديوان لـ "عدي" . بعدها بشوية سمعت راجل من "أستراباد" في  
إيران، بيقرا القصيدة دي في ديوان لـ "عدي" مكنش موجود نسخة منه في  
مكتبة دار العلم اللي في بغداد .

أما الشاعر "الأقشير الأسدي" ، فدا حظه أسود ومش هيشوف خير  
في حياته ولحد يوم القيامة ليه قال، وهيندم على اللي قاله يوم ما جلده  
يتهرى في جهنم:

فلوسي وكل ما أملك راح من كتر . . . خبط الكاسات في أبقاق الأباريق  
فبن هو دلوقتي؟ كل حياته ضاعت في الخمارات، لو كان شاف  
أباريق الجنة كان عرف إنه اتضحك عليه وإنه فرح بحاجة ما تفرحش .  
أو الشاعر "إياس ابن الأرت" اللي قال:

وكان أباريق الخمرة بين اللي بيشر بوا . . . وز على حافة المية عاوج راسه  
و"الحجاج" الله يرحمه، اللي عرف يجمع كل حاجة عن الخمرة في بيت  
واحد. فينه دلوقتي لما قال:

قطف على قد ما قدر من العنب . . . وخباها وخمرها سنتين واستني على بال  
ما بقت حمرا، وقوية، ونقية، وساقعة . . . وخلطها بأنقى مية: مية الجبال  
أنهار الجنة هتبقى مليانة على جوانبها كاسات معمولة من جواهر  
وياقوت ملون أصفر وأحمر وأزرق، بيلمعوا لدرجة إن الواحد يحس إنه لو  
لمسه هيتحرق، زي ما قال "الصنوبري":

شكله منور ويلمع لدرجة . . . إنك تخاف لتقرب منه

وبيعوم في الأنهار دي أواني على شكل طيور مختلفة: اللي على شكل  
بجع، واللي على شكل عصفور صغير، واللي على شكل طواويس أو بط،

حبة منهم في المية، وحبة منهم على الشط، ويخرج من مناقيرهم خمرة، رقيقة أوي لدرجة إنك تفتكرها مثل حقيقية، لو داق منها حبة صغيرين الشاعر الخمورجي "أبو نواس" كان بصم بالعشرة إنها أنقى خمرة شربها في حياته. ولو داقها كل الشعرا الجداد والقدام اللي اشتهروا بوصف الخمرة، كان عرفوا وشهدوا. إنهم عمرهم ما داقوا زيتها أبدا، وكانوا أكدوا إنها أحسن من كل أنواع الخمرة بتاعة الدنيا زي "عانة" و"أذرعات"، و"بيت راس"، و"الفلسطية"، و"بصري"، أو حتى الخمرة اللي كان بيخمرها "ابن بجرة" واللي كان شايها لوقت الحج، قبل ما يتحرم على الناس الشرب، زي شهوات كتير ما التحرمت عشان نرضي ربنا. "أبو ذؤيب الهذلي" قال عن حبيته:

حتى لو كان عندها كمية الخمرة اللي عند "ابن بجرة" . . . برضه مكتتش  
هترضى تبل بقي ولو بيق صغير

وأحسن من كل أنواع الخمرة اللي عملوها من أيام سيدنا آدم واللي هيفضلوا يعملوها لغاية يوم القيامة.

أما أنهار العسل اللي في الجنة فمش النحل هو اللي عملها ولا كان مخبئها في شمع العسل. لكن دا ربنا القادر هو اللي قال لها: "كوني"، فكانت، وسبحانه هو القادر على كل شيء. وبإسلام على العسل دا وعلى طعمه! لو أي حد فضل يشرب منه على طول، عمره ما يمرض ولا حتى تطلع له فسفوسة في جسمه والدليل على كدا الآية اللي بتقول: "مثل الجنة التي وعد المتقون فيها أنهار من ماء غير آسن وأنهار من لبن لم يتغير طعمه وأنهار من خمر لذة للشاربين وأنهار من عسل مصفى ولهم فيها من كل

الثمرات". . دا لو كان الشاعر ' النمر ابن تولب العكلي ' قدر يدوق العسل  
دا كان عرف إن عسل الدنيا ، مقارنة بيه ، أمر من الحنظل . مش هو اللي لما  
اتكلم عن حبيته " أم حصن " واللي كان بيعمله عشانها قال كلمة : عيش  
بالعسل والسمنة ؟ الله يرحمه ، مات وهو مسلم ومقلش عن النبي غير حديث  
واحد بس . المهم يعني الشعر اللي ذكر فيه حبيته والعسل هو :

لما الدنيا وصحابي راحوا يناموا . . . جه على بالي خيال " أم حصن "

كنت بجييلها كل اللي نفسها فيه . . . عسل مصفي وعيش بالسمن

وانت يا شيخ ' ابن القارح " أكيد عارف حكاية " خلف الأحمر " اللي  
كان قاعد مع صحابه في مرة وقالهم : تفتكروا لو كان " النمر " شال اسم  
" أم الحصن " وخط بداله مثلا " أم حفص " كان ممكن البيت الثاني يتغير  
إزاي عشان يكون على نفس الوزن ؟ ' صحابه معروفش يردوا عليه ،  
فقالهم : كان ممكن تبقى " عيش بلمص " ، حاجة زي عيش بالكريمة كدا .  
وأنا عمال أفكر البيت الثاني كان هيبقى شكله إيه لو مشينا على كل  
الألفبائية ، فمثلا لو كان اسم حبيبة " النمر " " أم جزء " . ممكن يبقى : عيش  
" بكشاء " ، يعني لحمه مشوية ، أو عيش " بنسء " ، يعني خرة أو طولة  
العمر ، أو اللبن اللي فيه مية كتير ، وفي كل الأحوال المعنى مش هيبوظ لإنه  
ممكن يكون بيدعيها بطولة العمر والعيش عادي ممكن يتعمل بلبن أو  
بخمرة ، حتى فيه ناس كانت بتقول إنهم شافوا ملك الروم بيعمس العيش في  
الخمرة وياكل .

أو " أم حرب " ، ويبقى البيت الثاني : عيش بصرب ، يعني لبن رايب ،

او "أم صمت"، ويبقى: عيش بكمت، يعني تمر،  
 او "أم شت"، ويبقى: عيش بيث، يعني تمر برضه،  
 او "أم ليج"، ويبقى: عيش بدج، يعني كتكوت،  
 او "أم شح"، ويبقى: عيش بمح، يعني صفار البيض،  
 او "أم دخ"، ويبقى عيش بمخ،  
 او "أم سعد" ويبقى عيش بشعد، يعني رطب،  
 او "أم وقذ" ويبقى عيش بشقذ، يعني ابن طير شبه الحمام،  
 او أم عمرو، ويبقى عيش بتمر،  
 او أم كرز، وتبقى عيش برز،  
 او أم ضبس، ويبقى عيش بدبس، حاجة زي العرقي بس مش متخمر،  
 لكن مطبوخ،  
 او أم قرش، ويبقى عيش بورش، ودا نوع من الجبنة،  
 وحرف الصاد اتقال خلاص في "أم حفص"،  
 او أم غرض، ويبقى عيش بفرض، ودا نوع من البلح،  
 او أم لقط، ويبقى عيش بأقط، يعني جبنة،  
 او أم حظ، هي الظاء عموما قليلة أوي بس ممكن نقول: عيش بكظ، يعني  
 عيش بيشبع،  
 او أم طلع، ويبقى عيش بخلع، يعني لحمه،  
 او أم مبغ، ويبقى عيش بصبغ، يعني الغموس أيا كان: زيت أو خل أو  
 مرقة،  
 او أم نخف، ويبقى عيش برخف، ودا نوع من الزبدة،  
 او أم فرق، ويبقى عيش بعرق، يعني العضم اللي متشال منه معظم اللحمه،

أو أم سبك، ويبقى عيش بربك، يعني عيش بالخلطة،  
 أو أم نخل، ويبقى عيش برخل، يعني بنات الخروف،  
 أو أم صرم، ويبقى عيش بطرم، يعني غسل أو ساعات يبجي بمعنى سمنة،  
 وحرف النون انتقال خلاص في "أم حصن"،  
 أو أم دو، ويبقى عيش بجو، يعني جدي،  
 أو أم كره، ويبقى عيش بوره، يعني خرفان تحينة،  
 أو أم شري، ويبقى عيش بأري، يعني غسل.

ولو حبة صغيرين من غسل الجنة اتخلط مع أي حاجة مرة خلقها ربنا  
 على الأرض لبقى كله مسكر وحلو ولا حلاوة القصب، والناس اللي بتزيع  
 قصب كانت هتخسر شغلها، وكانوا الناس هيعملوا الكريمة والحلويات من  
 النباتات المرة.

ولو الدكتور والشاعر "الحارث ابن كلدة" داق غسل الجنة دا، كان  
 عرف إن غسل الدنيا اللي وصفه في شعره، زي الزفت مقارنة بيه، وأنا  
 قصدي على بيتين الشعر اللي قال فيهم:

والله لو جابولي غسل مصفي مخلوط . . . بمية نقية في عز ما أنا عطشان

مش هيقى أحلى من طلتكم البهية . . . بس إزاي نتلاقى وامنى الحلويات؟

حتى الغسل اللي ذكره "أبو ذؤيب الهذلي" مقارنة بغسل الجنة هيقى  
 أمر من المار نفسه، والبيت اللي قصدي عليه هو:

والله العظيم دا انتو . . . أحلى من الغسل



ولو ربنا من على حد إن يروح عند الأنهار دي، كان هيلاقى سمك  
طعمه حلو حلوة مدقش زيتها في عمره، وساعتها كان "المتنبى" هيحتقر  
الهامة اللي خدها وقال فيها :

*الكل حاجة أقدر أوصفها بيها هي . . . سمك بيلعب في بركة غسل*

أنهار الخمرة بتاعة الجنة هيكون فيها سمك من كل الأنواع، بس  
ههكون من ذهب وفضة وأحجار كريمة، بتبرق زي نور الشمس . ولو  
الأم من مد إيده وخدله سمكة منهم هيشرب من بقها ميه حلوة لدرجة إن لو  
مة صغيرين منها وقعوا في أقذر بحر في الدنيا، كان هيحلو طعمه من أعماق  
مة فيه ولغاية أعلى حته في موجه، وكان هيطلع من البحر كله ريحة ولا  
أعلى برفان .

(٢)

## المعري بيتخيل ابن القارح في الجنة

وأنا متخيلك يا "ابن القارح"، لو ربنا إن شاء الله نولك الجنة بعد موتك الحقيقية دي ليه، إنه هيقربك منه مع أدباء تانيين في الجنة، زي: المبرد و"ابن دريد"، و"يونس ابن حبيب الضبي"، و"ابن مسعدة الجاشعي"، لكن بعد ما يحصلهم اللي في الآية اللي بتقول: "ونزعنا ما في صدورهم من غل إخوانا على سرر متقابلين لا يمسه فيها نصب وما هم منها بمخرجين"، فمثلا ساعتها "الشيباني" مش هيكون شايل في نفسه حاجة من "المبرد" ولا كأنهم "مالك" و"عقيل" مع "جذيمة" ملك الحيرة، اللي فضلوا معاه مش ييفارقوه ٤٠ سنة بحالها، رغم إنه مكنش عايز يصاحب حد أبداً ورغم إنه قتلهم في الآخر وندم على كذا. وكمان "سيبويه" مش هيبقى زعلان من "الكسائي"، بعد الموقف اللي "الكسائي" عمله فيه لما الرشيد عزمهم هم الاثنين فـ "الكسائي" طلع "سيبويه" غلطان في حاجة، فأمر "الرشيد" إن "سيبويه" يخرج من البيت وإدى "الكسائي" ١٠ آلاف درهم، فزعل "سيبويه" وقرر إنه ما يدخلش البصرة ثاني أبداً لغاية لما مات فعلا في إيران. و"أبو عبيدة" قلبه هيصفى من "الأصمعي" وهيقوا أكثر من

الإخوات، وهتكمل نعمة ربنا عليهم، "والملائكة يدخلون عليهم من كل باب سلام عليكم بما صبرتم فنعم عقبى الدار"

وشيخنا ابن القارح هيكون بينهم، زي بالظبط ما قال "الأعشى" في القصيدة اللي أولها يقول:

وزعت عليهم عيدان ريجان . . . وقد مثلهم أحلى خمرة مززة ومشبرة  
كل اللي بيتقدملهم يبشربوه . . . والخدامين مستنين من صباعهم طرقة

وهيبقى "أبو عبدة" عمال يحكيلهم عن أمجاد العرب وبطولاتهم، و"الأصمعي" هيقولهم أحسن الأشعار. وتهفهم نفسهم على اللعب، فيرموا الكاسات في أنهار الخمرة وتضربها تيارات أنهار العسل، فتتخط الكاسات في بعضها وتعمل أصوات عالية جدا تقدر تصحي بيها الأموات. وساعتها انت يا شيخنا هتقول: "يا عيني على "الأعشى"، كان نفسي قريش تسيبه في حاله وما تمنعوهوش من إنه يروح للنبي ويسلم. وأنا افتكرته دلوقتي لما الكاسات خبطت في بعض عشان قال في قصيدته:

خمرة باردة ورغوتها بتلمع . . . زي الورد، ويرحتها تشرح القلب  
شوية والكاسات المليانة تفضى . . . والرغوة تهله، رخط في بعض  
وصوتها العالي يسمع، وتقرب . . . من الأباريق، ونصب صب

ولو كان أسلم، كان زمانه بيننا دلوقتي في قعدتنا دي، وكان هيقولنا على أشعاره اللي ليها أوزان غريبة اللي كتبها في الد . الكثيرة، وكان هيحكيلنا عن علاقاته مع شخصيات كتير مشهورة، سواء اللي مدحهم أو هجاهم، واللي حصله في حياة، سواء حلوا أو وحش .

وانت يا شيخنا في الجنة، هتلاقى حاجة شبه اللي بنسميها في الدنيا  
،.ملقة نزهة". هتركب جبل من جمال الجنة مخلوق من الياقوت، والجو  
مدهى لا حر ولا برد، ومعاك إزازة خمرة أصلي، وتفضل تتمشى بالجمل في  
الجهة من غير هدف، ومعاك كمان أكل الخلود. ولما تشوف الجمل بتاعك  
وهو عمال يجري بين جبال من عنبر وريحان، هتقول بعلو صوتك قصيدة  
الأعشى " اللي بتقول:

هاريتني أعرف امتى الجمل بتاعي... يسرع خطوته ويروح "العذيب"  
و"الصبيون"

ونأخذ معانا إزازة خمرة، وعيش... مقبب، وحتة من سمك الحوت  
وساعتها هتسمع صوت يا شيخنا بيقولك:

انت يا عبد ياللي ربنا غفرلك، تعرف مين اللي قال الأبيات دي؟  
أبوة، فيه ناس ثقة قالولي إن الأبيات دي "للأعشى ميمون ابن قيس".  
أنا "الأعشى"، ربنا غفرلي بعد ما كنت على وشك إنني أدخل النار،  
وكنت خايف إن ربنا ما يقبلش توبتي وما يغفرليش.

فانت يا شيخنا هتفرح أوي وهتلتفت وتبصله، فهتلاقى شاب أبيض  
جميل، شيك كذا وباين عليه النعمة، وعينه اللي بتشوف وحش، بقت في  
منتهى الجمال وسواد عينيه اسود جدا وبياض عينيه أبيض جدا، وظهره  
المحني بقى مفروود ومستقيم، فهتسأله:

أحكيلي انت إزاي خلصت من النار وعرفت تهرب من جهنم؟

- حراس جهنم كانوا يبجرونني على جهنم "سقر"، فشفت واحد واحد من نور زي القمر، والناس عمالين ينادوا عليه من كل مكان ويقولوله: "يا محمد، يا محمد، الشفاعة، الشفاعة، احنا عملنا حاجات كويسة وعملنا الشيء الفلاني في الدنيا"، فرحت أنا كمان صرخت وأنا بين أيدي الحراس: "يا محمد، ساعدني، انت واجب عليك تساعدني"، فقال النبي لـ "علي ابن أبو طالب": "روح يا علي" شوفه ليه بيقول إنه واجب عليا أساعده، فجبه "علي" وأنا خلاص بتحدف عشان أتدله في النار، فبعد الحراس عني وقال: "ليه عايز النبي يساعدك؟" قتلته "عشان أنا اللي في الدنيا قلت:

أنا رايح على "يثرب" أقابل النبي... عشان نفسي عايزة ترتاح بين أيديهم فاسمع وصاياهم والحق نفذها قبل... ما تندم، وساعتها هيفيد ندمك بيايه؟  
دا نبي يشوف اللي محدث بيشوفه... وأخباره مسمعة في كل المناطق حواليه

وأنا كمان يا "علي" كنت حتى في فترة الجاهلية بؤمن بالله وبالحساب وبالبعث والدليل على كذا القصيدة اللي قلت فيها:

متفكرش لو راهب بنى لنفسه معبد... وصلى وصرخ ورسم على صدره صليب  
إنه هيبقى أعلى منك يوم الحساب... يوم ما كل الكائنات تبعث وتقابل الحسيب"

فرجع "علي" للنبي عليه الصلاة والسلام، وقاله: "يا رسول الله، دا طلع "أعشى قيس"، وقال لي قصيدته اللي مدحك فيها، واللي شهد فيها إنك نبي". فسأله النبي: "وهو جالي في الدنيا؟"، "علي" قاله: "هو جالك، بس قریش منعتة ورجعته مطرح ما جه، وكمان هو مكشش قادر

، ، الخمرة " . فشفعلي النبي ، ودخلوني الجنة على شرط إني ما أشربش  
، ، فيها . كذا رضا أوي الحمد لله ، وأنا كفاية عليا أنهار العسل واللبن ،  
، ، اللي ما يسبش الخمرة في الدنيا ، ما بيدوقهاش في الآخرة .

ونخلتلك كمان يا شيخنا وانت في الجنة وبتبص حواليك كذا فتلاقي  
، ، من كبار وعالين أوي ، فتقول لنفسك : أنا هروح لغاية هناك عشان  
، ، القصريين دول بتوع مين . فلما تقرب منهم تلاقي واحد منهم  
، ، وب عليه : دا قصر " زهير ابن أبو سلمى المزني " والتاني مكتوب عليه :  
، ، قصر " عبيد ابن الأبرص الأسدي " ، فانت هستغرب أوي وتقول : بس  
، ، ما توا في الجاهلية ، ولكن ربنا رحمته شاملة كل حاجة ، أنا هشوف هم  
، ، وأسألهم دخلوا الجنة إزاي . فتبتدي بـ " زهير " ، فتلاقيه شاب زي  
، ، الوردة المفتحة ، وغني وعنده قصر من اللؤلؤ ، ولا كأنه في يوم من الأيام كان  
، ، محز وكانت حالته وحشة أوي ، ولا كأنه هو اللي قال في قصيدته اللي كلها  
، ، ملص بحرف " الميم " :

، ، هلعت أنا من الدنيا واللي فيها . . . ومن اللي يعيش ٨٠ سنة وما يزهقش ؟  
انت لما هتشوفه مش هتصدق نفسك هتسأله :

انت زهير أبو " كعب " و " بجير " ؟  
أبوة أنا .

انت اتغفرك إزاي رغم إن انت كنت في زمن الناس فيه مهمة  
ومبتعملش حاجة كويسة خالص ؟

أنا مكتتش بحب أي مشي بطلال وكنت يؤمن بالله ، ومرة حلمت بحبل  
نازل من السما ، واللي يتعلق فيه . من أهل الدنيا ينجو ، فعرفت إن دي

حاجة من عند ربنا ، فوصيت عيالي وقتلتهم وأنا بموت خلاص : لو ..  
جه ودعاكم لربنا اسمعوا كلامه ، وأنا متأكد إنني لو كنت لحقت ..  
كنت هبقى من أول المؤمنين ، وأنا قلت في قصيدتي ، رغم كل السفة الـ  
كان ضارب في أهل الجاهلية كلها :

متخبوش اللي جواكم عن ربنا . . . لأن مفيش حاجة ربنا ما يعرفهاش  
ويمكن بحاسبكم بعدين يوم الحساب . . . أو بحاسبكم في الدنيا وماياجلهاش .  
- بس برضه انت اللي قلت :

ياما قعدنا قعدات جبيلة . . . وكانت أيام كلها هنا  
وكل اللي بنعوزه بنلاقه . . . خمرة ونشوة وغنا  
يا ترى خمرة الجنة اتحرمت عليك زي ما حصل مع "الأعشى" ؟  
- لا ، "الأعشى" لحق النبي وكانت الخمرة اتحرمت ، لكن أنا مت في فترة  
كانت الناس بتشرب الخمرة زيها زي أي حاجة تانية ، فمفيش عليا لوم .  
فتعزم عليه ياشيخنا يجي يقعد معاك وتشربولكو كاسين ، فتلاقيه  
راجل ظريف أوي وتقعد تسأله عن أخبار أهل زمان ، ويحبب الولد  
الجرسون إزازة من الزمرد ، مليانة خمرة تحفة مخلوطة بجنزبيل وجنبه كباية مية  
من الجنة ، فتقول : والإزازة دي أحسن بكثير من اللي قاله "السروي" :  
وعندي إزازة وكويابات . . . مليانة نبيت أحمر صافي  
كل ما نشرب منها حبة . . . أرجع أملاها تاني

وبعدين تسبب "زهير" وتروح تشوف "عبيد" اللي برضه بقى خالد  
الحنة، وهتقوله:

سلام عليكم يا عبيد.

وعليكم السلام. تلاقيك عايز تسألني أنا ربنا غفرلي إزاي، ما هو أصل  
الحنة ما بيدخلهاش إلا الأذكيا بس زيك، متلاقيش فيها أغبيا.

أهوه فعلا، عايز أعرف عشان أنا مستغرب ليه ربنا غفرلك، وإزاي  
استحقيت رحته؟

أنا فعلا خلاص كنت في النار، بس أنا لما كنت في الدنيا قلت البيت بتاع:

"أبي يطلب حاجة من الناس ما يدوموش... واللي يطلب من ربنا، ما يردموش

وفضل بيت الشعر دا يتنقل من بق لبق والناس تقوله وتعيد وتزيد فيه،  
كل ما يكرروه أكثر كانت السلاسل بتتفك عني، وفضل كدا يتعاد لغاية لما  
ربنا رحمني وغفرلي.

وانت يا شيخنا أول ما تسمع الكلام اللي قالوه الاتنين دول، تنظمن  
على شعرا تانيين كنت خايف عليهم ليدخلوا النار. وهيسألك "عبيد":

تعرف حاجة عن "عدي ابن زيد العبادي"؟

لا، بس بيته هنا جنبك قريب، هروح أشوفه.

وتقابل فعلا "عدي" وتسأله:

ربنا نجاك إزاي من على الصراط المستقيم رغم إنك كنت مزودها حبتين  
في الدنيا؟



- أنا كنت مسيحي ، واللي يكون تبع أي نبي قبل محمد يبقى ناجي على طول ، مش زي الناس اللي كانت بتعبد الأصنام .
- أنا نفسي أوي أسمع منك قصيدتك الرائعة إياها اللي كانت بتنتهي كلها بحرف الصاد .

فيتدي "عدي" يقول القصيدة اللي مطلعها يقول :

سلملي على صاحبي "عبد هند" . . . وقوله إن لي في قلبي مكان مخصوص  
بعد ما يخلص "عدي" قصيدته هتقوله :

- برافو عليك ، تحفة القصيدة دي . انت عارف إن فيه شاعر اسمه 'أبو بكر ابن دريد' عمل قصيدة على نفس وزن قصيدتك يقول مطلعها :
- اللي بيشتغلوا مبسوطين والبخلا متنكدين . . . القدر مكتوب ، على فين  
تروح يا خلبوص

بس برضه يا "عدي" انت الأحسن لأنك انت قلت قصيدتك الأول .

وتدخلوا انتو الاثنين في حوار طويل في تصريفات نحوية لأشعار  
"عدي" . في الآخر "عدي" يزهد ويقولك :

- بقولك إيه؟ سينا من النحو وتعالى نركبنا حصانين من بتوع الجنة ونطلع نصيد بقر ونعام وغزلان وبقر وحشي ، مفيش أحلى من الصيد .
- لا يا عم ، أنا راجل بتاع قلم وهدوء ، مش بتاع خيل ولا أفهم فيه . أنا جيت بس أهنيك على سلامتك من الجحيم وعلى دخولك الجنة .

وبعدين أعمل إيه أنا لو ركب حصان صحته حلوة حبتين، وطلع يجري  
بيا وهو فرحان بأكل الخيل بتاع الجنة؟ وأبقى زي اللي قالوا عليهم:

••• مره ما ركب خيل غير بعد ما كبر . . . غشيم، وعلى ظهر الحصان تقل

أو يحصل معايا زي ما حصل مع 'جلم ابن عمرو' اللي كان بيحب  
المتجردة مرات 'النعمان ابن المنذر'، لما جوزها أجبره إنه يركب حصانه  
'البحموم' وكان حصان جامح وعفي، فوقعه من على ظهره. أو ابن 'زهير  
ابن أبو سلمى' لما ركب فوق فرسه، اتكعبلت فوقعت ورقبته ورقبتها اتكسروا  
ومانوا. وهنروح بعيد ليه، ما هو ابنك 'علقمة' نفسه، كان طالع مرة في رحلة  
ميد، ومات نفس موة جده 'زيد'، وانت نفسك قلت فيه:

صباح الخير يا علقمة يا ابني . . . ممكن تقعد معايا النهاردا وتمشي؟

أو الحصان يرميني على صخرة زمرد ويكسرلي ضلع من ضلوعي  
وابقى مسخة أهل الجنة.

يا عم انت بتقول إيه بس؟ انت متعرفش إن في الجنة مفيش أي خطورة  
من أي مغامرة، ومفيش أي حد بيمرض أو بيحصله حاجة وحشة؟

فتركبوا فعلا حصانين من الجنة، وتقعدوا على ظهر الحصانين  
مرتاحين لدرجة إنكو لو خيروكم بين كل خير الدنيا، وقعدتكو دلوقتي،  
هتكسب كفة قعدتكو وبفرق كبير كمان. وفجأة تشوفوا قطع بقر وغزلان  
بيرعوا في الجنة، فناخذ سهمك وتقرب أوي من واحد منهم عشان  
نصطاده، ولما تقرب أوي لدرجة إنه ما يقاش بينك وبينه إلا مسافة ضفر  
صباع، يلتفتلك مرة واحدة ويقولك:

- بس، وقف عندك، أنا مش من حيوانات الجنة اللي ربنا خلقها عشانكو، أنا كنت من حيوانات الدنيا، وكنت ماشي في حنة مفيهاش صريخ ابن يومين، فعدي عليا مجموعة من المؤمنين خلص كل الأكل اللي معاهم، فخذوني ودبحوني وكلوني، وقدرنا يكملوا رحلتهم ويوصلوا بالسلامة، فعوضني ربنا وخلاني من الحيوانات الخالدة في الجنة.

فانت تبعد عنه فعلا يا شيخنا، وتروح عند حمار وحشي عشان تصطاده، ولما تبقى قريب منه أوي، يلتفتلك ويقولك:

- استنى عندك يا مؤمن، أنا ربنا أنعم عليا ودخلني الجنة، عشان كان فيه صياد صادني وسلخني وخذ جلدي وباعه، الناس اللي اشتروا جلدي عملوا بيه قربة مية، وبقي العطشان يشرب منها، والعيان يخف بسببها، والناس الصالحة تنظهر بيها. وبركة الناس دي كلها وصلتني ودخلت بسببها الجنة أترزق فيها من غير حساب.

- ماشي، بس لازم تميزوا نفسكم. يعني الحيوانات اللي اتخلقت في الدنيا ما تتخلطش مع الحيوانات اللي اتخلقت في الجنة.

- حاضر، وشكرا على نصيحتك.

وتكملوا تمشية بالخيول، فتلاقوا واحد بيحلب ناقة في جردل دهب، فتسألوه:

- انت مين؟

- أنا "أبو ذؤيب الهذلي".

يا صباح الخير يا "هذلي" ، بس فيه حد برضه يحلب ناقة رغم كل  
أنهار اللبن اللي موجودة في الجنة دي؟ انت اتجننت ولا إيه؟

هادي، مزاجي إني أحلب زي ما مزاجكو إنكو تصطادوا في الجنة . أصل  
أنا من شوية افتكرت شعر ليا كنت بقوله في الدنيا بيقول :

كلامك ، لو تعرفني ، زي العسل . . . المخلوط بلبن ناقة لسه والددة

فرنا فوراً بعثلي الناقة دي اللي لسه والددة ، ومليانة خير ، وقمت  
أحلبها ، ولما أخلص ، هخلط لبنها مع أحلى عسل في الجنة .

بعد ما يملا الجردل على آخره ، ربنا هيعتله خلية نحل معمولة من  
الأحجار الكريمة ، ونخلها مص رحيق أحلى زهر ، فياخذ "أبو ذؤيب" من  
العسل دا ويخلطه مع اللبن ، ويعزم عليكم تشربوا . فتشربوا بنهم شديد من  
هلاوة طعمه ، اللي لو فرقوا شوية منه على الناس اللي اتحكم عليهم بحجيم  
"سقر" ، كانوا عرفوا يعني إيه طعم الخلود . ويتأثر "عدي" ويقول :  
"الحمد لله الذي هدانا لهذا وما كنا لنهتدي لولا أن هدانا الله . لقد جاءت  
رسل ربنا بالحق ونودوا أن تلکم الجنة أورثتموها بما كنتم تعملون" .

وتبص لـ "عدي" وتقوله :

كان فيه بيتين شعر ليك ، كان نفسي لو كنت تراجع نفسك وانت  
بتقولهم ، الأولاني كنت بتوصف فيه خيلك ، بس وصفك كان للحمير  
مش للخيل ، والثاني غلطت فيه غلطة نحوية جامدة .

ن- يا راكـل، بتكـيب ليه في سيرة الحاكات دي دلوقتي وانت ربنا رزقك بالكـنة الحمد لله، المفروض تعمل زي الآية اللي بتقول: "كلو واشربوا هنيئاً بما كنتم تعملون".

وهو هيقبللك الجيم كاف، عشان اليمينين عندهم لهجة مش ولا بد بيقبلوا فيها الجيم كاف. زي 'الحارث الكندي' لما كان بينادي "حجر ابن عدي" فكان بيقوله "حكر ابن عدي". المهم إن انت هترد على "عدي" وتقوله:

- أنا طلبت من ربنا إنه ميحرمنيش في الجنة من التمتع بالأدب زي ما كنت بتمتع بيه في الدنيا، وربنا استجاب، "وله الحمد في السموات والأرض وعشياً وحين تظهرون".

وتكمل مشي بالخیل فتلاقي ولدين واقفين بيتكلموا مع بعض وكل واحد واقف قدام باب قصر معمول من الأحجار الكريمة، وشكلهم في أحسن حال وصحتهم تمام، فتسلم عليهم وتسألهم:

- انتو مين؟

- احنا النابغتين: "النابغة الجعدي" و"النابغة الذبياني".

- طب "النابغة الجعدي" دخلت الجنة عشان كان حنيفي، لكن 'النابغة الذبياني' دخلت الجنة إزاي؟

- أنا كنت مؤمن بالله وحتى رحت حجيت بيته أيام الجاهلية، مسمعتش الشعر بتاعي اللي قلت فيه:

« مائة الكعبة اللي زرتها كثير . . . ودم الأضاحى اللي ساح عند التماثيل  
وحياة الحمام اللي بيظير متظمن . . . بين الحجاج الماشيين بين " السند »  
و " الغيل " (اسم ينبوعين مية)

وأنا برضه اللي قلت :

أحلفلك عشان ميقاش لسه عندك شك . . . وإن كان اللي عنده دين ما  
يقاش عنده ذنب

أحلفلك بالجمال اللي ماشية بسرعة ترعى . . . ومن آبار مكة المقدسة  
بيشربوا شرب

وبعدين أنا ملحقتش النبي ورسالته عشان ربنا يحاسبني على إيماني  
، و غير كذا ربنا رحيم جدا ويمكن يسامح أعظم غلطة عملتها في حياتك  
بسبب حاجة كويسة صغيرة جدا عملتها .

هتتادي ساعتها على " عدي ابن زيد " ، " النابغة الذبياني " ، و " النابغة  
المعدي " وتقولهم يحوا يتسلوا معاك شوية زي ما قال ' عدي ابن زيد ' :

يا قلبي جسمي تعب وأنا مش عايز . . . أعمل حاجة دلوقتي غير إني أسمع  
أغاني

وأشرب الخمرة اللي جاتلي من إيران . . . لو داقها شيخ هيغني ويرقص  
على الأغاني

أولما قال برضه :

كلام جميل يسمعه الشيخ بمزاج . . . كلام له طعم العسل المصفي

وهتقولهم إن القعدة الحلوة دي ناقصها "الأعشى" . تطلع حروف آخر كلمة من بقك من هنا ، وتلاقي "الأعشى" في وسطكو من هنا ، فتحمدوا ربنا وتشكروه إنه جمعكم مع بعض وتقول الآية بتاعة : " وَهُوَ عَلَى جَمْعِهِمْ إِذَا يَشَاءُ قَدِيرٌ " (الشورى ٢٩) . وبعد ما تكلوا وتشربوا من نعم الجنة أَلَيْ رَبَّنَا عَمَلُهَا مَخْصُوصٌ لِلْمُؤْمِنِينَ وَتَبَسَّطُوا ، هتسأل "النابعة الذبياني" :

- يا ذبياني أنا اللي أعرفه عنك إنك راجل ذكي وديلو ماسي ، إزاي قدرت تقول في مرات "النعمان ابن منذر" ، ملك الحيرة :

نعمان قال إن شفايفها باردة وحلوة . . . وكل ما تدقها تبقى عايز كمان  
نعمان قال ، وأنا معرفش لإنني مدقشش . . . بنفسي : إن ريقها زي المية  
للعطشان

وفضلت تكمل كلام عن مراته لحد ما الناس لاحظوا وقالولك إنك زودتها أوي .

- ظلموني والله ، ولو كانوا فهموا اللي كنت أقصده ، كانوا عرفوا إن أنا راجل متطلعش العيبة من بقي . الحكاية وما فيها إن "النعمان ابن منذر" كان بيعشق مراته ، وطلب مني إني أكتب فيها قصيدة ، فقعدت أفكر وأقول لنفسي : لو ذكرتها بشكل عام ، الناس ممكن تفهم إني بتكلم عن ست تانية ، ولو ذكرت اسمها في القصيدة ، هتبقى عيبة في حق الملك . عشان كذا كتبت قصيدة كأن الملك هو اللي يقولها .

- فعلا ظلمناك ، وحققك عليا . أنا بس كان نفسي أشوف دلوقتي " المازني " و " الشيباني " و " أبو عبيدة " و " الأصمعي " ، اللي نقلوا عنك القصيدة ووصلوها للناس بمعنى غلط ، وكنت هكلمهم قدامك عشان تعرف إنني مبخفش من حد في الحق .

بمجرد ما تنطق اسمهم تلاقي الأربعة مجموعين عندك بقدره قادر ، وبسلموا عليكو بلطف ، وهتسأل :

مين دول ؟

- إحنا الأربعة اللي انت ذكرتهم من شوية وكنت عايز تشوفهم .  
- طيب انتو فهمتوا القصيدة على أساس إن " الذبياني " هو اللي بيتكلم ولا " النعمان " ؟

- " الذبياني " .

- لكن " الذبياني " هنا معناها ويقول إنه كان يقصد " النعمان " . طيب قولنا رأيك يا " نابغة " في قصيدتك اللي قلت فيها :

تعالوا معايا في الربيع في الجنينة . . . اللي " المتجردة " قاعدة فيها

جلدها مسك وإيديها متحنية . . . قمر هي والياقوت مغطياها

شفافها اللي مجربتهاش . . . غسل رايق ومخلوط بمية

يستمتع بيها النعمان ، هدية من ربنا . . . متجددة ، وعندها بدل الشخصية مية

- والله أنا مش فاكر إن أنا قلت الكلام دا قبل كدا .

- إيه دا ؟ بجد ؟ ومين أمال اللي اتطوع من نفسه كدا ونسبها لك ؟



- معتقدش إنهم نسبوهالي على سبيل التطوع على قد ما يمكن عملوا كذا  
من باب الفتى أو غلطوا. تلاقىها لراجل من قبيلة "ثعلبة ابن سعد".

يرد "نابغة بني جعدة" على "الذبياني" ويقول:

- أنا فعلا مرة كنت ما شي مع شاب في الجاهلية رايحين على "الحيرة"،  
فقالى القصيدة دي وقالى إن هو اللي ألفها، وقال إن هو من قبيلة  
"ثعلبة ابن عكابة"، لكن فيه ناس شموا خبر ووقعوا بينه وبين الملك  
قبل ما يوصل، فرجع مطرح ما جه ومقلش القصيدة.

- شفتوا بقى إنه كان عندي حق.

ساعتها هتلفت 'لنابغة الجعدي' وهتقوله:

- ما تقولنا قصيدتك إياها اللي بتنتهي كل أبياتها بحرف الشين.  
- أنا عمري ما قلت قصيدة بتنتهي بالشين. غير كذا، القصيدة اللي انت  
تقصدها دي فيها كلمات ولا عمري سمعتها قبل كذا أساساً.

- يظهر يا أبو ليلي (النابغة الجعدي) إن طولة قعادك في الجنة والشرب  
والأكل اللي يجننوا واللي عمرك ما دقت زيهم خليتك تنسى كل اللي  
تعرفه. ومش بلومك، ما هو أصل "إن أصحاب الجنة اليوم في شغل  
فاكهون، هم وأزواجهم في ظلال على الأرائك متكئون، لهم فيها فاكهة  
ولهم ما يدعون".

طب إنت في بيت الشعر اللي قلته بتاع:

مش معروف عتنا إننا نرجعها سليمة... ومش غريب (مستكرا) علينا إننا  
نرجعها مجروحة

انت قلت 'مستنكراً' بتنوين فتحة ولا تنوين كسرة؟

تنوين فتحة طبعاً .

طلب إليه قولك لو حد قالها بتنوين كسرة؟

أبهله وأقول عنه إنه ما يفهمش حاجة .

الله يرحمه بقى "سيبويه" ، هو غلط وقالها بتنوين كسرة ، وانت الأصح  
عشان انت يا "أبو ليلي" أفصح منه لإنك معجون في اللغة من صغرك ،  
وانعرفت على ثقافة الجاهلية والإسلام سوا .

وبعدين تبص "للأعشى" وتقوله : ما تسمعنا قصيدتك اللي مطلعها  
القول :

ياريتني أموت بين حبات الرمل . . . في مكان مش ساكنه حد

فرد عليك الأعشى ويقولك : ولا أعرف أي حاجة عن القصيدة دي ،  
الت اللي شكلك بقيت متخصص في القصائد المتألفة والمنسوبة لناس تانية .

هيمر عليكم شوية وز من الجنة ، وهيقف عندك كأنه مستني أمر  
معين ، وعشان وز الجنة يسمع ويتكلم فتهقولهم :

- ما لكو واقفين كدا ليه؟

- ربنا بعتنا عشان نعني لكو ونظبط مزاجكو مع الشرب .

- طيب يلا على بركة الله ، ورونا شطارتكم .

الوز فجأة هيتحول لجواري صدرها ناهد ومشدود ، لابسين جلابيات  
حلوة ، وشايلين في أيديهم كل الآلات الموسيقية اللازمة ولا كأنهم أحسن

عارفين في الجنة. فانت يا شيخنا تستغرب أوي من المنظر دا، وإن كنت طامئاً  
مؤمن بقدره ربنا على كل حاجة، وتسال واحدة منهم وتختبرها: " طـ  
سمعينا كدا حاجة لـ "النابعة الذبياني" .

فتغنيلكو قصيدة ليه، بصوت في منتهى الرقة والسلاسة لدرجة إن لم  
كان اللي قاعدين صنم كانوا نطقوا ورقصوا من حلاوة صوتها. انت تنبه  
بيها وتقولها: " طيب سمعينا حاجة ثانية وغيري نوع الموسيقى " .

الجارية هتغني وتعزف اللي انت عايزه بشكل يخلي حتى " الغريض"  
المطرب لو كان موجود يعترف إن ما يقدرش يغني أحسن منها. وانت  
هتتعد تطلب منها تعملك لحن ورا الثاني لغاية لما تعزفلك كل الأخان  
المعروفة وانت تتسلطن أوي منها. ولما تتأكد تمام إنها أستاذة على العود،  
هتهلل وتكبر ربنا وتحمده على نعمه وتهقولها:

- يالهوي عليكى، انت مش كنتي من حبة صغيرين بس وزه بتطير، إزاي  
عرفتي تعزفي وتغني بالشكل المبهر دا؟ والله دا انتي حتى لو كنتي اتولدني  
بين أحسن المطربين، مكتتش تبقى بالإبداع دا.

- هو انت لسه شفت حاجة من قدرة ربنا، دا انت كأنك واقف على الشط  
وقدامك لسه محيط معرفة كبير تعوم فيه. وسبحان من يحبي العظام وهي  
رميم.

وفي عز ما انتو قاعدين تتكلموا، هيعدي عليكم شاب في إيدو عصاية  
من الياقوت، ويسلم عليكو فتسأله:

انت مين؟

أنا "لبيد ابن ربيعة ابن كلاب" .

ما شاء الله ، نسب يشرف ، وإن كان مفيش مشاكل لو كنت قلت اسمك الأول بس . المهم ، إيه أخبارك في الجنة؟

أنا الحمد لله عايش عيشة فوق الوصف ، ولا بكبر في السن ولا بمرض أبداً .

سبحان الله ، كأنك مقلتش في الدنيا :

أنا زهقت من الحياة وطولها . . . ومن سؤال الناس : "لبيد" عامل إيه؟

أو كأنك مش انت اللي قلت :

امنئ أموت بقى؟ وأنا مبخفش . . . أنا عشت كثير وكفاية أوي كدا

أنا زهقت من الدنيا اللي ما بتخلصش . . . ومين في الدنيا يستحمل كدا؟

طب ما تقولنا قصيدتك اللي بتنتهي كلها بحرف الميم .

لا يا عم ملياش فيه ، أنا سبت الشعر في الدنيا ، ومش هرجعله في الآخرة ، وربنا عوضني عنه اللي أحسن منه .

طيب أنت كنت تقصد إيه في البيت اللي بيقول :

لو معجبنيش أي مكان أسيه . . . إلا لو الموت منعنا من كدا

"منعنا" دي عايذة على الناس كلها؟

- لأ ، عليا أنا بس ، زي مثلا لما تقول لشخص : "لو محتاج فلوس ،

نسلفك" ، معناها إن انت اللي هتسلفه .

- طيب انت كان قصدك " المكان اللي ميعجبنيش أسيه إلا لو الموت قبـد رـوحي " ولا " لو المكان معجبنيش يارب الموت يجي يقبض رـوحي ؟ "
- أقصد التفسير الأول .
- طيب ، ربنا يكرمك .

هتسأله في مواضيع ثانية كانت شغلاك ، بس " لبيد " هيبس لـ " الأعشى " ويقولـه :

- يا سبحان الله ! ربنا غفر لك بعد كل اللي عملته في الدنيا ودخلت الجنة ؟
- فهترد إنت يا شيخنا عليه وتقولـه :

- انت قصدك على الكام بيت اللي الأعشى اتكلم فيهم عن إنه شرب خـرة وزنى ؟ والله ممكن يكون معملش أي حاجة من اللي قاله في قصايدـه وتكون فشخرة كدابة ، أو ممكن يكون حقيقة ، في الحالتين ربنا ساعـه ودخله الجنة . ما هو ربنا قال : " قل يا عبادي الذين أسرفوا على أنفسهم لاتقنطوا من رحمة الله إن الله يغفر الذنوب جميعا إنه هو الغفور الرحيم " وهو برضه اللي قال : " إن الله لا يغفر أن يشرك به ويغفر ما دون ذلك لمن يشاء ومن يشرك بالله فقد ضل ضلالا بعيدا . "

وانت يا شيخنا هتقول " للنايغة الجعدي " :

- عارف يا أبو ليلي ، أنا بحب أوي القصيدة بتاعتك اللي وصفت فيها واحدة ست بأحلى الأوصاف وأجل العبارات ، بس برضه ستات الدنيا ما يجوش حاجة جنب بنات الجنة الحلويـن دول .

وفجأة يخطر على بالك يا شيخنا، يا رب دائما كذا كل الناس تحبك،  
موت مغنيات القاهرة وهما ييغنون في العراق القصيدة بتاعة الشاعر "المخبل"  
السدي اللي بتنتهي كلها بالميم، فيجروا فجأة الحوريات اللي كانوا من  
الوجه حبة وز، ويغنون الأغنية اللي خطرت في بالك اللي بتقول:

ماهو سيرة رباب حبييتي، وسيرتها تعب . . . والراحة للعاشقين مجرد كلام  
ولو مر خيالها عليا، أبكي، ودموعي تبقى . . . لؤلؤ في خيط من غير نظام  
وما يمرش عليكو حرف ولا حركة، إلا وانتو في منتهى الانبساط  
والمرح. لو قارنتو سعادتكو لحظتها بكل السعادة اللي حسوا بيها البشر من  
أول خلق آدم لغاية يوم القيامة، يبقى كأنكو بتقارنوا محيط مية بدموع طفل،  
أو جبل عالي بذرة تراب.

ونقول لصحابك: "طيب سمعتوا الأبيات لنفس الشاعر اللي بتقول: "

بتلومني ومش عارفة إن . . . بكرة معندهاش عنه خبر  
بتقولني إن الغنى خلود . . . وإن الآخرة بيقربها الفقر والعلم  
قولتلها والله لو طلعت على . . . أعلى جبل، أحاول فيه أعتصم  
هيدور عليا الموت ويحييني . . . ومفيش مهرب من حكم ربنا المتقم

وتكمل كلامك وتقولهم: "والشاعر "مخبل السعدي" قال الكلام دا  
الزمن الناس فيه كانت ماسكة الشوك بإيديها، الأم خايفة على ضناها من  
الموت، ومرعوبة عليه، والناس بقت بتخاف من الفقر وبتتقي شره، ويقوا  
بحبوا الفلوس وبيتهافتوا عليها، والناس الجوع والعطش راكلهم، حافين

وجلدتهم شقق ، والجنة لولا رحمة ربنا وعفوه عن الناس كانت هتبه  
فاضية ، وسبحانه لما قال : " الحمد لله الذي أذهب عنا الحزن إن ربنا لغنم  
شكور الذي أحلنا دار المقامة من فضله لا يمسنا فيها نصب ولا يمسنا فيها  
لغوب " . سبحانه اللي حول المغنيات دول من وز لحوريات ، وخلاهم  
بحكمته وعلمه يحفظوا كل الأشعار والأغاني دي اللي عمرهم ما سمعوها  
قبل كدا ، وخلاهم يبدعوا في الغنا والموسيقى من غير أي غلطة ، رغم إنه  
الدنيا كان عشان واحدة جارية تحفظ بيت ولا اتنين من الشعر تاخذلها شهر ،  
وتقبض انشيء الفلاني .

" النابغة الجعدي " وهو قاعد بيسمكك هيقول :

- ألا بالحق يا "أعشى" ، هي رباب اللي ذكرها "السعدي" هي نفسها  
رباب اللي انت ذكرتها لما قلت :

أول ما الديك إدن . . . مليت لـ "رباب" الكاس

- جرى إيه يا "جعدي" ؟ شكلك تقلت أوي في الشرب في الدنيا ودماغك  
خفت وشكلها لسه خفيفة لغاية دلوقتي . هو انت ما تعرفش إن الستات  
اللي اسمهم رباب أكثر من الهم على القلب ، ما فاضلش غير إنك تقول  
إن رباب إياها ، هي نفسها اللي قال فيها الشاعر :

ما لهم أهلك يا "رباب" ؟ . . . عنيهم ضاقت من الغضب

أو تكونش هي نفسها اللي ذكرها "امرؤ القيس" لما قال :

قبل ما يقع القدر ، سبت بيت لـ "هند" ، ولـ "رباب" ، و"فرتنى" ، و"لميس"

انت بتكلمني أنا بالطريقة دي يا صايع يا ضايع ياللي مت وانت كافر ،  
وشهدت على نفسك إنك عملت الحرام؟ على الأقل ، أنا شفت النبي  
وسمعت القصيدة اللي كتبتها فيه اللي بتقول : " مسكنا السما في إيدينا ،  
وهدنا في العالي . . . بس لسه عايزين أكثر ، ونبقى في العلالى " ، فالنبي  
قالى : " في العلالى فين يا " أبو ليلى " ، فقلتله : " في الجنة معاك وبيك يا  
سى " ، فقاللى : " يسمع من بقك ربنا " .

اوعمى تكون افكرت نفسك حاجة عشان شوية جهلة قالوا عنك إنك  
احسن أربع شعرا . دا كذب . أنا نفسي في الشعر أطول منك وبعرف  
امعرف أحسن منك ، وكتبت أبيات شعر أكثر من أي شاعر عربي كتب  
الهمي . وانت كنت كل اللي بتعمله إنك تتكلم بالباطل وتفتري على أهلك  
الأماضل النبلا ، وحتى لو كنت بتقول الصدق ، كان المفروض تتكسف على  
ملك من اللي كنت بتكتبه . وعملت خير مراتك إنها اتطلقت منك ، سابت  
اللب ملوش غير في الرمرة على بواقى الأكل المقرف بتاع الملوك .

انت بتهرتل تقول إيه؟ دا بيت واحد بس من أبيات شعري بمية من بتوعك .  
مش بكثرة الكتابة هي على فكرة ، كل كلامك فاضي ورغي فارغ . شكلك  
نسبت إن أنا من قبيلة " ربيعة الفرس " وانت من " بني جعدة " اللي مشهورة  
بالجن والهروب . بقى بتعايرني بإنى بمدح الملوك؟ دا قصر ديل يا أزعر ، انت  
لو كنت تقدر تكتب زبي للملوك كنت بيعت أهلك وعيالك عشانهم ، لكن  
انت اتخلقت جبان وخرع ، تخاف تطلع من بيتك لو الدنيا ضلمة ، ولو الدنيا  
حر شويتين نفرهد وما نخرجش برة بيتك . وبتكلمني عن طلاقنا أنا



و "هزانية" وانت عارف إنها كانت سعيدة معايا، وعلى كل حال، عادي،  
كل الناس بتطلق، الملوك والعامّة.

- اسكت يا تايه يا ابن التايهة، والله دخولك الجنة دا كان غلطة، بس ربنا  
عايز كدا بقى هنقول إيه. انت حقت تكون في آخر درجات النار،  
ودخلها اللي أحسن منك، ولو كان ينفع إن ربنا يغلط، كنت أكيد  
عرفت إنه غلط لما دخلك الجنة. مش انت اللي قلت:

دخلت عليها لما ناموا الحراس... وكانت هي من غير هدوم  
لعبنا مع بعض لما شبعنا... وبعدين راحت هي في النوم  
فغطست فيها وحسست على بطنها... اللي كانت بأحلى الروايح بتفوح

وبعدين أنت بتستقل بـ "بني جعدة"، دا انت وقبيلتك بكل اللي  
عملتوه متسووش ولا يوم واحد من أيام قبيلتي. وبتكذب وبتقول عليا  
جبان، وأنا أشجع منك ومن اللي خلفوك، وأصبر أكثر منك على ليالي  
الضلمة والبرد، وأستحمل عنك أيام الحر والصهد.

وفجأة ينط "الجعدي" على "الأعشى" ويضربه على راسه بكوز  
دهب، فتدخل انت، ربنا يبارك فيك يا رب، وتقولهم:

- خناقات الشوارعية دي مش في الجنة، دي مكانها الدنيا بين السفلة  
وعديمي الرباية. وانت بصراحة كدا متسرع يا "جعدي". وشكلهم كان  
عندهم حق لما الحاكم جلدك لما اتسرعت ودخلت في خناقة لواحد.  
استنجد بيك وانت متعرفش مين اللي على حق ومين اللي على باطل،  
والحاكم جلدك عشان الرسول قال: "اللي يتصرف تصرفات الجاهلية

مبقاش منّا " . ولولا إن ربنا قال في كتابه الكريم : " لا يصدعون عنها ولا ينزفون " كنت افكرت إن خمرة الجنة لحست دماغك . لكن 'الأعشى' ما يبشربش في الجنة غير لبن وعسل ، عشان ربنا حرم عليه أساسا خمرة الجنة ، وهو راجل وقور ، ويعرف يتصرف كويس وبهدوء في الشدايد . وهو عامل زي أبيات الشعر اللي كتبها "أبو نواس" لما حرمه الخليفة من شرب الخمر :

منلوموش عليا إن بقيت ما بشربش خمرة . . . منعني عنها الخليفة وما  
أقدرش أقول ولا كلمة

أخري دلوقتي إنني بس أشوفه أو أشمه . . . فادوه لغيري ، وأنا هكتفي  
بصحبتكو واللمة

أنا زي اللي مش قادر يجارب بنفسه . . . فبقى يبشجع اللي قادر يجارب  
وعنده همة

فيرد عليك "النابعة الجعدي" ويقولك :

متناس إن في الدنيا كان فيه ناس دماغها بتفوت لما بتشرب لبن ،  
وخاصة المنفسين اللؤما ، زي ما قال الشاعر "الراجز"

ها "ابن هشام" اللب بوظ الناس . . . مش شايف كمية عنفهم بقت عاملة إزاي؟

ومش أهلنا زمان قالوا : خافوا من غضب الناس لو زودوها في شرب

اللبن؟

فانت تدخل تاني عشان تهدي الموقف وتقولهم :

- يا جماعة خدوا بالكو ليعدي ملاك علينا واحنا بتتخاف كدا فيقول لربنا، وما تخلصش الحكاية على خير، هو صحيح ربنا مش محتاج حد يقوله إنه اللي بيحصل في الجنة، بس هي العملية كانت ما شية كدا أيام الدنيا. وإذا كان آدم خرج من الجنة لسبب تافه، فما تستبعدوش إن حد من ولاده يحصل معاه نفس الحاجة. بس قولي يا "أعشى" بصراحة، انت لسه بتحن لشرب الخمرة؟

- لا والله أبدًا، ولا بتيجي على بالي أساسا، وسبحانه اللي صبرني على كدا وخلاني أنساها.

فيقوم "الجمدي" وهو غضبان، فتزعل يا شيخنا، ربنا يبعد عنك أي زعل، ومرضاش إنه يمشي كدا وهو غضبان، فتقوله:

- يا أبو ليلي، ربنا بكرمه وعطفه عملنا حور العين اللي كانوا وز دول، خدلك واحدة منهم البيت معاك، تسمعك أحلى الألحان، وتعزفك أحلى عزف.

فيرد "لبيد ابن ربيعة":

- ما هو لو كل واحد خدله حورية من دول، الموضوع هيتشتر في الجنة، وهيسموننا بعد كدا: "رجالة الوز".

فتنتبهوا فعلا للموضوع دا ومتاخدوش حوريات من حوريات الوز دول.

ويعدي عليكو "حسان ابن ثابت"، فتقولوله:

اهلا يا "أبو عبد الرحمن" ، تعالى أقعد معانا نتكلم شوية . فيقعد معاكو  
لسألوه : فاكر الخمرة إياها اللي قلت عليها وانت شاب :

شفايفها ولا خمرة "بيت راس" . . . مخلوطة بالمية والعسل  
أو بطعم التفاح اللي بيخلي . . . ريحة بقها يتضرب بيه المثل  
، محسفتش إنك تقول الأبيات دي ، في قصيدة بتمدح فيها النبي ؟

لا ، لأن النبي كان عقليته متفتحة ويقبل الكلام دا أكثر ما انتو متخيلين ،  
وبعدين أنا ما قلتش أي كلام وحش ، ومقلتش إنني شربت خمرة ، أو اني  
عملت حاجة حرام ، أنا مجرد وصفت ريق واحدة ست ، ممكن تكون  
الست دي حلاللي ، وممكن أكون بتخيل . وبعدين دا النبي شفع  
"للأعشى" وهو كان عامل بلاوي مسيحة في الدنيا . النبي كان في منتهى  
الطيبة . يعني لما حصل اللي حصل في حكاية "الإفك" وأنا اتكلمت  
وحش في حق مراته ، جلدني أنا و"مسطح" ، بس بعد كدا ساحني  
وإداني "سيرين" أخت "مارية" اللي خلفت منها "عبد الرحمن" وهي  
خالة "إبراهيم" ابن النبي .

وانت يا شيخ ابن القارح ، هيكون نفسك تسأله عن شوية حاجات في  
النحو في قصايدده ، بس هتسكت عشان ما تبوظش القعدة على صحابك .  
واحد من القاعدين هيقول "لحسان" :

بس هو انت ليه الناس قالوا عنك إنك جبان ؟

مين اللي قال كذا؟ دا أنا وأهلي أشجع ناس في العرب كلهم . مش احنا  
اللي وقفنا مع الرسول وساعدناه وحاربنا معاه لما مكنتش فيه حد عايز

يسمع كلامه؟ مش احنا اللي وقفنا في وش سهام قبيلة ' ربيعه  
و "مضر" وكل العرب؟ لو كنت في بعض الأحيان بعمل حسابي قبل ١٠  
أتصرف، فدا كان على سبيل الحرص مش أكثر، زي ما ربنا قال في كتابه  
الكريم: "ومن يولهم يومئذ دبره إلا متحرفا لقتال أو متحيزا إلى فئة فقا  
باء بغضب من الله وماواه جهنم وبئس المصير".

ويتفرقوا الناس اللي كانوا في القعدة دي بعد ما يكونوا قعدوا يتكلموا  
في الجنة قد عمرهم في الدنيا أضعاف مضاعفة.

وأثناء ما انت يا شيخنا بتكمل لف في الجنة، هتلاقي خمس أشخاص  
راكبين خمس جمال، فتقولهم:

- انتو مين؟ ربنا يديم عليكو نعيمه، أنا مشفتش أحلى من عيونكم في  
حياتي.

- احنا "عور قيس" كنا خمس شعراء عينينا عورا، "تميم ابن مقبل  
المجلائي"، "عمرو ابن أحمr الباهلي"، "الشماخ، معقل ابن ضرار  
"، "عبيد ابن الحصين" و "حميد ابن ثور الهلالي".  
فتقول "للشماخ ابن ضرار":

- هو أنا كان عندي شوية استفسارات لكam قصيدة ليك كدا.  
- أنا مش فاكر ولا بيت واحد من قصايدي، نعيم الجنة لهاني عن كل حاجة.  
- عيب عليك يا مؤمن تقول كدا، انت متعرفش إن قصايدك دي كانت  
أنفعلك من بناتك؟ انت بسببهم بقيت مشهور في كل حته. زي قصيدة

للتابغة الذبياني ' كانت أنفعله من بنته 'عقرب' ، دا يمكن حتى بنته  
تكون زودت همومه لما اتخطفت ومعرفش ياخذلها مهر مناسب . ولو  
هايز يا سيدي ، أنا أقولك قصابك كانت بتقول إيه .  
طيب ، سمعني ، ربنا يكرمك .

طيب فاكرا القصيدة اللي مطلعها بيقول : "لوفيت العالم كله . . . زي  
القوس مش هتلاقي مثيل" .

لا والله مش فاكرها . أنا الجنة خدتني عن الدنيا باللي كان فيها . زي ما  
ربنا قال : "إن المتقين في ظلال وعيون وفواكه مما يشتهون كلوا واشربوا  
هنيئا بما كنتم تعملون" . أنا في الدنيا كنت بعمل الحاجات دي بغرض  
إنهم يسلفوني ناقة أسرزق منها مثلا ، أو يدوني أكل يكفي عيالي لمدة  
سنة ، لكن دلوقتي ، بفضل ربنا ، أمد إيدي أخذ اللي أنا عايزه من اللبن ،  
أي نوع من اللبن : جمال ، بقر ، خرفان ، معيز ، ولو عايز لبن من الخرفان  
الجبلي ، هيقى قدامي في ثواني أنهار منه أكبر من "دجلة" و "الفرات" .  
على عكس الدنيا ، كنت أقعد أحلب وأحلب في خروف ، ومكتش  
يطلعلي منه ولا حتى نص كباية .

تخلص كلامك مع "الشماخ" ، فنبص "لعمر و ابن أحر" وتقله :  
تعالى يا "عمرو" انت فين ؟  
أنا هنا أهو .

طيب قولني قصيدتك اللي بتقول حنة منها : "راح الشباب و"العمر"  
راح . . . والأخوات غيرهم الزمن" . كان قصدك إيه بكلمة "عمر" ،  
"السن" ولا اللانمة اللي بتلرزق بين السنان ؟

- كل الطرق تؤدي إلى روما، مثل فارقة كنت أقصد أنهى معنى . أنا  
الرعب اللي شفته يوم القيامة نساني اسمي وكل الشعر اللي قلته، انت  
سمعتش ربنا لما قال: "يوم ترونها تذهل كل مرضعة عما أرضع  
وتضع كل ذات حمل حملها وترى الناس سكارى وما هم بسكارى ولذ  
عذاب الله شديد" . والغريب فعلا بقى إن انت رغم إنك حضرت يوم  
القيامة، لسه فاكرك كل الشعر دأ.

- أنا كنت بدعي ربنا كثير في الدنيا إني بمتعني بالأدب اللي أعرفه في الدنيا  
والجنة، وربنا استجاب لدعايا . عموما، أنا عجبتيك ليك قصيدة كان  
بتقول:

أنا شاب ما بيخفش من حاجة . . . وأنا هنا زينة كل الشباب  
زي ما أكون غصن أخضر . . . في الحرم، ناعم زي التراب  
أوزي ما أكون خمرة "قيل" . . . وكل حاجة عندي بحساب

انت قصدك إيه بـ "قيل" صحيح؟ عشان قيل ممكن تيجي بمعنى  
ملك، أو اسم شخص، زي "قيل ابن عتر"؟  
- المعنيين ينفعوا.

- متياللي انت كان قصدك "قيل ابن عتر" عشان بعد كذا قلت:  
"والجرادتين بتغني عشانهم . . . وفي رقبتهم مرجان وذهب" . وزمان  
قالوا إن كلمة الجرادتين دي كانت أسامي مغنيتين عند "الجرهمي" وغنوا  
لقبيلة "عاد"، اللي كان "قيل" واحد منهم، وهم رايحين يحجوا، لقبيلة  
"عاد" اتهللوا من صوتهم ونسيوا الحج والطواف، ونسيوا حتى هم جم

له، ونسيوا يسألوا ربنا عن اللي عايزينه. فالتدمرت "عاد" وهم مذهولين.

و أنا كنت كمان لقيت قبل كذا في كتاب "الأغاني"، أغنية يقولوا إياها للجرادتين، فاستغربت أوي، ومتهيألي إنها مش بتاعتهم فعلا. أصل الخلام دا كان في عصر هارون الرشيد، فمين بقى قال للناس اللي في عصر هارون، إن دي أغاني الجرادتين؟ وإزاي هم اتأكدوا من كذا؟ مش معقول إهدأ، وأعتقد إن كله كذب.

أولا مش عشان أنا ذكرت الجرادتين يبقى كان قصدي "قيل ابن عتر" حتى وإن كان من ضمن الحجاج اللي غتلهم الجرادتين. ثانيا، مش لازم يكون موضوع الهارون كذب، لأن العرب بقوا بيسموا أي مغنية جرادة، عشان كان مرة زمان كان فيه مغنية اسمها جرادة، زي ما الشاعر قال: "أحنا نشرب والجراد يغنيلنا".

بعد ما تسأل "عمرو ابن أحرر" كام سؤال في الصرف، تدخل على الثالث وتقول:

- فين "تميم ابن معقل العجلاني"؟

- أنا هنا أهو.

- فيه بيت شعر ليك يقول: "بيتك الخالي يا سلمى ما بتملش ناقتي  
"مرانة" من مرواحه". "مرانة" دا كان اسم ناقتك فعلا، ولا كان اسم واحدة ست؟



- أنا رجلي ما دخلتش الفردوس ، إلا وكل الشر وكل كلام الشعر محم  
تماما من غي . أصل أنا اتبهذلت جامد أوي واتحاسبت حساب شديا  
واتقالي : ' انت كنت من ضمن الناس اللي حاربوا "علي ابن ام  
طالب ' ، وطللي "قيس ابن عمرو ابن ملك " وهو كان بيكرهني عشا  
كان بيأيد 'علي ' وفضل يتهمني ويبهذل فيا ، وما فلتش من النار  
بعد ما خدتلي كام لسعة محترمة . لكن انت حافظ كل حاجة وكأنا  
ممرتش أساسا بيوم القيامة ، والمناذي عمال يقول فين فلان ابن فلان .  
وملوك الدنيا الجبارين بيشدوهم على الجحيم ، والملكات بيتلسو  
بالنار وجلدهم وجسمهم بيتحرق ، وهم عمالين يصرخوا : " في أي حا  
يفدينا؟ في أي عذر يحمين؟ " والعيال الأغنيا الفرفورة بيعووا زي الدياه  
في سلاسل من نار ، ويقولوا : " احنا اللي كان معانا فلوس بالهبل ، وكا  
الكل في الكل في الدنيا ، وياما ساعدنا ناس ، مفيش دلوقتي أي حا  
يساعدنا أو يفدينا؟ " فسمعوا صوت من عند العرش بيقول : " أولم  
نعمركم ما يتذكر فيه من تذكر وجاءكم النذير فذوقوا فما للظالمين س  
نصير " . وبعتالكو رسل من بعد رسل ، وهم يحاولوا يوصلوكوا لبر  
الأمان ، واتقالكو : " واتقوا يوما ترجعون فيه إلى الله ثم توفى كل نفس ما  
كسبت وهم لا يظلمون " لكن انتو كنتو مشغولين بلذات الحياة وغرقانين  
فيها لشوشتكو ، وناسيين خالص الآخرة . دلوقتي الحق بان ، والنهاردا  
محدث هيتظلم ، لأن ربنا النهاردا هو اللي هيحكم بين العباد .

وهتكمل يا شيخنا كلامك مع الاتنين الباقيين من الشعرا الخمسة .

- طيب فين "عبيد النميري" ؟

أما هو .

إن شاء الله ما تبقاش زي صحابك مش فاكراي حاجة .  
بسمع من بقك ربنا . يلا اسألني لما نشوف ، بس خليك رحيم معايا  
والنبي .

متخفش ، هو سؤال واحد . هو انت صحيح زي ما قال " سيبويه "  
نصبت كلمة أصلا مجرورة في قصيدتك اللي بتنتهي كلها بحرف " اللام "  
اللي عملتها عشان تمدح " عبد الملك ابن مروان " ؟  
أبوة حقيقي .

تسييه وانت راضي عن إجابته ، وتروح للأخير " حميد ابن ثور "  
ونقله :

يا " حميد " ، انت كتبت كلام جميل أوي لما قلت :  
نظري ضعف وكان زمان ٦/٦ . . . ما كفاية بقى يا مرضس سيبني في حالي  
والموت هيجيني صبح أول ليل . . . وهو عارف كويس أوي فين مكاني  
إيه بقى أخبار نظرك دلوقتي ؟

- أنا دلوقتي لو واقف في آخر حطة في غرب الجنة ، أشوف صحابي لو  
واقفين في آخر حطة في شرقها ، رغم إن بيني وبينهم مسافة آلاف السنين  
الضوئية اللي كنا عرفناها في الدنيا . سبحانه ، قادر على كل شيء .

- انت كمان أبدعت في القصيدة بتاعتك اللي بتنتهي كلها بالذال اللي قلت  
فيها :

سنة ورا سنة والجمال على حالها ضعفانة . . . لغاية لما جت سنة بقت  
صحتها زي الحديد

- مش فاكرا أنا الأبيات دي ولا غيرها، أنا كل اللي بفكر فيه دلوقتي هم  
الخور أم رجلين مكلبظة .

- يعني انت بتنكر إنك انت اللي قلت القصيدة دي؟ وأنا اللي كنت فاكرا إن  
الشاعر "القطامي" هو اللي ناقل منك أسلوبك في الشعر . بس كدا ممكن  
يكون هو اللي كان سبقك وانت اللي نقلت منه ، وخاصة إن انتو الاتنين  
كنتو عايشين في نفس الفترة .

- يا عم مش فارقة مين ناقل من مين ، نعم ربنا اللي إدهالي في الجنة شغلتنني  
عن الحاجات اللي كنت بعملها في الدنيا . "ولا خوف عليهم ولا هم  
يخزنون" . وقت ما كنا في الدنيا ، كان الواحد يعصر نخه عصر شهر  
طويلة أو سنة كاملة عشان يكتب قصيدة مديح في واحد غني ، ويا إما  
يرجع وقفاه بيامر عيش ، يا إما يديك مبلغ ما يكفيش عيش حاف .  
عموما الشعر عند العرب من أفضل الحاجات اللي كانوا بيعملوها .

شوية ويحيلكم ، الشاعر "ليبد ابن أبي ربيعة" ، فيعزمكم تروحوا معاه  
بيته في حته اسمها "القيسية" ، وحلف عليكم بالجامد لتروحوا معاه . وانتو  
بتمشوا هيظهر قدامكو فجأة ثلاث قصور عملاقة جميلة جدا ، فيسألوك  
"ليبد" :

- تعرف يا ابن القارح يا أدينا يا حلبي القصور دي بتاعة مين؟  
- لا والله معنديش فكرة .

دول ثلاث قصور ربنا ادا هو ملي عشان الأبيات الثلاثة اللي أنا قلتها :

الأولى :

أحسن عبادة إنك تتقي ربنا . . . وربنا هو اللي في إيدته كل شيء

والثانية :

الحمد لله اللي ملهوش شريك . . . هو اللي في إيدته الخير ، واللي عايزه يكون

والثالثة :

أحسن واحد اللي ربنا يهديه . . . يبقى باله رايق وأحسن من التايهين

فربنا حوّلِي الأبيات الثلاثة دول لبيوت في الجنة أسكنها على طول .

فتعجبوا كلكم وتقولوا : " سبحانه ، قادر على كل شيء " .

(٣)

## المعري بيتخيل إزاي ابن القارح دخل الجنة

انت يا شيخنا لما تلاقيهم مختارين من ذاكرتك في الشعر تقولهم:  
«لب أنا هحكيلكو حكايتي. أنا لما قمت من القبر، ووقفت في ساحة  
الامامة، افكرت الآية اللي بتقول: "تخرج الملائكة والروح إليه في يوم كان  
ثمااره خمسين ألف سنة، فاصبر صبراً جميلاً" عشان الوقت طال عليا أوي،  
«عطشت جامد والحر بقى لا يطاق ومفيش حتى نسمة هوا واحدة، وأنا  
اساساً راجل بعطش بسرعة جدا، وعرفت إن دا كدا آخري وإني مش هقدر  
استحمل أكثر من كدا. بس أخيراً جالي الملك اللي معاه الكتاب اللي فيه  
أعمال الكويسة، فلقيت حسناتي أقل من نبات ميت في سنة مفيهاش مطر،  
س في آخر الصفحة شفت توبتي كأنها كشاف نور حد رافعهولي عشان  
اشوف بيه الطريق. فلما فضلت واقف كدا حوالي شهر أو شهرين،  
وخفت من كتر عرقى لأغرق فيه، فكرت في فكرة غيبسة، وهي إنني أقول  
بيت شعر حلو في "رضوان"، حارس الجنة. وبدل بيت "امرؤ القيس"  
بتاع: "أنا عايز أعيط على ذكرى الحبيب والعرفان" شلت عرفان وحطيت  
"رضوان"، وبعدين اتزاحمت في الناس لغاية لما وقفت في مكان يسمعي

ويشوفني منه كويس . بس هو ولا هو هنا ، ومعتقدش حتى إنه خدنا . ا  
كنت بقول إيه . اتضايقت شوية كدا يُحيي بتاع عشر أيام من بتوع الـ  
وبعدين رحت عملتله بيت تاني على وزن بيت كان عمله الشاعر " جرم  
فطنشني زي المرة الأولى بالظبط ، وكأني بمحاول أحرك جبل بصباغ واحد . ا  
عايز أطلع غسل من التراب . وفضلت كدا شغال على كل الأبيات الـ  
أعرفها اللي ممكن أبدل كلمة فيها بـ "رضوان" لغاية لما خلصت كل الـ  
عندي ، وهو مش مركز معايا خالص أساسا . ولا شكله حتى كان فاهم ا  
كنت بقول إيه . وبعد خلاص ما غلب حماري ندهت بأعلى صوتي :

- " يا رضوان " ، يا اللي ربنا ما تمنك على فردوسه ، مش بترد عليا له '  
مش سامعنى ولا إيه ؟

- سمعتك بتقول " رضوان " بس معرفتش عايز مني إيه . طلباتك إيه . ا  
مسكين ؟

- أنا راجل ملياش صبر على العطش ، ومدة الحساب طولت ، وأنا معايا  
صك بالتوبة ، والصك دا ييمحى الذنوب كلها ، وأنا عمال أمدح فيك  
بأشعار كتير وحطيت فيها اسمك كمان .

- يعني إيه أشعار ؟ أنا أول مرة أسمع الكلمة دي .

- الأشعار جمع شعر ، والشعر هو الكلام اللي ليه وزن ، لو زاد عليه أو  
نقص نحس على طول إن فيه حاجة غلط ، وكانت الناس في الدنيا  
بيستخدموه ساعات عشان يقربوا به من الملوك والباشاوات ، وأنا قلتلك  
شوية منه عشان تسمحلي أدخل الجنة من الباب دا ، عشان أنا استطولت

الولفة بصراحة ، وأنا راجل ضعيف ومش حمل الوقفة دي ، وأنا طلبت  
،، بنا المغفرة وشايف إنى أستحقها إن شاء الله .

،، فهمك على قذك شكلك ، انت عايزني أدخلك الجنة من غير إذن  
،، يا لهوي عليك ، " وأن لهم التناوش من مكان بعيد " .

لسبته ورحت عند حارس تاني للجنة اسمه " زفر " وعملته شعر على  
،، شعر لـ " لبيد " وسمعتوه ، بس ولا الهوا ، ولا كإني بكلم حيطة . ما  
،، بيت ينفع أبدل كلمة منه بـ " زفر " إلا وقتلهوه ، بس ولا اتهزلته  
،، ، حتى ، فقلتله :

والله مش معقول كدا ، الواحد في الدنيا كان يقول بيتين ولا ثلاثة لأي  
ملك أو رئيس ، فيظبطه ويديله كل اللي نفسه فيه ، وأنا قلت فيك شعر  
لو كان اتجمع كان اتعمل ديوان بحاله ، بس انت ولا كإنك سمعت منه  
ولا حتى كلمة .

أنا ما حستش بأي حاجة من اللي انت قلتها ، ومتيألي إن اللي انت قلته  
دا من كلام " إبليس " ، وكلام " إبليس " ما يدخلش على الملايكة ،  
الكلام دا يمشي بس على الجن ، وهم علموه لولاد آدم . المهم ، عايز إيه ؟  
عايز أدخل الجنة بقي ، تعبت .

مكنش يتعز ، بس مفيش في إيدي حاجة أعملها لك . إنت من أنهى أمة ؟  
أنا من أمة " محمد ابن عبد المطلب " .

- عندك حق، دا نبي العرب، وعشان كذا عمال تقولي شعر، "إيليس" اللعين خلى كل سكان منطقة العرب يتعلموا الشعر، واستات. أنا هنصحك نصيحة لوجه الله، عايز تخرج من هنا، ام عليك وعلى النبي، هو يساعدك في اللي انت عايزه.

زهقت منه ومن قلة حيلته، ففضلت أتمشى بين الناس، فلقيت راحا منور وحواليه رجالة نورهم ولا الشمس، فسألت مين دا، فقالولي دا "م"، ابن عبد المطلب" اللي قتله "وحشي"، واللي حواليه دول كانوا شهداء غزوة "أحد". فقلت بيني وبين نفسي: الشعر هينفع مع الناس دول أو من حراس الجنة، عشان دول واخدين على الشعر وهم أصلا شرا و"حمزة" هو وكل عيلته شعرا أبا عن جد. فعملت شعر على وزن أبيات "كمب ابن ما لك" كان عملها من زعله على موت "حمزة". قربت منه وناديت: يا حمزة، يا سيد الشهداء، يا عم الرسول، يا ابن عبد المطلب فلما جالي قتلته الأبيات اللي عملتها فقلالي:

- يخرب بيتك، انت جاي تمدحني في الظروف اللي احنا فيها دي؟ انت ما سمعتش الآية: "لكل امرئ يومئذ شأن يغنيه"؟

- سمعتها، وسمعت اللي بعدها كمان: "وجوه يومئذ مسفرة، ضاحكة مستبشرة، ووجوه يومئذ عليها غبرة، ترهقها قفرة، أولئك هم الكفرة الفجرة".

- أنا مقدرش أعملك حاجة في اللي انت عايزه دا، بس هبعت معاك واحد يساعدك تقابل "علي ابن أبو طالب" وهو يكلم النبي في موضوعك.



لبعت معايا راجل لأمير المؤمنين . والراجل حكااله حكايتي ، فقال لي  
 علي : " وريني يابني كتاب أعمالك الكويسة " . لما طلب مني " علي "   
 ١٠٥٠ . ، افكرت إن أنا كنت شفت في الزحمة دي شيخ كان بيدرسلنا نحو في  
 ١٠٥١ . ، اسمه " أبو علي الفارسي " ، وكان ملموم عليه ناس بيقولوله : " انت  
 ١٠٥٢ . ، علينا في الدنيا وظلمتنا " فلما الشيخ شافني شاورلي إني آجي . فلما  
 وصلت عنده ، لقيت عنده ناس كثير من ضمنهم " يزيد ابن الحكم الكلابي "   
 ١٠٥٣ . ، بيقوله : " الله يخرب بيتك ، رفعت المنصوب ونصبت المرفوع ، وخلت  
 ١٠٥٤ . ، الشجر بتاعي تبوظ " . وواحد ثاني قاله : " انت جبت تفسيرات الشعر  
 ١٠٥٥ . ، دي منين ؟ دا مفيش حد قال كذا أبدا في العرب قبل كذا . " وواحد  
 ١٠٥٦ . ، زعق له وقال : " مجنون أنا عشان أقول الكلام اللي انت قلت إن أنا  
 ١٠٥٧ . ، والناس متجمعه عليه عمالين يلوموه على تفسيراته ، فقتلهم : " يا  
 جماعة ، كل دي أمور هينة ، سيبوا الراجل في حاله ، دا مهما كان برضه هو  
 اللي عمل كتاب " كتاب الحجة " عن القراءان الكريم ، وبعدين هو  
 ١٠٥٨ . ، هتلكومش حد ، ولا سرق منكوا فلوس ، فابعدوا عنه وشوفوا حالكو " .

أنا فضلت شوية كذا أهدي النفوس بينهم ، بس فجأة ببص كذا ،  
 لقيت صك التوبة وقع مني ، رجعت أدور عليه بس برضه ملقيتهوش ،  
 فالتحضيت وخفت وقلقت جدا ، فقال لي أمير المؤمنين :

متقلقش ، عندك شاهد بموضوع التوبة دا ؟

أه ، القاضي بتاع حلب والمساعدين بتوعه .

اسمه إيه ؟

ـ " عبد المنعم ابن عبد الكريم " .

فراح واحد نادي على "عبد المنعم"، وسأله: "انت شاهد على ما التوبة بتاع "ابن القارح"؟" فمحدث رد عليه، وأنا اترعبت وابتدأت أترعش، فنادى ثاني، بس برضه محدش رد عليه، فنادى ثالث مرة، ثم عليه صوت وقال: "أيوه، أنا شفت "ابن القارح" وهو بياخذ صا التوبة، خد الصك متأخر، بس أنا وكل مساعديني شفتاه". روجي رجعت فيا بعد ما رد، وقمت وخذت نفسي مرة ثانية، وقلت لأمر المؤمنين على طلبي. بس معبرنيش وقالني: "انت عايز حاجة مستحيلة، وعناك ولاد أبوك آدم، شوفهم عاملين إزاي". سبته وطلعت أجري على حوض المية بتاع النبي ووصلت بالعافية، وشربت منه حبة خلوني ما أعطش بما كدا أبدأ. والكفرة كانوا بيحاولوا يقربوا من الحوض هما كمان يشربوا، بس كانوا حراس الجحيم بيمنعوهم ويبضربوهم بعصيان بتطلع نار، فيرجع الكفرة وفيهم اللي اتحرق وشه أو أيده وعمالين يزعموا ويلعنوا.

فضلت ما شي بعدها لغاية لما رحت عند أهل النبي الأصول ولاد الأصول. وقتلهم:

- أنا لما كنت في الدنيا، لما كنت آجي أكتب أي كتاب، كنت بقول الخاتمة، وصلى الله على سيدنا محمد وعلى أهله الطيبين الأخيار، ومتيألي يعني دا ممكن يشفعلي إني أطلب منكم طلب.

- عايز إيه؟

- بصوا هي ستنا فاطمة دخلت الجنة من زمان، بس هي كل شوية، حوالي كل ٢٤ ساعة من وقت الدنيا، بتطلع من الجنة تسلم على أبوها اللي قاعد برة

منان يحكم بين الناس، وبعدين بترجع ثاني على الجنة، فلما تخرج المرة  
الحاية، قولولها على حكايتي، يمكن هي توصل لأبوها موضوعي.

فلما جه وقت خروجها ونادى ملك على الناس إنهم يبصوا في  
الأرض لغاية لما فاطمة تعدي، اتلم عليها ناس كثير رجاله وستات من نسل  
أبر طالب"، عمرهم ولا شربوا خمر ولا عملوا أي حاجة من الكبائر.  
لما شافتهم سألتهم:

ما لكم متجمعين كدا ليه؟ عايزين حاجة؟

أحنا كويسين الحمد لله، ومستمتعين بنعم الجنة، ومش مستعجلين على  
دخولها قبل معادنا، لأننا واثقين في ربنا لما قال: "إن الذين سبقت لهم  
منا الحسنى أولئك عنها مبعدون لا يسمعون حسيها وهم فيما اشتت  
أنفسهم خالدون لا يحزنهم الفزع الأكبر وتلقاهم الملائكة هذا يومكم  
الذي كنتم توعدون".

وكان موجود في اللمة دي "علي ابن الحسين" وولاده "محمد"  
و"زيد" وناس تانية من الصالحين، وكان فيه واحدة تانية مع ستنا "فاطمة"  
لها هيبتها وعظمتها كدا، فالناس سألت مين دي، فقالولهم دي "خديجة"  
بنت خويلد"، وكان حوالين ستنا "خديجة" شباب راكبين احصنة من  
النور، فقالوا: مين دول؟ فقالوا دول ولاد النبي الرجالة "عبد الله،  
والقاسم، والطيب، والطاهر، وإبراهيم".

فحاولوا الناس اللي في اللمة دي يتشفعولي:

- يا أهل النبي، دا واحد ابن حلال، وخذ صك التوبة خلاص، ومدا،  
الجنة كدا كدا، وهو اترجانا نكلمكم، تكلموا النبي، في إنه يفو  
الموقف دا، ويستعجل دخوله الجنة.

فقال "فاطمة" لأخوها "إبراهيم":

- شوف طلبات الرجل دا يا "إبراهيم".

فقال "إبراهيم" تعال معايا يا "ابن القارح"، وشدني علم  
حصانه. فضلت الخيل تشق الطريق بين الناس، بس لما الزحمة زادت أوي،  
طارت، وأنا ما سك في "إبراهيم"، لغاية لما وقفت الخيل عند النبي، فسأل  
النبي ستنا فاطمة:

- مين الرجل الغريب دا؟

- دا راجل اتشفع ليه ناس من أهل البيت الطاهرين.

- طيب استني لغاية لما أشوف كتاب أعماله.

لما شاف إن كتاب أعماله آخره مختوم بختم التوبة، شفعلني،  
وسمحلي إني أدخل الجنة. فلما مشيت ستنا فاطمة، اتشعلقت في حصان  
"إبراهيم". ولما خلصنا من الزحمة، قالولي: "دا الصراط، عدي عليه"  
الصراط كان فاضي ما عليهوش حد غيري. حاولت أعديه، بس لقيتني  
كنت هقع، فراحت ستنا فاطمة قالت لجارية من جواربها: "يا فلانة،  
ساعديه". حاولت تساعدني بس أنا كنت عمال أترجح بين وشمال،  
فقتلتها:

بصبي بقي ، لو عايزة تساعدينني فعلا ، اعملي معايا زي ما قال الشاعر :  
با ست الكل لو تعبتي مني ، ابقني تشيليني هिला بيلا .

و "هिला بيلا" دي اللي هي إيه؟  
بمعني تشيليني "أوبا" كدا زي العيال وعدي انتي بيا .

فشالتني وعدت بيا بسرعة البرق ، وأول ما وصلت الناحية الثانية ،  
سنا "فاطمة" بصت للجارية وقالتلي : "خليها لك ، نخدك في الجنة" .  
لما وصلت عند باب الجنة قابلت "رضوان" فقاللي :

معاك إذن دخول؟  
لا .

يبقى ما ينفعش تدخل . هات الإذن وأنا أدخلك .

فوقفت محتار مش عارف أعمل إيه ، وكان فيه شجرة صفصاف كبير  
لمرية من باب الجنة من جوة ، فقلت "لرضوان" :

طب هاتلي ورقة من الشجرة اللي وراك دي أروح آخذ الإذن عليها .

لا ، ما بخرجش حاجة من الجنة إلا بأمر من ربنا سبحانه وتعالى .

لا إله إلا الله ، إنا لله وإنا إليه راجعون ، والله لو الأمير بتاعنا في الدنيا كان  
ليه حارس زيك كدا ، ما كناش عرفنا نطلع منه نكلة .

بص "إبراهيم" وراه ، فلقاني واقف بعيد عنه مش عارف أدخل ،  
فراح راجع وشدني شدة ، لقيت نفسي بعدها جوة الجنة معاه . وأنا وقفت في  
الموقف دا ست شهور من شهور الدنيا . عشان كدا أنا لسه فاكر كل حاجة

حصلتلي في الدنيا، المصاعب والأهوال اللي شفتها في الموقف، مكتش فوراً  
لدرجة إنها تفقدني الذاكرة.

(٤)

## عزومة الجنة

هـيخطر على بالك بعد كدا إنك تعمل عزومة كبيرة، تجمع فيها أكبر عدد ممكن من الشعراء، مسلمين ومش مسلمين، وكل العلماء اللي كتبوا من اللغة العربية وكتبوا قواعدها وأصولها في كتب، وحتى الناس اللي ملهاش باع طويل في الأدب. والعزومة تبقى عاملة زي عزومات الدنيا، وخاصة إن ربنا قادر يجييلك كل اللي نفسك فيه وكل اللي انت عايزه بسرعة ومن غير أي صعوبة. بس رغم كدا يا شيخنا، مزاجك يهفك إنه يتبيلك طواحين في الجنة عند نهر "الكوثر" وتتمزج كدا وانت بتسمعها وهي بتطحن الدرة بتاعة الجنة، اللي هي أحسن مليون مرة من الدرة اللي "الهذلي" قال فيها شعر. الفرق بين درة الجنة ودرة الدنيا، زي الفرق بين السما والأرض. وتطلب من ربنا كمان، إنه يجييلك حور عين معاهم طواحين إيد، ويقعدوا يطحنوا الدرة بإيديهم، وتبقى طواحين الإيد، واحدة من الماس، وواحدة من الذهب وطواحين تانية من جواهر مسممش عنها أهل الدنيا أساسا. ولما تشوف منظرهم كدا وهما بيطحنوا، تشكر ربنا وتفتكر بيت الشعر اللي بيقول:

حضرت لضیوفی خدامتین . . . زی العسل اوی وحلوین

وتبتسلهم وتقولهم: "أیوة کدا یا بنات، اطحنوا کدا: .  
وشمال، یین وشمال".

وبعدین تفکر: "ولیه کمان ما أشوفش البهایم وهي بتطحن؟" فنظروا  
فجأة قدامک طواحين کتيرة من الجواهر بيلف فيها جمال قوية وعفیه، وبهایم .  
کل صنف ونوع. ولما يتجمع عندک کمية الدقيق اللي انت شايها کاد،  
للعزومة، ييجوا الولدان المخلدون جري ويحيبوا معاهم جديان وحام،  
وطواويس، و فراخ، وکناکيت، وبقر، وخرغان، ومعيز، وجمال عشا،  
يدبحوها، فنتسمع أصوات الجمال وهي بتتدبح وتشوف رغاوي بقها، وماما،  
الخرغان، وصوت الديكة، ولكن رغم کل حاجة، الحيوانات مش هتحمس بأی  
ألم وهي بتتدبح، رحمة من عند ربنا، هيقى کله کانه تمثيلية وهزار. وسبحانه  
وتعالی علی إبداعه فی خلق حيوانات وطيور من کل لون وصنف ونوع.

فلما تتدبح کل الحيوانات والطيور، هتنادي علی الملائكة عشان  
يجمعولک کل الطباخين اللي فی الجنة اللي کانوا من حلب من أول ما ربنا  
خلق حلب، فيجیلک عدد مهول، وتؤمرهم إن يطبخوا الأکل دا عشان  
العزومة. ودا من نعم ربنا علی الناس فی الجنة، لأنه قال: "وفيها ما تشتهي  
الأنفوس وتلذ الأعین وأنتم فیها خالدون وتلك الجنة التي أورثتموها بما كنتم  
تعملون. لکم فیها فاکهة کتيرة منها تأکلون".

وأول ما یجي الأکل، یروح الولدان المخلدون عشان یحيبوا المدعوین،  
فميسبوش أي شاعر أو أديب لیه علاقة بالأدب من قريب أو بعيد إلا



وهميوس، فيتجمع عندك كمية ناس رهيبة، فيحطوا الأكل على ترابيزات من الذهب فوق صواني من الفضة، ويوزعوا عليهم أطباق الأكل. لما يخلصوا امل، بيتدي يتوزع عليهم المشروبات وتيجي المطربات تغني. وتقولهم: أي واحد كان مطرب في الدنيا وربنا غفرله ودخله الجنة يجي عندي. " لهحيلك مجموعة كبيرة من الستات والرجال، بس "الجرادتين" ما يجوش، هم إن فيه واحد أكد إن هو شافهم في الجنة، فتنده وتقول: "هاتولي المرادتين فوراً". فيركب شوية من الخدامين بتوعك ناقة من بتوع الجنة، وروحوا يجييوهم بسرعة البرق. فتسلم عليهم وتبسملمهم وتقولهم:

قولولي بقى انتو إزاي دخلتوا الجنة؟

ربنا غفرلنا ذنوبنا ومتنا واحنا مؤمنين بكل أنبياء ورسله.

طب بقولكو إيه، ما تغنولنا القصيدة اللي بتنتهي بالحاء، اللي مرة يقولوا دي بتاعة "عبيد ابن الأبرص" ومرة يقولوا: لأ، دي بتاعة "أوس التميمي".

ورغم إن الجرادتين عمرهم ما سمعوا أصلاً بـ "عبيد" أو "أوس" إلا إن الإلهام ينزل عليهم بكلمات القصيدة فيلحنوها ويبتدوا يغنوها ويطربوا كل اللي قاعدين، ويفرحوا قلوبهم بصوتهم الجميل، ويخلوهم يحمدا ربنا على نعمته عليهم في الجنة بعد قرف الدنيا ومشاكلها.

فيخطر على بالك يا شيخنا إنك تشوف سحابة، زي السحابة البديعة اللي وصفها مرة شاعر في قصيدته وقال: "وسحاب محمل مطر كثير، جاي علينا من الجنوب بالخير"، فيبعتلك ربنا سحابة أحلى منها، اللي يشوفها بخلف إنه عمره ما شاف في جمالها قبل كدا، متزينة في نصها وأطرافها

بالبرق ، وبتمطر مية ورد من الجنة وبدل الثلج ، بينزل حبات صغيرة لدا ،  
من الكافور ، سبحانه الله القادر إن هو يحقق لنا أي مطلب ومش بيعجزه إ.  
تصور يجي في دماغنا .

تبص حواليك فتشوف الشاعر "جران العود النميري" فتسلم ،  
وترحب به ، وتقول لشوية من المطربات : "ما تسمعونا حاجة من قدام ،  
الراجل الجميل دا؟" فتغني المطربات ، لكن واحدة بالذات منهم صو ،  
يعجب الناس أوي ، فتسألكو المطربة :

- انتو عارفين أنا مين؟

- لا والله ما نعرفش .

- أنا "أم عمرو" اللي الشاعر قال فيها :

ما تبعديش عني الكاس يا أم عمرو . . . دا أحلى كاس هو كاس الصبح

فيعجب بيها الجماعة أكثر ويسألوها :

- صحيح هو مين اللي قال البيت دا؟ "عمرو ابن عدي" ، ولا "عمرو ابن  
كلثوم"؟

- والله اللي أنا أعرفه إن أنا كنت قاعدة مع "عمرو ابن عدي" لما جم  
"مالك" و "عقيل" بخدوه ، وساعتها قال البيت دا . يمكن بقى "عمرو  
ابن كلثوم" أعجب بالبيت دا وزوده في قصيدته .

فلما تسمع الحكاية دي تفكر الأبيات اللي قالوا إنها بتاعة "الخليل ابن  
أحمد" ، و "الخليل" كان قاعد معاكو في العزومة ، فتحس إن الأبيات دي

موسبقتهأ عالية وممكن تنغنى ويرقص عليها، فيخلق ربنا في التو واللحظة  
لمجرة جوز ويخليها تستوي في لحظتها، وينزل منها جوز ما يعلمش عدده إلا  
الله، وتفتح كل واحدة من الجوز فيخرج منها أربع جوارى جمالهم يهبل  
العرب، والبعيد ويتدوا يرقصوا على الأبيات دي اللي بتقول :

صحابتك مشيوا يا حلوة . . . يا تروحي معاهم يا تخليكي هنا

كانوا قمر ١٤ الأربعة . . . يا تبسطيني زيهم يا تمشي من هنا

فتتهز الجنة من الرقص والضحك . فتسأل " الخليل " :

مين اللي قال الأبيات دي يا " أبو عبد الرحمن " ؟

معرفش .

واحنا في الدنيا كنا فاكرين إن الأبيات دي بتاعتك .

مش فاكِر إن أنا قلت الكلام دا قبل كدا . ويمكن يكون عندكو حق ، الله  
أعلم .

نسيت يا " أبو عبد الرحمن " وانت كان مفيش حد أبداً عنده ذاكرة زي  
بتاعتك ؟

اللي بيعدي على الصراط ، دماغه وذاكرته بيبقوا أنضف من الصيني بعد  
غسيله .

ويجي على بالك يا سيدنا تشرب مشروب الشعير أبو فقايق اللي كانوا  
بيعملوه في الدنيا، فتلاقي ربنا في لحظة عملك نهر شعير، البق الواحد  
بالدنيا وما فيها من يوم ما اتخلقت ولغاية يوم القيامة . فتقول : " سبحان  
الله ، بس أنا اللي كان نفسي فيه فعلا إن بيعاين الشعير يلفوا علينا يسقونا

زي ما كان بيحصل في الدنيا . وقبل ما تكمل جملتك ، يكون ربنا جمع دل  
بياعين الشعير اللي في الجنة ، منهم اللي كان من العراق أو الشام أو غيرهم ،  
وجابهم عندك وقدامهم ولدان مخلدون بيساعدوهم .

ويعدي ما بينكم وانتو قاعدين طاووس من الجنة آية في الجمال ،  
فيصله " أبو عبيده " ويتخيله وهو مطبوخ بالخل ، فيتحول للحمة مطبوخة  
على صينية من ذهب . بعد ما يخلص أكل ويشبع ، يتجمع عضم الطاووس  
ويرجع ثاني زي ما كان . فيقولوا الجماعة : " سبحان من يحيي العظام وهي  
رميم " . دا زي ما ربنا قال بالظبط : " وإذ قال إبراهيم رب أرني كيف تحيي  
الموتى قال أولم تؤمن قال بلى ولكن ليطمئن قلبي قال فخذ أربعة من الطير  
فصرهن إليك ثم اجعل على كل جبل منهن جزءا ثم ادعهن يأتينك سعيا  
واعلم أن الله عزيز حكيم " . فتقولهم :

- اعربولي " يطمئن " اللي في الآية .
- منصوبة بحرف اللام اللي بمعنى " عشان " .
- وينفع تنعرب حاجة ثانية غير كذا؟
- مش جاي دلوقتي حاجة ثانية على بالناس .
- ممكن تبقى مجزومة بحرف لام الأمر بمعنى " خلي " يعني أنا آه آمنت ، بس  
خلي قلبي بطمن .
- تصدق تمشي برضه .

وتعدي عليكم وزه مكبلظة ، فيتمناها شوية من الجماعة مشوية ،  
فتبقى مشوية قدامهم على صينية من الزمرد ، وبعد ما يكلوها ، ترجع ثاني  
وزه حية ، فيتمناها مجموعة ثانية تبقى معمولة كباب ، ومجموعة تالته بالفلفل

المراق ، ورابعة باللبن والخل ، والوزة تفضل تتعمل على حسب رغبة كل  
مجموعة . وتنفض العزومة ويروحوا الناس وهم مبسوطين .

(٥)

## الحوريات

وبعدين تقعد لوحذك مع حوريتين ، فلما يبهرك جالهم تحزن وتقول :  
والله أنا حز في نفسي موت " امرؤ القيس " . أصل انتو فكرتوني بيه لما  
قال :

دانوا الاتنين لما يقوموا من مكانهم . . . يفوح منهم مسك نسيم الصبح  
والقرنفل

بس هم فين وانتو فين؟ القعدة معاكم ولو دقيقة واحدة من دقايق  
الدنيا ، بكل كنوز الدنيا ويبقى قليل عليكم كمان . "

وتقرب على كل واحدة منهم وتبوسهم وتبلع ريقهم وتقول : " امرؤ  
القيس " دا بجد مسكين ، مسكين حقيقي يعني ، عضمه بيتحرق دلوقتي في  
مهمهم في الوقت اللي افكرتله بيته اللي بيقول :

طعم النيذ والنسيم وندى الصبح . . . على سنانها اللي في بياض الثلج

فتستغرب واحدة من الحوريتين وتضحك، فتسألها :

- بتضحكي على إيه؟

- انت عارف أنا مين يا "ابن القارح"؟

- واحدة من حور الجنة اللي ربنا خلقهم عشان المتقين، وقال فيهم  
"كأنهن الياقوت والمرجان".

- أنا بقيت كدا دلوقتي بفضل ربنا، لكن أنا كنت في الدنيا اسمي  
"حمدونة" وكنت ساكنة في حلب، وأبويا كان عنده طاحونة، وجوزي  
كان شغال في الخردة، وطلقني عشان ريحة بقي كانت وحشة، غير إن أنا  
أساسا كنت من أوحش ستات حلب، فزهقت من الدنيا وسبتها  
واتفرغت للعبادة وعشت من عرق جبیني من الغزل والخياطة، فبقيت  
زي ما انت شايف كدا.

فتروح سآلاك الثانية :

- طب انت عارف أنا كمان مين يا "علي"؟ أنا "توفيق السودا" اللي كنت  
بشتغل في مكتبة دار العلم اللي في بغداد، وكنت بودّي الكتب للخطاطين  
عشان يعملوا منها نسخ ثانية.

- لا إله إلا الله، كنتي سودا فبقيتي أبيض من القسطة.

- مستغرب ليه؟ مسمعتش الشاعر اللي قال :

لو ذرة واحدة بس من نوره . . . لمست كل سود الدنيا، هتبيضهم

فيعدي عليك ملاك ، فتقوله :

تعالى هنا يا بني احكي لي عن حور العين ، مش ربنا قال : ' إنا أنشأنهن إنشاء ، فجعلناهن أبكارا ، عربا أترابا ، لأصحاب اليمين ' .

بص ، هو فيه منهم نوعين ، فيه منهم اللي اتخلق في الجنة وميعرفش غيرها أساسا ، ونوع ثاني ربنا حوله من الدنيا عشان أعمالهم كانت صالحة .

بجد؟ طب ألاقي فين اللي عمرهم ما عاشوا في الدنيا وما شافوش غير الجنة؟ وأعرفهم عن غيرهم إزاي؟

تعالى ورايا وأنا أوريك عظمة ربنا .

فتمشي وراه ، فيوديك لجنينة ما يعلم بيها إلا الله ، ويقولك : " خذلك فاكهة من الشجرة دي ، واكسرها ، الشجر دا اسمه شجر الحور " .

فتاخذ أي فاكهة وتكسرها فتخرج منها حورية عينيها واسعة وجمالها يجنن ، وتقولك :

- انت مين؟

- أنا "علي ابن منصور القارح" .

- يااااه ، دا أنا مشتاقة أشوفك من زمان أوي ، من قبل ما ربنا يخلق الدنيا يجي بأربع آلاف سنة كدا .

فتسجد لربنا تشكره وتقول : " دا زي ما جه في الحديث القدسي :  
" أعددت لعبادي المؤمنين ما لا عين رأت ، ولا أذن سمعت ، بله ما اطلعتم عليه " .



بس و انت ساجد تاخذ بالك إن الحورية دي رغم جمالها رفيعة ، فدهم  
راسك من السجدة ، تلاقي فخادها بقت ضخمة بشكل مبالغ فيه ، فنام  
ربنا وتقوله :

- يا رب ، انت القادر على كل شيء ، أنا مش عايزها ولا رفيعة ولا نحبة .  
يعني تكون مربوبة كدا بس .

- الحورية بتاعتك ، شكّلها زي ما انت عايز ، كل اللي عليك إنك تت  
بس .

(٦)

## رحلة "ابن القارح" لأهل النار

ويخطر على بالك يا مولانا إنك تروح عند أهل النار عشان تشوفهم  
حاملين إزاي وتشكر ربنا أكثر على نعمته، زي الآية اللي بتقول: " قال قائل  
منهم إني كان لي قرين يقول أئنك لمن المصدقين أئذا متنا وكنا ترابا وعظاما  
أنا لمدينون قال هل أنتم مطلعون فاطلع فرآه في سواء الجحيم قال تالله إن  
قدت لتردين ولولا نعمة ربي لكنت من المحضرين " .

فتركب حاجة، وتتمشى في الجنة فتعدي على مدينة مش شبه مدن  
الجنة، ومش منورة زي الباقي، فيها ترع مية ضيقة وأشجار مبتخليش أي  
نور يدخل المكان، فتسأل شوية ملايكة:

· ايه المدينة دي يا جماعة؟

· دي جنة العفاريات اللي آمنوا بسيدنا محمد، اللي ربنا ذكرهم في سورة  
الأحقاف وسورة الجن .

- أنا لازم أدخل أشوفهم، أكيد عندهم حاجات غريبة تشد انتباهي .

تدخل المدينة دي ، فتلاقي شيخ قاعد على باب مغارة . تسلم عليه ،  
فيرد عليك السلام ويسألك :

- انت مين يا إنسي؟ وإيه اللي رماك علينا؟ احنا عمرنا ما ورد علينا حد زيك  
- سمعت إن انتو جن مؤمنين ، فجيت أشوف أخباركم وأحوالكم ،  
وأشوف لو عندكو شعر عفاريتي .

- انت جيت للشخص الصح . قولي بقى عايز تعرف إيه؟  
- اسمك إيه؟

- اسمي "خيتعور" ، من قبيلة "الشيصبان" . واحنا مش من ولاد  
"ابليس" ، إحنا من الجن اللي كانوا موجودين على الأرض من قبل ما  
آدم يتخلق .

- طب احكي لي عن أشعار الجن . خاصة إن كان فيه واحد في الدنيا اسمه  
"المرزباني" كان جمع شوية من أشعار الجن .

- دا هبل ، اللي يعرفه البشر عن أشعار الجن ، هو بالظبط اللي تعرفه  
الجاموسة عن علم الفلك أو عن التخطيط العمراني . انتو آخركم ١٥  
وزن للشعر ، لكن احنا عندنا آلاف الأوزان ، عمركو ما سمعتوا عنها .  
وكل الشعر اللي تعرفوه ، شوية أطفال عيال عندنا هم اللي همسوا بيه في  
ودانكو ، ودول يا دوب شوية من شعرنا ، يعني اللي تعرفوه زي سلاكة  
سنان مقارنة بغابة أشجار . دا أنا نفسي قلت شعر قبل ربنا ما يخلق آدم  
بحوالي مرحلة أو مرحلتين كدا . أنا عارف إنكو فرحانين أوي بقصيدة  
"امرؤ القيس" اللي مطلعها بيقول :

تعالوا نقف نعيط على ذكرى الحبيب

لدرجة إنكو بتحفظوها للعيال في المدارس ، ولو حبيت ، أنا أعملك  
دلوقتي حالا ألف بيت على نفس الوزن ، وألف على كل وزن من الأوزان  
النانية . وكل الهيلة دي على شاعر مات كافر وعمال بيتشوي دلوقتي في نار  
جهنم .

ما شاء الله عليك يا شيخ ، ذاكرتك حديدية .  
انت فاكّر إن احنا زيكم ، ذاكرتنا بياكلها النسيان والرطوبة وبتصدي ؟ لأ  
طبعا ، انتو اصلكو اتخلقتو من طين ، لكن احنا من نار .  
طب ما تقولي حاجة من الشعر دا ؟  
طبعا أقولك ، ما أقولكش ليه ؟ دا أنا ممكن أفضل أقولك شعر ما  
يكفيهوش كل كتب الدنيا .

طب قول وأنا أكتب وراك . ولا أقولك ، لأ مش هكتب . أصل أنا لما  
كنت في الدنيا قعدت أجمع في شعر ما نفعنيش بحاجة . أنا كنت بجمعه  
عشان أقوله للرؤساء عشان اتقرب بيه منهم ، فكانوا بيتكرموا عليا  
بحاجات ما تسدش جوعي . وبصراحة تبقى قلة عقل مني لو سبت كل  
نعم الجنة عشان أقعد أكتب في شعر العفاريت ، وخاصة إن يوم القيامة  
خلي معظم أهل الجنة ينسوا حاجات كثير ، فبقيت أنا ، الحمد لله ، أكثر  
واحد فيهم حافظ شعر . بقولك إيه ؟ سيبك من الموضوع دا . انت عندك  
ولاد ؟ بقولوك " أبو " إيه يعني ؟

- بقولولي " أبو هدرش " . وأنا خلفت عيال ياما ، بقوا قبائل كثيرة ، فيه  
منهم اللي في النار دلوقتي وفيه منهم اللي في الجنة .

- طيب يا "أبو هدرش" انت ليه شايب رغم إن أهل الجنة شباب؟
- دي من نعم ربنا على أهل آدم في الجنة، لكن احنا خلاص معدناش المرء دي، عشان لما كنا في الدنيا، كان عندنا القدرة إننا نتحول لأي حاجة إنا عايزنها، يعني نبقي على شكل تعبان أو عصفورة، أو حمامة، فاتشالت الميزة دي في الجنة وبقينا على شكلنا الحقيقي، وربنا عوضكم في الجنة.

ياااه، متفكرنيش، دا الواحد شاف أيام معاكو في الدنيا متنسيش. أنا شفت منكو شر كثير، وانتو شفتو مني برضه شر كثير. دخلت مرة بيت كنت عايز أركب بنت عندهم، فعملت نفسي فار، فجابولي قطعة، فعملت نفسي تعبان واستخبيت تحت جذع نخلة كان موجود هناك، بس كشفوني برضه، فخفت أقتل، فحولت نفسي لرياح خفيفة واستخبيت بين خشب السقف، فشالوه، بس مشافوش حاجة، فاستغربوا أوي وقالوا: "منيش مكان هنا ممكن يستخبي فيه". سبتهم يستغربوا ونطيت على بنت قاعة تحت ناموسية، فلما شافتني اتصرعت. أهلها كلهم اتلموا وجابولها دكاترة، وجابولها ستات بتخرج العفاريت، ومسابوش رقية إلا وقالوها عشان أخرج وأنا ما بخرجش، وقعدوا يدوها في أدوية تشربها، وأنا لا بد في جسمها ما بتحركش. فتعبت ومرضت أوي، وأنا ما سك فيها ما سبتهاش غير لما ماتت. دورت على واحدة تانية وثالثة ورابعة، لغاية لما ربنا تاب علما وبطلت. ومن ساعتها ما يبطلش أشكره وبذكره دائما في أشعار زي:

ليك الحمد ياللي محبت ذنوبي . . . غفرتها بفضلك ومسحت عيوبِي

- الله عليك يا "أبو هدرش". باين عليك من أسلوبك إنك أستاذ في الشعر. بس قولني صحيح، هو انتو عندكم لغات زينا؟ يعني عندنا احنا الإنس، تلاقى العرب مش يفهموا الروم، ولا الروم يفهموا العرب.

انت بتتكلم إزاي؟ احنا في منتهى الذكاء، وأي حد فينا لازم يكون عارف كل لغات الإنس، بالإضافة للغة للجن متفهموهاش انتو. طب انت عارف إن أنا اللي نبهت الجن بإن القرآن نزل؟ كنا مرة بتمشى رايحين اليمن، لعدينا على يثرب، " فسمعنا قرآنا عجبا يهدي إلى الرشدا فآمنا به ولن نشرك برنا أحدا " فرجعت لأهلي وقولتلهم اللي سمعته، فأمنت مجموعات كبيرة منهم بسرعة. واللي خلاهم يصدقوا كلامي كمان، إنهم اترجعوا بنجوم مولعة لما حاولوا كالعادة يتصنتوا على السما.

طبيب يا "أبو هدرش"، بما إنك ما شاء الله عليك علمك غزير كدا، قوللي، هو كان فيه رجم للعفاريت قبل الإسلام؟ أصل فيه ناس بتقول إنه ظهر بس مع الإسلام.

هو كان فيه، بس مش بالكثره اللي حصلت بعد ما الإسلام نزل. وعموما ناس كثير وجن كثير بيكذبوا، والصدق كان قليل أوي في الدنيا، وعشان كدا الصادقين دائما نهايتهم حلوة. وأنا قلت في الموضوع دا قصيدة بتقول:

محدث بقى سامع للجن حس . . . واتكسرت أصنام مكة في ثانيتين  
وطلع من "هاشم" نبي بيسمع . . . كلام الله، ويهدي الصالحين  
يبلد اللي بيثرب، ويرجم . . . اللي بيزنوا، وبالذات المتجوزين  
واحنا الجن كان مفيش حد . . . يقدر علينا، وكنا مفترين  
خلينا الأخ يقتل أخوه . . . من الغيرة والحسد، وكنا ظالمين  
لغاية لما سمعنا كلام . . . القرآن، فاهتدنا وبقينا مؤمنين

انت هتتعجب جدا يا شيخنا بشعر الجنى دا، بس مش هتحب تطلوا، عليه أكثر من كدا، فتستأذنه وتسلم عليه وتمشي، وتكمل طريقك للجحيم بسرعة، بس تشوف أسد عمال ينهش في قطع بقر بحاله مع عيالهم، وحوالي ميتين راس مرميين جنبه. فتقول لنفسك: "أيام الدنيا، كان الأسا من دول لو لقي معزة رفيعة ياكلها، يقعد فيها كام يوم ما ياكلش غيرها". فربنا يلهم الأسد إنه يتكلم، وهو عرف إنت بتفكر في إيه، فيقولك:

— مش انتو في الجنة بتقعدوا تلهطوا رز بالبن والعسل والقشطة سنين طويلا من عمر الدنيا ولا بتبطلوا أكل ولا بطنكو بتتملي؟ هو أنا كمان زيكو كدا، آكل اللي أنا عايزه، ولا الفريسة بتحس بوجع ولا أنا بزهد من الصيد، بالعكس، احنا الاتنين بنستمتع بالموضوع دا. انت عارف أنا مين يا عسولة انت؟ عارف انت الحكاية بتاعة "عثة ابن أبو لهب"؟<sup>3</sup> دا كان النبي جوزة بنته "رقية" وبعد ما نزل عليه الوحي، راح "عثة" للنبي وقاله إنه كفر بيه وطلق بنته، فالنبي دعا عليه إن ربنا يسلط عليه كلب من كلابه. فخرج مرة مجموعة من الناس ومعاهم "عثة" عشان يروحوا الشام. وهم نايمين بليل طلع عليهم أسد، فضل يشمشم فيهم واحد ورا الثاني لغاية لما جه عند "عثة" وهجم عليه وأكله، أهو أنا بقى الأسد دا. ربنا خلاني أجوع قبلها بكام يوم عشان تبقى الهجمة بموتة على طول، ودخلت الجنة للسبب دا.

---

3 الحكاية دي فيها خلط كبير في أحداثها بين "عثة" وأخوه "عنية".

وتعدي على ديب عمال ينهش في قطيع ورا الثاني ، وكل ما يفترس  
حيوان ، يرجع ثاني حي ولا كأن أي حاجة حصلت ، فتعرف إنه زيه زي  
الأسد فتسأله :

وانت حكايتك إيه يا ديب؟

أنا اللي اتكلمت مع " الأسلمي " أيام ما كان النبي لسه عايش . بص ، أنا  
كان بقالي عشر أيام مكنتش أي حاجة ، ومبقاش فيا حيل حتى أطلع  
أجري ورا أرنب ، فلقيت في يوم معزة صغيرة ضعيفة أمها ماتت ،  
فهجمت عليها ، فصاحب المعيز " الأسلمي " خلى كلابه يهجموا عليها ،  
فما جرتش منهم ، وقعدت وقتله : " يعني انت فاكر إنك هتمنع عني  
رزق ربنا؟ طب ومين هيجمي معيزك لما تنشغل عنها؟ " فدخلني ربنا  
الجنة عشان آمنت بيه وبإن الأرزاق بإيده هو ، مش بإيد حد ثاني .

تكمل مشي لغاية لما توصل عند الناحية الثانية من الجنة ، فتلاقي بيت  
قديم ومهكع ، فيه راجل مفيش في وشه النور اللي في وشوش كل سكان  
الجنة ، وعنده شجرة مقرقة ، والفاكهة بتاعتها مش مستوية . فتسأله :

- هو انت ليه راضي تعيش كدا في الجنة؟ دا قليل أوي .

- دا كدا الحمد لله أوي ، دا أنا وصلته بعد ما طلعت عيني ، وبعد ما  
اتشفعت ليا قبيلة قريش رغم إني مكتتش حابب إن هم بالذات  
يتشفعولي .

- هو انت مين؟



- أنا الشاعر " الخطيئة العبسي " .
- وإزاي وصلت للشفاعة؟
- بالصدق .
- بالصدق في إيه؟
- بالصدق في شعري اللي قلت فيه :
- ملياش مزاج أضايق حد النهاردا . . . ومش عارف أروح لمن أشتكي
- ربنا اداني شخصية مشوهة . . . مفيش أوحش منها إلا خلقتي
- بس مش انت برضه اللي قلت :
- جزاء الخير لازم يكون خير . . . والمعروف بين الله والناس مش بيضيع
- ربنا ما غفر لكش عشان البيت دا؟
- أصل مكتتش أول واحد يقول كلام بنفس المعنى ، غير كدا أنا قلته اه .
- بس معملتش بيه ، عشان كدا ربنا محسبهوش في ميزان حسناتي .
- وإيه اللي حصل مع " الزبرقان ابن بدر " اللي مكتتش بتطبيقه؟
- ربنا خلى مقامه عالي في الجنة زي ما هو كان عالي المقام في الدنيا . اتمحتله
- ذنوب كثير بسبب شتيمتي له في الدنيا .
- فتسييه وتكمل مشي ، فتلاقي واحدة ست واقفة عند أول مدخل
- النار ، فتسألها :
- انتي مين؟

أنا "الخنساء السلمية" . كنت عايزة أشوف "صخر" أخويا، فبصيت عليه في النار فلقيته زي الجبل والنار بتحرق وشه، فقاللي: "اللي قلتيه عليا في شعرك اتحقق" . كان قصده على البيت بتاع:

دا صخر الناس بتهتدي بيه . . . كإنه جبل عالي وشعلة نار فوقه

فتبص انت كمان على الجحيم، فتلاقي "إبليس" الله يلعنه، وهو منكلبش بالسلاسل، وحراس الجحيم عمالين يضربوه بعصيان حديد . فتقول:

الحمد لله إن ربنا أخيرا انتقم لنا منك . دا انت وديت كمية ناس مهولة من ولاد آدم في ستين داهية .

انت مين؟

أنا "علي ابن منصور ابن القارح" من حلب . كنت بشتغل في الأدب وبتقرب بيه من الملوك .

- دي مهنة من أسوأ المهن . ما بتأكلش عيش وما بتشبعش بطون العيال . ويتوقع ناس كتير في الغلط وعشان كذا كانت السبب في موت ناس كتير زيك . مبروك عليك إنك نجيت منها . لا حقيقي يعني، ألف مبروك . بس أنا ليا عندك طلب، لو عملت هولي هكون في غاية الشكر .

- أنا مقدرش أعملك حاجة، وبعدين ربنا خلاص قال: "ونادى أصحاب النار أصحاب الجنة أن أفيضوا علينا من الماء أو مما رزقكم الله قالوا إن الله حرمهما على الكافرين" .

- أنا مش عايز منك لا مية ولا أي حاجة من الحاجات دي، أنا بس عايز أعرف، ربنا كان محرم عليكم الخمرة في الدنيا وحللها الكو في الجنة، فهل

ربنا برضه حلل لكو إنكو تناموا مع الولدان المخلدون في الجنة بعد ما نا،  
محرم عليكم المثلية في الدنيا؟

- ربنا يلعنك أكثر وأكثر، مش كفاية عليك اللي انت فيه؟ عموما، هو ار  
مسمعتش الآية بتاعة: 'ولهم فيها ازواج مطهرة وهم فيها خالدون'؟

- طب وإيه اللي فيها يعني؟ ما ممكن يكون إداكو الأزواج المطهرة والولدان  
المخلدون برضه عشان تناموا معاها، ما هي الجنة فيها مشروبات تاده  
ومع ذلك حلل لكو الخمرة برضه. طيب سيبك من الموضوع دا، قولاي  
حصل إيه مع "بشار ابن برد"؟ داليه عندي معزة خاصة، كان بيفضل  
دونا عن باقي البشر كلهم، بدليل لما قال:

إبليس أحسن من أبوكو آدم... اسمعوني يا ولاد الأشرار

معمول من نار، وآدم من طين... والطين لا يمكن يعلى لمقام النار

هو قال الحق، بس اللي يقولوا الحق دائما الناس بتكرههم.

إبليس يا دوب يخلص كلامه من هنا، تبص يا شيخنا على الجحيم،  
فتلاقي واحد يشوف عذاب ما شافهوش حد، ويحاول يغمض عينيه  
عشان ما يشوفش الضربة الجاية جباله منين. فييجوا حراس الجحيم ويفتحوا  
جفونه بالعافية بأسياخ معمولة من النار، وتركز أوي، تلاقيه إنه هو "بشار  
ابن برد"، ربنا رجعله نظره بعد ما كان أعمى عشان يشوف العذاب وهو  
بيتحدف عليه من كل حته، فتقوله:

- يا "أبو معاذ" (= بشار)، انت كان شعرك رائع، بس أفكارك ضايعة.  
وأنا لما كنت في الدنيا وأفكر حاجة من شعرك كنت بترحم عليك، على  
أساس إنه يمكن ربنا كان يغفرلك. كنت بتمكرلك حاجات زي:

ارجع لبيتك ومتخرجش منه . . . السنين بتعدي وانت لوحداك  
مستني بكرة وبكرة زي الحامل . . . ميعرفش اللي في بطنها إلا ربك  
والبيت الثاني اللي قلته في "أسماء" ، كانت كمية الأخطاء النحوية  
اللي فيه كثير جدا .

يا عم سييني في اللي أنا فيه مش فاضيلك ، وابعد عن وشي انت والنحو  
بتاعك دلوقتي .

فتسيه وتروح تسأل عن "امرؤ القيس" ، فيقولولك : "هو هنا أهو ،  
سامعك . " ، فتقوله :

يا "أبو هند" ، فيه كام راوي بغدادي كانوا لما يقولوا القصيدة بتاعتك  
بتاعة : "اقفوا نبكي . . . بيزودوا حرف الـ "واو" في بداية شوية أبيات  
فيها . انت إيه رأيك؟

- لا طبعا أنا معملتش كدا ، أمال يبقى إيه الفرق بين الشعر والنثر؟ بس هم  
ولا عندهم ذوق ولا أي حس فني .

- طب انت مرة في بيت شعر ليك قلت كلمة "بكر" وبكر ليها أكثر من  
معنى ، ممكن تبقى بيضة أو جوهرة أو جنينة أو وردة أو ورق بردي ،  
فانت كنت تقصد أنهي معنى؟

- كله يمشي .

- يا لهوي لو عرفت النحويين كانوا بيشرحوا أشعارك إزاي . بس انت  
كمان كان ليك أشعار كثير بتستخدم فيها كلمات غريبة أوي على

الودان، فانت عادي مكتشش شايفها غريبة ولا دي كانت طبيعيه  
الشعرية في أيام الجاهلية؟

- العرب اللي كانوا قبلنا ما كانوا بيهتموا بالكلمات الغريبة، لكن أنا والشعر  
اللي كانوا في نفس عصري، كنا لازم نقرا القصيدة كلها على الناس، واه  
كانوا الناس حسوا إن فيها أي حاجة غريبة كانوا رفضوها فوراً.

- طب هو صحيح انت اللي اخترعت حكاية "التسميط" دي؟ أصل  
ناس بينسبوا ليك شعر "مسمط" ويقولوا إن انت اللي قلته.

- لا والله، عمري ما عملت النوع دا من الشعر أبداً، والناس بتفتي كتب  
متيألي إنه اللي قال الكلام دا عليا حد من شعراء الإسلام. دائماً كانوا  
ظالمني وبيكدبوا كتير. "التسميط" دا نوع رخيص من كتابة الشعر.  
مش أنا أبداً اللي أعمله.

- الله ينور عليك. انت عجبتي على فكرة.

وتضرب كذا بطرف عينك، تلاقي "عنزة ابن شداد العبسي"  
بيتشوي في النار، فتقوله:

- إيه اللي حصل يا "عنزة"؟ فاكر لما قلت:

هم الشعرا سابولنا حاجة نقولها

---

4 التسميط يعني الشاعر يقسم البيت لأربع أجزاء، ثلاثة منهم نفس الوزن والرابع مختلف  
(المرجعة)

دا كدا ومكنش أساسا تقريبا فيه شعرا في عصرك، دا بعد ما الوحي  
دل على النبي بقى كل من هب ودب عامل نفسه شاعر. على رأي "أبو  
لام الطائي" لما قال:

لو كان الشعر بيخلص... كان خلص من زمان أوي  
لكنه عامل زي السحاب مليان... مطرة عمرها ما بتنتهي  
ومين "الطائي" دا؟

شاعر طلع في فترة الإسلام، استنى لما أقولك حاجة من شعره.  
بعد ما تقوله شعر من بتاع "الطائي" يقولك:

هو الكلام عربي، بس فيه حاجة مش أصلية. قبائل العرب زمان  
مكنوش بيقولوا كدا.

والله انت ضحككتني، شاطر، ناس كتير فعلا بتقول عليه كدا. والله يا  
"عنتره" أنا صعبان عليا أشوفك في النار، خاصة إن لسه بترن في وداني  
صوت المغنيات في القاهرة، وهم بيغنوا كلامك اللي بيقول:

سمية مرات أبويا بكت ويكتني... بعد ما خلت أبويا بضربني

يا ستي أنا عبدكو، وتحت أمركو... بس بلاش أذى، وابعدوا عني

دا كفاية أساسا إن انت من الناس القليلين اللي فاهمين في اللغة وبيقولوا  
'محب' مش 'محبوب'. يلا، نقول إيه بقى. قدر الله وما شاء فعل.

تضرب تاني بطرف عنيك، تلاقي "علقمة الفحل"، فتقوله:

- والله يعز عليا أشوفك في النار، وخاصة إن كان فيه قصيدتين انت قلتهم ناهي  
ممكن يشفعولك، الأولانية اللي بتنتهي بالباء والثانية اللي بتنتهي بالميم.

- يا عم امشي من هنا وشوف حالك. انت جاي تهون عليا وأنا بتشوي

- انت عارف، انت أصدق أبيات كتبتها كانت القصيدة بتاعتك اللم  
وصفت فيها الستات. أهني دي بالذات كانت المفروض تشفعلك.

اسألوني أنا على الستات. . . وأنا أقولكم سرهم

لو المال راح أو الشعر شاب. . . يروح معاهم حبيهم

أهم حاجة عندهم هي الفلوس. . . والشباب الدائم هو حلمهم

وانت لو كان مزاجك رايق كنت سألتك عن كام حاجة كمان، بس  
شكلك مش فايق لي.

وتقول لنفسك: "يا ريتني أعرف حصل إيه مع "عمرو ابن كلثوم  
فيردوا عليك حراس الجحيم: "موجود هنا تحت أهو، كلمه لو عايز، هو  
سامعك". فتقوله:

- إزيك ياللي كنت بتشرب الخمرة الصبح من إيدين الستات الحلوين،  
وكنت آخر استمتاع في الدنيا؟

- انت بالك مرتاح ومش حاسس باللي احنا فيه، فروح اشكر ربنا إنه  
رحمك من العذاب دا، وبلاش تجيب سيرة الماضي لإنه مش هينفع  
بحاجة.

والله أنا صعبان عليا أشوفك وانت بتشرب مية مغلية جزاء أفعالك اللي  
انت عملتها في الدنيا بعد ما كان النبيت المعتق الأصلي بيتصبلك في  
كاسات كريستال . صحيح ، كنت سألت نحويين في الدنيا على كلمة ليك  
في قصيدة كنت انت نصبتها ، بس مردوش عليها ، فأنا رديت بالنيابة  
عنهم وقلت إنها صح منصوبة .

وتبص في النار تلاقي " الحارث الشكري " فتقوله :

تعبت انت الناس معاك يا " حارث " في تفسير شوية من قصايدك ، بس أنا  
عجبني أوي بيت الشعر بتاعك اللي يقول :

احلب ناقتك ومنسيش ولا نقطة . . . فضي ضرعها واعزم على ضيوفك

أصلهم في الجاهلية ، كان لما يموت واحد ، يربطوا الناقة بتاعته جنب  
قبره وما يجلبوهاش ، ولا يأكلوها ولا يشربوها لحد لما تموت جنب قبر  
صاحبها ، عشان ربنا لما يحبيهم تاني ، الراجل يلاقي حاجة يركبها ، ويا عيني  
ببقي جزاء الناقة زي ما قلت :

بعد ما لقيت بيها كل الصحرا . . . سابوها تموت بعاداتهم العميا

وبعدين تروح سائل " طرفة ابن العبد " :

- إزيك يا " طرفة "؟ فاكرك لما كنت في شعرك بتكلم عن نفسك وانت  
بتشرب الخمرة صبح ومساء؟ إيه أخبارك بقى دلوقتي؟ متهيألي دلوقتي  
مبقتش بتشرب غير المية المغلية . فيه لغويين كانوا مترددين بينك وبين  
" عدي ابن زيد " في بيت شعر ، بس أنا أظن إنه بتاعك لإنه أسلوبك



أوي. عموما، ناس كثير اتكلمت عنك. فيه منهم قال إن "النساء ملك الحيرة اعتقلك، وفيه اللي قال إن "عمرو ابن هند" هو اللي أهلك بقتلك لما شتمته في قسايدك. عموما، انت حتى لو مكتش سبت ، قصيدتك اللي بتنتهي بالبدال، كانت هتبقى كفيفة بأنها تخلد اسمك في الدنيا.

- ياريتني ما كنت كتبت ولا حتى حرف واحد، ولا شفت أي مكان حلوا في الدنيا، وكنت بدل دا، دخلت الجنة مع الهمج والفجر، ولا إني أبقى مريبو كدا من رقتي زي البهايم. "وأما القاسطون فكانوا لجهنم حطباً".

وتلف رقتك بتأمل كدا، تلاقي "أوس ابن حجر" فتقوله :

- صحابك مش بيردوا على أسألتي يا "أوس"، إن شاء الله ألاقى عندك انت إجابة. أولا، ليه فيه أبيات كثير ليك ينسبونها "للنابغة الذبياني" مع العلم إن انتو الاثنين كنتو تعتبروا من الشعرا الجامدين أوي في الدنيا، تفتكر كان ليه بيحصل كدا؟ ثانيا، أنا حبيب أسجل اعجابي بقصيدتك، اللي بتنتهي باللام اللي بتوصف فيها القوس.

- أنا سمعت إن "النابغة الذبياني" دخل الجنة، فروح اسأله هو عن اللي انت عايزه يمكن يجاوبك لأن دماغه هتكون أروق مني، لكن أنا دماغ مشغولة بالنار، والعطش، وكل ما ألاقى نهر، أجري عليه عشان أشرب ألاقيه مية مغلية. لكن يفيد بإيه الندم دلوقتي، أنا بس اللي مضايقتي فعلا، إن فيه ناس دخلوا الجنة وهم أشرف مني بمراحل. لكن نقول إيه بقى، المغفرة أصلها أرزاق، زي الحظ في الدنيا.

أنا بس كنت عايز أسمع منك انت، وأحكي كلامك لأهل الجنة، وأقولهم: دا "أوس" هو اللي قالي كدا بنفسه، وكان نفسي أسألك عن كلمة كتبتها في قصيدة ليك، "سيويه" قال إنها مرفوعة وما أظنش إنها كدا، بس الظاهر إني مليش نصيب أعرف منك حاجة .

وتبص كدا تلاقى راجل متعرفهوش، فتسأله :

انت مين يا متعوس؟

أنا "عامر ابن الحليس" .

انت واحد من كبار قبيلة "هذيل"، بس أنا بصراحة ما مجبش شعرك .  
كله بيتدي بنفس الطلعة: "يا زهير، قولي إزاي أهرب من الشيب"، دا يدل على إنك ملكش في فن الشعر، المفروض كنت تنوع شوية .  
و"الأصمعي" قال إنك ما كتبتش غير ثلاث قصايد بس .

- أنا مش قادر أستحمل العذاب أكثر من كدا، هو انت متعرفش إن أهل النار ما يقدروش يقولوا حاجة غير الشكوى والألم؟ روح افرح وشوف مصلحتك .

- آه أفرح، ما أفرحش ليه؟ ما أنا ضمنت الرحمة الدائمة من اللي عمره ما يخلف وعده . عموما هو فين "صخر الغي"؟

- هناك أهو، شايفه؟

- إيه يا "صخر"؟ راحت فين حبيبتك "دهما"؟ ولاعرفت تتحصل عليها لا في أرض ولا سما . كانت مزة، وانت كنت بتخاف من حبها، عشان كدا قلت فيها:

آه منك يا دهما . . . مش قادر أنساكي

ومن ساعة ما عرفتكَ . . . خائف من هواك

وفين ثروتك؟ تلاقيك نسيتهما من كثر العذاب، وليك حق تنساء  
بصرامة.

وتبص تلاقى واحد عمال يتلوى قدامك يا من كثر الضرب يا من  
الجوع، فتسأل: مين دا؟، فيردوا عليك: دا "الأخطل التغلبي".

- شفت عشقك للخمرة وصلك لفين يا "أخطل"؟ ياما كبارات الـ  
كانوا بيتمايلوا على أشعارك اللي بتوصف فيها الخمرة والجو اللي كان  
بتعمله الخمرة.

- عندك حق، والله أنا حاولت على قد ما أقدر إني أبعد عن الكباثر، بـ  
ربنا يغفرلي، بس أمنيتي حاجة والواقع حاجة ثانية خالص.

- بس انت أصلك غلطت في حاجات كثير بصراحة: يعني الاسلام ظهر،  
بس انت فضلت مسيحي وما أسلمتش، وفضلت أخلاقك وحشة،  
وصاحبت "يزيد ابن معاوية"، ومشيت ورا مزاجك ومتعتك،  
وشهوتك، وفضلت الحاجات اللي ما بتدومش على الخير الدائم، فكنت  
متوقع إزاي إن ربنا يغفرلك؟

يتنهد "الأخطل" تنهيدة جامدة، يستغرب منها حتى حراس الجحيم  
ويقول:

- يااااه! فكرتني بأيامي مع "يزيد"، وريجة العنبر والريحان كانوا دائما  
فايجين في بيته، وكنت أهرز وأضحك معاه زي الصحاب الأتيم، وهو

كان مستحملني وكان بيعاملني أحسن معاملة، وبيديني هدوم ملكية البسها. كأني سامع دلوقتي في وداني صوت المغنيات عنده وهم يقولوا شعره. وفاكر مرة كنا بناكل وكنت إسكران طينة وبهزر معاه فقلتله: "خلصت الفراخ كلها يا "يزيد" ما تبجي تاكلني أنا أحسن"، فاتقلب على قفاه من كثر الضحك.

ما هو ذا بالظبط سبب مجيك هنا. هو انت مكتتش تعرف إن الرجل دا كان عبارة عن ذنوب ما شبة على رجلين؟ تعرف إيه انت عن معتقداته؟ كان موحد ولا ملحد؟

معرفش حاجة، اللي أعرفه إنه كان بيحب القصيدة دي:

يا "خالد" احكيلى، وبلاش الهمس... قوللي عمل إيه "أبو سفيان" في المسلمين

احكيلى إزاي في معركة أحد... رجعههم كلهم لبيوتهم معيطين  
احكيلى عن "علي" لما زودها... فخلاله "معاوية" من ضمن المقتولين  
احكيلى، وشريني خمرة حلوة... معمولة بذوق على إيد المسيحيين  
احكيلى، كانت من امنى حرام... الخمرة قبل ما يبقى الإسلام دين  
احكيلى، مع إن كل الناس عارفة... إن محمد مات ورجع للطين

- يا نهار مش فايت! كل الشعرا اللي في الجنة أو في النار نسيوا الشعر، وانت لسه فاكر كفرك ومنسيتهوش.

هتلاقى يا شيخنا إبليس واقف قريب منكم وسامع الحوار كله، وبيقول لحراس النار:

- والله انتو زي ما قلتكو ولا ليكو أي لازمة أساسا .
- عايز إيه يا إبليس؟
- انتو مش شافين الرجل " ابن القارح " بيتدخل في اللي ملهوش فيه والله لو كان فيه ما بينكم ذكر بجذ ، كان نط عليه جابه من قفاه هنا معاااا في النار .
- اللعب غيرها يا إبليس ، احنا منقدرش نعمل حاجة لأهل الجنة .
- فانت لما تسمع يا شيخنا اللي قاله إبليس عليك ، تلعنه وتشتت فيه . فيقولك :
- هو مش المفروض إن أهل الجنة ما ينفعش يشمتوا في حد؟ بس انتو الحمد لله ، أول ما تسمعوا إن فيه حاجة ممنوعة تعملوها فورا .
- انت اللي بدأت بالشتماتة ، والبادي أظلم . وترجع حوارك مع " الأخطل " وتسأله :
- هو انت اللي قلت الأبيات دي ؟ :
- بمزاجي عمري ما مصوم رمضان . . . ولا هاكل من لحمة الأضحية كثير ولا مصحى قبل الفجر وأقول : . . . " حي على الفلاح " ، زي الحمير وهفضل أشرب وأشرب خمرة . . . لغاية لما أسكر ودماغي تطير
- أيوة ، أنا اللي قتلها ، وندمان أشد الندم ، لكن يفيد بيايه الندم ؟
- فتمل خلاص من كلامك مع أهل النار ، فتروح لقصرك في الجنة ، بس وانت على بعد يمكن كيلو ولا اتنين من قصرك فتفكر إنك نسيت تسأل على شعرا تانين كثير في النار ، فترجع ثاني عند النار وتنادي :

لين "عدي ابن ربيعة" ؟

نقصد مين بالظبط ؟

أقصد اللي التحوين بيقولوا إنه قال البيت دا :

ضربت على صدرها وقالت : . . . ربنا يحميك يا "عدي" من كل شر  
انت بتقول إيه احنا مش فاهمين حاجة ، يعني إيه تحوين وبيت ، وضح  
كلامك عشان نفذ اللي انت عايزه .  
عايز اللي معروف بـ "مهلهل التغلبي" أخو "كليب التغلبي" .  
عندك أهو ، سامعك ، قوله اللي انت عايزه .

فتقول لـ "عدي" :

- يا "عدي" والله يعز عليا أشوفك هنا في المكان دا ، كفاية الأبيات اللي  
قلتها في أخوك عشان تخليني أحزن عليك أكثر وأكثر ، وأبياتك اللي  
كتبتها في بنتك بتخلي عنيا تدمع . بس قولي ، انت ليه طلعا عليك اسم  
"مهلهل" ؟ فيه ناس بتقول عشان انت أول واحد "هلهل" الشعر ، يعني  
خلاه رقيق .

- الناس اللي بتكذب كثير . مش أنا اللي كان اسمي "المهلهل" دا قالوه  
على "امرؤ القيس" . أصل كان مرة هجم علينا "زهير ابن جناب  
الكلبي" ، بس أخويا ما سابهاوش ومشى وراه عشان ينتقم ، وقال :

لما هجم علينا الناقص . . . "هلهلت" : مفيش خير الانتقام

هلهلت يعني وقفت وقلت بصوت عالي ، فعشان كذا سموه  
"المهلهل" ، فلما مات ادوني اللقب دا بداله .

- انت كدا وضحت الأمور وريحت قلبي . طيب سؤال كمان ، هو ان .  
اللي قلت البيت اللي أوله " السما أرعدت . . " ؟ أصل " الأصمعي  
قال إن البيت دا فيه حاجة غلط .

- مش فاكّر إذا كنت أنا اللي قلته ولا لأ ، بس على كل حال قولني  
" الأصمعي " اعترض على إيه .

- بيقول إن الفعل " رعدت " من غير ألف .

- لأ طبعاً ، " الأصمعي " غلطان ، وسواء أنا اللي كتبتة أو حد ثاني ، فاللي  
كتبه واحد بيّفهم في الفصحى كويس أوي ، فخد كلامه ثقة وسيلك من  
" الأصمعي " واللي زيه .

وتسأل بعد كدا يا شيخنا عن " المرقش الأكبر " ، فتلاقيه بيتعذب  
عذاب رهيب ، فتقوله :

- ربنا يخفف عنك يا رب ، انت كنت صعبان عليا أوي من اللي حصلك في  
الدنيا ، لما كنت رايح تخطب " أسماء " بنت عمك ، بس لقيت إن عمك  
خطبها لواحد ثاني . فزعلت أوي وتعبت في الطريق وانت راجع ،  
فسابك المساعد بتاعك في كهف ، ورجع لأهلك وقالهم إنك مت ، بس  
" أسماء " مصدقتش ، وبعثت حد يدور عليك ويجيبك ، ورجعت  
لأهلك بعد ما حيوانات الصحرا كانت هجمت عليك وكلت مناخيرك .  
منه لله المساعد بتاعك اللي سابك كدا .

فيه مجموعة من المسلمين مكنوش بيعجبوا قصيدتك اللي بتنتهي بحرف  
الميم اللي أولها :

بنادي على البيوت ما بتردش . . . ولو بتنطق، كانت قالت كثير كلام

فيه مجموعة من أهل الأدب شايفين إن القصيدة دي هي وبتاعة 'المرقس الأصغر' ما يستحقوش إنهم يتصنفوا مع القصائد المهمة. بالنسبالي أنا، أنا مجبهم جدا. كان فيه ناس كمان نسبوك كام بيت، بس ما أظنش إن هما بتوعك، مش أسلوبك.

- والله أي حاجة ممكنة. أنا قلت شعر كثير، فيه حاجات منه وصلتكو وحاجات لأ، بس أنا أصلي نسيت أنا قلت إيه من طول القعدة هنا.

فتنقل على "المرقس الأصغر"، وتسأله عن موضوعه مع "بنت المنذر" وخدماتها "بنت عجلان"، فتلاقيه ناسي، فتقوله:

- بقى حد ينسى الموضوع دا، مش فاكرك لما كنت مصاحب "فاطمة بنت المنذر" وكانت الخدمة بتشيلك على ضهرها عشان محدش يشوف آثار رجلك، وبعد كذا جه "جناب" ابن عمك وصاحبك، وألح عليك يقابل هو "فاطمة"، وبعد إلحاح وافقت، فزعلت "فاطمة" منك وطردتك، وانت ندمت وسبت المكان كله من خجلك وكسوفك من اللي عملته؟ ما تقوليش إنك كمان نسيت "جناب"؟

- متفكرنيش بـ "جناب" واللي عمله فيا، بسببه اتعذبت في الدنيا وفي الآخرة.

فلما متلاقيش منه رجا، تسييه وتدور على "الشتفري الأزدي"، فتلاقيه ما بيتألمش أوي زي الباقيين، فتقوله:



- شايذك يعني مش بتتعذب زي ما باقي صحابك بيتعذبوا؟
- أه، اللي أنا فيه دا بسبب بيت شعر كويس قلته في الدنيا .
- تلفت تلاقي زميله في النار هو " ثابت القيسي " المشهور باسم " ناهل شر " اللي كان برضه زميله في الدنيا ، فتقوله :
- هو صحيح انت كنت بتنام مع وحوش كبيرة وغيلان؟
- فترة الجاهلية دي الناس فتت فيها كتير ، فاللي تشوفه انت عاقل وممكن يحصل صدقه ، واللي مش عاقل ، كذبه ، والزمن كله حاجة واحدة ، لم كان فيه حاجة حصلت أيام الجاهلية تأكد إنه كان هيحصل ثاني بعد كذا في أزمنة ثانية جديدة ولغاية آخر حفيد لآدم .
- يعني مش انت اللي قلت القصيدة اللي مطلعها: " أنا اللي نمت مع الغيلان . . . في أرض صحرا ما شافتش المطرة " ؟
- ما يردش عليك ، فتزهق منهم كلهم وتمشي من منطقة الجحيم وترجع على الجنة وتسببهم يتعذبوا للأبد .

(٧)

## الرجوع للجنة

- لما ترجع الجنة هتشوف أبونا "آدم" ، فتسلم عليه وتقوله :
- إزيك يا أبونا؟ فيه ناس قالوا إنك قلت الشعر دا :
- احنا ولاد الأرض دي . . . منها جينا وليها هنرجع  
مفيش فرح بيدوم لحد . . . وليل الحزن هينجلي ويلمع
- هو الكلام دا مطبوط ، واللي قالوه ناس بتفهم ، بس أنا أول مرة أسمع  
الصراحة .
- يمكن قلته ونسيت يا أبونا ، مانت مشهور عنك إنك بتنسى ، بدليل  
الآية : "ولقد عهدنا إلى آدم من قبل فنسى ولم نجد له عزما" . وفيه  
علماء بيقولوا إنك اتسميت "إنسان" من كلمة نسيان ، عشان كنت  
بتنسى كثير . دا حتى فيه ناس بتقرا الآية دي كذا : "ثم أفيضوا من حيث  
أفاض الناس (ي)" .
- يا ابني خليك عاقل شوية وانت بتتكلم . أنا كنت بتكلم عربي في الجنة ،  
بس لما نزلت الأرض ، اتحول لساني للغة السريانية ، ومنطقتش غيرها لحد

ما مت ، ولما ربنا وداني الجنة ثاني ، رجعلتي اللغة العربية ، يبقى بدسا .  
انت أنا قلت الكلام دا امتى وإزاي ؟ في الدنيا ولا الآخرة ؟ واللي قال الكلام  
دا كان لسه في الدنيا عشان قال " منها جينا وليها هنرجع " . هقوله إزاي في  
الدنيا وأنا كنت بتكلم سرياني ، وهقوله ليه في الجنة قبل ما أنزل لما أنا  
مكتنش أعرف حاجة اسمها موت أساسا ، ولو قلتها بعد ما رجعت الجنة ،  
يبقى ليه قلت : " وليها هنرجع " لما احنا بقينا خالدين في الجنة خلاص ؟

- فيه علماء تاريخ بيقولوا إن القصيدة دي كانت مكتوبة بالسرياني ،  
ولقاهم " يعرب ابن هود " اللي هو أول واحد اتكلم عربي ، وترجمها  
للعربي ، فمممكن عادي تكون بتاعتك . عموما هم كمان بيقولوا إنك  
قلت أبيات لما قتل " قابيل " " هابيل " بتقول :

*كل اللي عليها اتغير . . . والأرض بقى وشها أغبر وكالح*

*وراح أبو أحلى ابتسامة . . . مات وساب على الخد دمع مالح*

\_ والله أنا فعلا حزين للمستوى اللي وصلتوله لدرجة إنني بقيت لازم أثبت  
أنا قلت إيه وما قلتش إيه . أقول ثاني : مش أنا اللي قايل الحاجات دي ،  
الكلام دا أسلوبه لقرون بعدي ، واللي كتبه واحد فارغ معندوش حاجة  
يعملها . ويعني مش بس كفاية إنكم كدبتو على ربنا ، لأ ، كدبتو عليا  
وعلى أمكو حوا ، وحتى على بعضكو ، وحتى مكتوش مصدقين إنكم  
في يوم هتموتوا وترجعوا لربنا .

تكمل مشي في الجنة ، فتلاقي جنينة في منتهى الجمال ، فيها تعابن  
عمالة تلعب . فتستغرب أوي وتقول :

لا إله إلا الله، والتعابين بتعمل إيه في الجنة؟

فتقول حية منهم:

ما سمعتش أبدا قبل كذا عن الحية "ذات الصفا" اللي كانت وفية لإنسان مكش وفي ليها؟ أنا هحكيتها لك: كان فيه مرة حية عايشة في وادي مليان زرع، ومكش حد بيقدر يقرب من الوادي دا من خوفه منها، لغاية لما جه مرة أخين بيرعوا جمال، واحد من الأخين نزل الوادي بالجمال عشان ياكلوا، فهجمت عليه الحية موته، فراح أخوه زعل عليه أوي، وقال أنا هروح للحية دي ويا أخلص عليها يا تخلص عليا زي أخويا. لما الحية شافته جاي عليها قائلته: "بص، احنا نعمل معاهدة، لا تقتلني ولا أقتلك، وجمالك ترعى في الوادي زي ما انت عايز، وكمان هديك دينار كل يوم" قالها موافق. وفضلوا مستمرين كذا لفترة. الراجل اتغنى، وجماله تحنت وربرت. بس جه في يوم وقال لنفسه: "يفيد بإيه الغنى والفلوس، وأنا شايف الحية اللي قتلت أخويا عايشة جنبي؟" فقرر إنه يقتلها، فسن الفاس بناعه، وطلع يجري وراها عشان يقتلها، وضربها ضربة بالفاس فلت منها الحية بأعجوبة بس عملتلها جرح كبير في جسمها. هربت منه، فلما حس بالوحدة وبأنه خاين للعهد ندم، وطلب من الحية إنهم يعملوا معاهدة تانية، بس الحية قالت له إنها لا يمكن تأمنله تاني. الحية دي أنا، و"النابعة الذيباني" قال فيا قصيدة بتحكي كل قصتي.

فتقول حية تانية:

- أنا بقى كنت ساكنة في بيت "الحسن البصري" وكنت بسمعه وهو بيقرا القرآن بليلى، فحفظت منه انقرءان كله.

- هو صحيح إنه كان ينطق شوية كلمات في القراءان غلط؟
- أيوة صح، وأنا كمان كنت بنطقها زيه غلط، لكن لما مات ورحل  
 "أبو عمرو ابن العلاء" وسمعتة وهو بيقرأ، عرفت إن "البصري" كان  
 ينطقها غلط. لما "أبو عمرو" هو كمان مات، مقدرتش أقعد في المذاكر  
 أكثر من كذا، ورحل الكوفة وقعدت عند "أبو عمارة الكوفي" اللي هو  
 واحد من القراء السبعة المشهورين للقراءان، بس برضه لقيت عناء  
 غلطات في القراءة ما بيعملوهاش العرب.

انت يا شيخنا تعجب جدا بكلامها، فتكمل وتقولك:

- ما تخليك قاعد معانا شوية، والله لو وافقت، لأقلبك نفسي واحدة  
 مزة، لو دقت ربيقي هتعرف إنه أحلى من الخمرة والعسل، ولو شمت  
 ريحة نفسي، هتشم ريحة فل وياسمين، ولو غننا وقربت مني، هتحسن  
 بدفا وحنان عمرك ما حسيت بيه.

بس انت تخاف منها وتطلع تجري في الجنة وانت بتفكر "الواحد إزاي  
 يأمن حية متعرفش غير العض والسم؟"، فتناديك وتقولك:

- عموما ابقى تعالالي لو حبيت تستمتع بجدة. ولما تجرب، هتندم إنك في  
 يوم من الأيام في الدنيا ممكن تكون قتلت حية أو تعبان.

- دا أنا أبقي عيبط وربنا غضبان عليا لو سبت كل الحور العين اللي عندي  
 وجربت أنام مع حية.

وانت ماشي في غيطان الجنة، تلاقي الحورية اللي كانت خرجتلك قبل  
 كذا من الشجرة وتقولك:

· أنا مستنيك من فترة، انت كنت فين؟ أنا كنت مستنيك على نار، ونفسي أقعد أتكلم معاك. أنا المفروض ليا حق عليك، المفروض نقضي وقت مع بعضنا لوحدنا زي أي عريس وعروسة.

· كنت عايز أتكلم مع أهل النار وأسألهم عن شوية حاجات، وأول ما خلصت معاهم جتلك فورا. تعالي معايا نتمشى بين المسك والعنبر.

وانتو بتتمشوا بين جبال الجنة ورملتها، تقولك الحورية:

· شكلك عايز تقلد "امرؤ القيس" اللي وصف نفسه وحبيبته وهم ما شين بيحبوا في بعض.

- يا بنت اللذين! عرفتي منين إن أنا فعلا كنت عايز أعمل كدا؟ وعرفتي منين أصلا "امرؤ القيس" وانت أساسا ولا إنس ولا جن.

- ربنا قادر على كل شيء.

تفضل تفكر في وصف "امرؤ القيس" للجو الرومانسي اللي كان فيه مع حبيبته، فربنا يحولها لخلق حقيقة، وتطلع من النهر حوريات وأحلى واحدة فيهم تبقى شبه حبيبة "امرؤ القيس"، فتحتفلوا كلكو وتاكلوا أكل حلو أوي.

تمشي في الجنة فتلاقي بيوت أوطى شوية من البيوت اللي شفتها عادة في الجنة، فتسأل عن السبب فيرد عليك ملايكة من الجنة:

- دا مكان في الجنة للشعرا اللي كانوا بيستخدموا نوع "الرجز" في الشعر زي "العجاج" وابنه "رؤبة".

- سبحان الله، صدق النبي لما قال: "ربنا يحب الشغل الكويس، ومبيحبش الشغل اللي ملوش قيمة ولا وزن". والرجز دا فعلا من أسوأ أنواع الشعر، فبيوتكو بقت زي شعركو.

وتشوف "رؤبة" فتقوله:

- محدش كان عاجبه شعرك، وكنت بتستخدم كلمات وأنواع شعر محدث، بيعجبها، وعمرك ما قلت حاجة حلوة أو مفيدة الواحد ممكن يطلع بيها

- بقى تقولي أنا كدا؟ دا إذا كان "الخليل ابن أحمد" نفسه خد مني هو و"أبو عمرو ابن العلاء". انت نفسك كنت ساعات بتاخذ من كلامي وشعري وتستخدمه.

لما تلاقي الغرور واخده كدا أوي تقوله:

- احنا لو جمعنا كل شعرك وشعر أبوك، منطلعش منه بأي حاجة محترمة دا غير إني سمعت مرة إن "أبو مسلم الخرساني" سألك عن معنى كلمة "ابن ثأداء" معرفتش ترد عليه وطلعت تسأل عليها البدو. ومعرفش انت كنت بتاخذ هدايا وجوايز من الملوك على إيه، وكان فيه شعرا غيرك كثير أحسن منك وأولى بيها.

---

5 الرجز نوع من الشعر كل بيت ليه نهاية مختلفة، والاسم جاي من مرض كان بيعجي للجمال، بيخلي رجليهم تترعش، والشعر دا بيتعرش زي المرض. وزن الشعر دا: مستفععلن مستفعلا. مستفععلن... مستفععلن مستفععلن. (المترجمة)

أحسن ناس فيكو، وأحسن علماء اللغة كانوا بياخدوا من كلامي عشان  
بضربوا بيه الأمثلة، ولا انت نسيت؟

- صح، استشهدوا بكلامك، زي ما استشهدوا بكلام الهمج وقلالة القيمة.
- ما هم ياما خدوا كلام من بق عيال وسنات جهلة ما يفهموش حاجة.
- انت جاي تتخانق ولا إيه؟ روح شوف حالك وامشي من هنا.
- انا بس حبيت أعرفك إن شعركو مينفعش يتسمى شعر أساسا.
- "يتنازعون فيها كأسا لا لغو فيها ولا تأثيم" وانت كلامك كله "لغو" وفارغ.

تكبر الخناقة ما بينكو ويسمعكو "العجاج" فيجي يحجز ما بينكو.

وتفتكر كلام الناس في الدنيا عن التتميل اللي بيعي بعد شرب  
الخمرة، فتطلب من ربنا إنه يجيلك نفس التتميل دا بس من غير ما تسكر ولا  
عقلك يروح منك. شوية وتحس جسمك كله ييفك وكأن فيه غل ييمشي  
على عضمك وتفتكر كلام "إياس ابن الأرت":

لو شربت خمرة زبي... وحسيت بنفس التتميل  
كنت عذرتني وعرفت إنني... عندي حق أشرب كثير

وتفرد جسمك على سجادة معمولة من الحرير، وتؤمر حور العين  
إنهم يشيلوك ويخطوك على سرير من سراير الجنة اللي معمولة من الجواهر  
والذهب. مثبت في جناب السرير دا حلقات ذهب، عشان الولدان  
المخلدون وحور العين يعرفوا يشيلوه منها ويودوك على مكانك في الجنة،



وكل ما تعدي على شجرة، ترشك أغصانها بمية الورد المخلوط بالكافور .  
وتناديك الفواكه، وانت نايم على ضهرك: "مش عايز تاكلني يا ابن  
القارح؟" فلو نفسك هفتك مثلا على عنقود عنب، تلاقيه اتقطع .  
الشجرة بقدرة قادر وبقي في بقك، وتحمد ربنا على نعمه زي ما ربنا قال  
"وأخر دعواهم أن الحمد لله رب العالمين" .

وتفضل كدا وقت طويل جدا، في نعيم أبدي، من غير ما أي حاجة  
تنفص عليك متعتك .

وعموما أن طولت عليك في الجزء دا، ونرجع بقي دلوقتي للرد علم  
الجواب بتاعك .

(٨)

## رد المعري على كل جزء في جواب ابن القارح

أنا فهمتك كويس يا شيخنا لما كلمتني في جوابك عن حبك ليا.  
فهمت إنك مش قاصد بيه أي نوع من أنواع النفاق، عشان انت إنسان  
بتقول الحق ولو على رقبتك. ودي ميزة ربنا خصك بيها دونا عن باقي  
الناس. باقى الناس بقى الكذب في بقهم زي اللبانة، وبقوا مبدعين فيه  
أوي. يعني لو الملكة "شيرين" ملكة الفرس قالت لجوزها "كسرى" إنها  
فداه، برضه هتكون بتكذب. ودا رغم إنه عمل حاجات كتير عشانها،  
وعامل المسيحين بجنية وحب لمجرد إنها كانت مسيحية، ورفعها من عيشة  
كلها فقر وقرف لعيشة الملوك والهوانم، ومكتش بيصدق أي كلمة تنقال  
عليها رغم إن صحابه في مرة قالوله: "انت إزاي يا جلالة الملك، اخترت  
من كل ستات الدنيا، الست الفاجرة دي بالذات عشان تنجوزها؟" فراح  
الملك جايب كاس مليون دم وشعر وحاجات مقرفة، وقدمه لواحد من  
صحابه المعترضين على الجوازة، وقاله:

- تشرب؟

- لأ طبعاً، أنا مشربش القرف دا.

فدلق الملك الوساخة اللي كانت موجود في الكاس وغسله كويس و -١٠-  
فيه غسل ونوع من أحلى أنواع الحمرة، وعرضها عليهم، فكلهم اتلموا ما  
الكاس عشان يشربوا، لأن مفيش حد عاقل يرفضه. فقالهم: "الكاس  
زي "شيرين"، وانتو من هبلكو وجهلكو رفضتوا تاخذوه في الأول".

شوف فيه كام شبل نافق أسد، وشبل يعني ابن الأسد، وأنا عارف  
طبعاً إنك عارف معناها، أنا بس خايف لحسن الرسالة تقع في إيد شبل  
جاهل وميفهمش يعني إيه شبل. وشوف فيه كام ملك عملوا كل اللي  
يقدرؤا عليه عشان مرتاتهم، وفي الآخر ودوهم في ستين داهية. دا حتى  
الفراخ نفس النظام: تلاقيهم بيراعوا بعض ويبساعدوا بعض، لكن جوه  
قلوبهم غل وكره غريب ويتمنوا الشر لباقي الفراخ ويبقى نفسهم يشوفوهم  
مدبوحين.

وكمات قتلتي يا صاحبي وحبيبي باللي دايماً على بالي، إنك بتحبني  
ومشتاق تشوفني زي حنين الناقة لولادها اللي لو بعدوا عنها شوية بس تقعا.  
تزوم وترغي عشان عايزة تشوفهم، أو زي الحمام مع وليفه. أنا مرة قبل كدا  
سمعت إن هديل حمام الأيام دي عبارة أصلاً عن دموع، لأنهم بيعيطوا على  
باقى الحمام اللي مات من غير أي ذنب في طوفان نوح، وإنهم لغاية دلوقتي  
عندهم وفاء لصحابهم اللي ماتوا، لكن مين يعوضهم اللي راحوا؟ ومين  
أساساً يقدر يعتب على الزمن وقسوته؟

مفيش أقل من الناس الشرفا في زماننا دا، ولو الناس كانت تقدر تبيع  
الشرف والأمانة والصدق، كانت باعتهم وكسبت من وراهم ذهب.  
والشاعر اللي قال:

أنا حبيبي ما بيزهقش مني . . . ولو غبت عنه ، عمره ما بيعيني  
أكيد مكنش في وعيه وهو بيكتب الكلام دا ، أو مكنش لسه شاف  
الوش الثاني للدنيا .

وأنا حابب أشكرك على مديحك ليا ، ربنا يحملك يارب من كل سوء ،  
بس ما أقدرش أقبله ، لأنه كذب ، ولو قبلت عن نفسي كذب عاجبي ،  
يبقى لازم أقبل عن نفسي كذب مش عاجبي ، زي كدبة إني بشرب خمرة  
مثلا . بس إن شاء الله ربنا هيجازيني على صبري على كذب الناس دا .

وأنا عايز أحلفلك زي ما " امرؤ القيس " حلف لحبيته وقال :  
والله ما أقوم من جنبك . . . ولو قطعوا راسي قدامك

عايز أحلفلك وأقولك إن الناس غلطت لما مدحتني وتخلوا كم  
معلومات ومعرفة عندي مش حقيقين ، وكل دا تأليف وكذب ، زي ما  
ألفوا حكاية الغول أو الضبع اللي بيتكلم . وفاكرني إني من أهل العلم ، وأنا  
ولا عندي علم ولا بتاع ، العلم عايزله حد يدرسه ويطبقه ، وأنا مش  
كدا . وفاكرني برضه من أهل الدين . ولو عرفوا الحقيقة مش هيكثفوا بس  
بضري ، دول هيشربوني سم عشان يخلصوا مني .

ولو كنت أنا معرفتش إيه اللي الناس بيقلوه عني ، مكنتش تعبت  
نفسي دلوقتي بالرد عليهم عشان يعرفوا إن كل دا كذب . كنت هفضل  
ساكت زي الأصنام ، أو زي الأرض اللي مش فارقة معاها إنهم يقولوا  
عليها دي أرض بور أو خصبة ، أو حتى زي الدبiche اللي مش فارق معاها  
إذا كان اللي هاياكلها شايف إنها مليانة دهنة أو إن الجزار شايف إنها رقيقة .

وأنا أساسا هتبسط إزاي وهم عمالين يقولوا عليا كلام كاذب ،  
وينسبولي حكمة وعلم مش عندي؟ وأنا أخاف إنني أوافق على كلامهم ،  
الآخر أتفصح ويبقى منظري وحش أوي . زي حكاية الراجل اللي افتكر  
إن معاه فلوس كتير أوي ، فطلب منه السلطان مرة إنه يديله شوية  
فلوسه ، فالراجل قاله إنه معندوش فلوس ، فافتكره السلطان بيكد  
وفضل يعذب فيه عشان يعترف لغاية لما مات في ايديه .

وأنا والله ما بزعلش من اللي بيقول فيا كلام وحش ، على الألف  
بيعرفوني حجمي الحقيقي . وربنا إن شاء الله يسامح اللي كذبوا بحسن نية  
ولولا إنني ما بحبش أختلط بالناس وعايذ أموت لوحدي خالص ، كذ  
جبت كل الناس اللي قالوا عني كلام كويس عشان يعيشوا معايا ويشوفوني  
على الطبيعة ويعرفوا إنني مكتتش أستاهل كل دا .

أما بخصوص رجوعك لمدينة " حلب " الجميلة ، ربنا يحميها يا رب ،  
فأنا والله بحبها وبعزها كأنها إنسان بيحس ويفهم . وبحب فيك حبك ليها ،  
وإن انت مهما بعدت مش بتنساها وبتتمنى ترجعلها وما بتلاقيش راحتك  
وفرحتك غير فيها . عامل زي قصة البقرة الوحشية اللي خدت ابنها الصغير  
في مكان بعيد عن التعالب والديابة ، ولما اتطمنت إن مفيش أي خطر ، غابت  
لمدة ثانية ، ولما رجعت ملقتش ابنها . كانت هتجنن وقعدت تعيط وتقول :  
" يا رب ، لو فيه ديب أو تعلق خده ، ما تخليهوش يتألم أو يتعذب ،  
وعوضني عنه يا رب " . وفي عز ما هي عمالة تدعي ربنا ، سمعت صوت  
جاي من وسط الزرع ، فراحت عند الصوت فلقت ابنها مستحي في الزرع  
ومفيش أي حاجة حصلته ، فقرحت جدا وضحكته رجعت تجلجل .

ومفیش بلد فی الدنيا هتفرح عشان ابنها اللي غایب عنها رجع ، زي ما  
حلب أكید فرحت برجوعك لیها یا شیخنا، حتی وإن كانت الفرحة دي  
مش ملحوظة . وربنا دائما یحب حلب ویرزقها بعلماء زيك فی الأدب  
هشان یرفعوا اسمها دائما لفوق .

وأنا بستغرب إزاي ممكن مجموعة من الناس یتجمعوا علی فكرة هم  
مش قادرین یشتوا صحتها، ومش متأكدين إذا كانت كویسة ولا لأ، أو  
بتقربهم من الحقيقة ولا لأ . أنا نفسي كنت مرة هنضم لجماعة العدميين<sup>6</sup> ،  
بس خفت . قعدت أفكر هعمل إيه لما هقف قدام ربنا وأنا لسه مصلحتش  
نفسی . مرة الناس راحوا لواحد حكيم وقالوله : " فلان الفلاني انتحر ، ما  
استحملش الدنيا ، ومكنش عايز یعمل حاجة غلط ، وكان عايز خلاص  
یروح العالم الثاني الجمیل " . فرد علیهم الحكيم : " الولد دا غلط فی اللي  
عمله ، كان لازم یصبر علی الزمن لغاية الآخر . محدش یعرف دلوقتي هو  
هیروح فین ولا مصيره إيه ، ولولا حكمة ربنا وقدرته فی إنه یمنع الإنسان عن  
الإنحجار بإنه یزود خوفه من الموت ، كان كل واحد معرفش یسيطر شویة  
علی غضبه أو یأسه انتحر " .

أما "أبو قطران الفقعی" فهو شاعر معروف بأشعار الغزل والبطولة ،  
وكان ملوش غیر فی النسوان والكلام الفارغ . وأنا متأكد إنك یا شیخنا  
بتفضل شعراء تانیین عن "الفقعی" زي "الشیباني" رغم إنه أطرش ، أو  
"أبو الحسن الأشرم" رغم سنانة المكسورة . المهم ، "الفقعی" دا كان

---

6 من معانی العدمية إن الواحد ما یقاش فارق معاه الوجود من عدمه ، أو إذا كان فی هدف للحياة  
ولا لأ ، أو إذا كان ربنا موجود ولا لأ .

يحبب "وحشية" بجنون، وتعب أوي لما ضاعت من إيدته. هو صحيح الحب عذاب، بس هو كان حظه حلو إنها ماتت، لأنها لو كانت فضا. عايشة وهو اتجوزها وعاش معاها ١٠٠ سنة حتى، كان أكيد زهق ومل الآخر، وكان كل الحب دا هيبقى قرف ونكد، وهيبقى هو أول واحد بيدعي عليها إنها تغور من وشه، وهي شرحه. بس الواحد إزاي يلوم علم ناس بالشكل دا. وحكمة ربنا كبيرة في إنه ما بيحاسبش اللي ما يعرفش، زي ما بيحاسبش برضه النايمين على اللي بيشفوه في أحلامهم.

وبعدين إزاي واحد زي "الفقعسي" تقارنه ببيك يا شيخنا في وفاءك؟ دا انت وفاءك يزيد ويغطي حتى على "السموول" اللي لما "امرؤ القيس" ساب عنده أسلحته، مرضيش يسلمها لأعداءه وسلم بدالها ابنة "السموول" كان لو شاف "الفقعسي" كان عرف إنه ملوش أمان وغدار والناس تشهد إن راجل ملوش لازمة، وآخره الخدامين والعبيد اللي بيقتد معاهم.

ويمكن لو كان شاف واحدة تانية أحلى من "وحشية" ولو بحبة صغيرين أوي، كان نسيها بسهولة ولا سأل فيها أساسا. هو عامل زي الجمل اللي لما ما يلاقيش حاجة عدلة ياكلها، يشوف حتة الخشبة الناشفة كإنها وليمة بحالها.

لكن انت يا شيخنا قعدت مع ملوك مصر، مصر اللي فرعون قال فيها: "أليس لي ملك مصر وهذه الأنهار تجري من تحتي أفلا تبصرون"، وبرضه قعدت في العراق فترة طويلة، وخدمت الأدب العربي كثير. وتأثير الثقافة الإيرانية على العراق كان كبير- الإيرانيين ناس ظريفة وعندهم شرف

ونخوة، وأهل كرم، ويحبوا الأكل، وأكد انت برضه قعدت معاهم  
وخذت منهم كثير، وعشان كذا أكيد هم عاملوك كويس وقدمولك  
كاسات متزينة تشرب فيها زي الملوك، زي ما قال "أبو نواس":

قدمولنا الخمرة في كاسات ذهب . . . متزينة برسومات من إيران

وعليها رسومات ملكية لـ "كسرى" . . . وأقواس ما سكها فرسان

على العكس بقى، "الفقعي" دا كان بخيل جدا، كان يشيل الخمرة بتاعته  
في أماكن فقيرة، ويقدمها للناس في كبايات عادية، وكان بياكل أكل مقرف.

وأنا معنديش شك إنك يا شيخنا لو كنت اتكلمت مع "أبو الأسود  
الدؤلي"، رغم إنه كان أعرج ورغم الحكايات اللي كانت الناس بتحكيها  
عن بخله، كنت حبيته أكثر من حب "قيس" لـ "ليلي". ولو كنت  
حضرت مرة أي ندوة لعالم اللغة "الأخفش الكبير"، كنت شفته أحسن  
عالم في الدنيا وحبيته جدا. وكان هيحصلك نفس الحاجة مع شعراء وأدباء  
وعلماء كثير زي "الأخفش الأوسط" وحتى "أبو عبيدة" اللي كان  
معروف عنه ريحة بقة الوحشة، بس لو كنت سمعت الدرر اللي بيقولها،  
كان ممكن تبوسه من بقة.

أما على حكاية إنك لقيت كل أصحابك راحو لما رجعت حلب، فدا  
حال الدنيا، مفيش حد في آمان منها، وبتحول البيوت العمرانة لقبور،  
ومحشد يقدر يهرب من الموت. بصراحة الموت رحمة للميت، لأنه يبعد عن  
شر الدنيا وبيراتح منها. وعلى رأي الشاعر:



عرفت إنني أخري حفرة . . . مفيش بعدها خوف ولا ألم  
هروح " البيت " وفضل هناك . . . يبقى على إيه القلق والندم؟

ولسه فيه لغاية دلوقتي عرب بيقولوا على القبر بيت ، ولما حد يموت ،  
يقولوا : " هنروح ندفنه في البيت " أو " هنبنيله بيت " .

أما عن الشخص اللي مدحني ليك بس انت نسيت اسمه ، وقالك إنني  
أحسن من " سيبويه " و " الخليل " ، ربنا يساعه مين ما يكون على الكذب  
اللي قاله ، وبعتر للمرة الألف على مديح الناس وكذبهم وعلى ذنب  
مليش يد فيه . وأنا والله بكره الكلام دا ، كره المسيح للناس اللي عملوه إله ،  
رغم كل محاولاته في نفي الإشاعات دي عنه ، والدليل الآية اللي بتقول  
" وإذ قال الله ياعيسى ابن مريم أنت قلت للناس اتخذوني وأمي إلهين من  
دون الله قال سبحانه ما يكون لي أن أقول ما ليس لي بحق إن كنت قلته فقد  
علمته تعلم ما في نفسي ولا أعلم ما في نفسك إنك أنت علام الغيوب " .

أما معرفة " أبو الفرج الزهرجي " بيك يا شيخنا ، فدا يدل على إنه  
يفهم في الأدب ومثقف وإنسان لطيف . وكان نفسي الجواب اللي بعتهولي  
" الزهرجي " يوصلني ، ولكن زميلك في الرحلة سرقها ، مكنتش كفاية عليه  
الهدوم والفلوس ، ويسيب الجواب في حاله ؟ إلهي إيده تنقطع وميتهناش في  
دنيته أبداً . حتى لو كان اللي سارقها واحد من العرب المشهورين ، برضه مش  
هسامحه لأن اللي عمله دا حاجة كبيرة أوي وما تتقدرش بكنوز الدنيا كلها .

عموما ، " أبو الفرج " وابنه عملوا طيب إنهم فرجوك على الكتب  
اللي عندهم وسألوك عن رأيك ، لأن بفضل مساعدتك ليهم ، علمهم اللي

كان زي نقطة المية، بقى بحر، وعرفوا واتعلموا منك حاجات كتير أوي.  
الواحد فعلا لازم يدي العيش لحبازه<sup>7</sup>.

ولو كنت تعبت يا شيخنا من زحمة حلب، فمممكن تروح تريخ نفسك  
شوية عند نهر "قويق". دا نهر بديع، ومحدث بيغرق فيه، ولا بيزهق منه.  
الناس بتصطاد منه بناته السمكات الصغرين. هو يربي ويراعي، والزمن  
يخطفهم منه. رغم إن سمكاته ما كنوش أبدا عايزين يخرجوا من ميته،  
ولكن نصيهم كدا: إن تكون آخرنهم شبكة تلمهم كلهم، وما يحسش  
"قويق" الغلبان بيهم. و"قويق" ما بيغضبش ولا بيغير، لأنه ما يقدرش  
يعمل حاجة. وما ييفرقش معاه مين يصطاد منه، سواء عربي ولا رومي.  
وشعرا كتير قالوا في النهر دا شعر، زي "البحري" و"الصنوبري". بس  
أظن إن شيخنا كان بيرتاح برضه عند دجلة والفرات في العراق.

عموما حلب دي زي ما تكون أم حنينة على عيالها، الناس فيها  
فرحانين، وعمرها ما بتظلم ولادها.

وقد يكون برضه يا شيخنا إنك لما اتكلمت عن حكاية "وحشية" دي  
كنت تقصد بيها تدي مثال على كل صحابك ومعارفك اللي راحوا منك.  
أصل ساعات العرب بيعملوا كدا، بيقولوا اسم راجل أو ست على أي حد  
حصله نفس الموقف، زي مثلا اللي يقول "كأنك يا أبو زيد ما غزيت" على  
أي حد، حتى لو ما كنش اسمه أبو زيد أو مش راجل أصلا.

---

7 الجملة دي هي ترجمة الجملة اللي في المقدمة.

أما شكوتك ليا بخصوص الناس اللي بيدعوا العلم وهم صفرءاء  
الشمال، فأنا زيك بالظبط، تعبان وزهقان منهم، والحمد لله إن فيه ناد  
زيك عشان ألاقى حد يفهمني، على رأي المثل ما يحشش باللي عنده مص  
إلا اللي عنده زيه، أو زي ما قال الشاعر :

صرخ التايه في الصحرا . . . وما سمعه إلا تايه زيه

واحنا الاتنين الحمد لله تايهين، ومش عارفين نروح لمين يدلنا علم  
الطريق بخصوص الناس دي . وفوق كل دا، الطريق طويل وركوبتنا بطيئة .  
وعلى رأي اللي قال :

الجميل يشكيلي من طول الطريق . . . اصبر يا جملي، كلنا في الهم سوا

وهو إيه الفائدة لما شجرة تشكي لأختها من ضربة الفاس؟ وأهل  
الأدب في كل جيل ما يبطلوش شكوى من اللي قبلهم أو حتى من اللي  
معاهم في نفس الجيل، ويكتبوا حكاياتهم في كتب . وانت أكيد عارف  
حكاية "عبد الملك الفزاري" اللي ساب في وصيته جزء من فلوسه لأهل  
الأدب، وقال: "أصل شغلانتهم دي الناس بتهجرها، ومحدث بيهتم بيهم  
ولا بيقدرهم، ومنهم اللي بينجح لفترة بس بعد كدا يقع على جدور  
رقبته" . واللي عايز ياكل عيش من الشغلانة دي زي بالظبط اللي يشيل  
المية في إزازة مخرومة . حتى "سبويه" لما عرف إن العملية مش جاية همها،  
راح اشتغل في حاجة تانية، و"أبو تمام" مات موة تصعب على الكافر في  
"الموصل" في العراق .

أما الناس إياهم اللي انت قلت إنهم يغلطوا كثير في النحو وانت خايف تواجههم ليتلموا عليك ويغلطوك انت ، فهم شوية جهلة وظلمة .  
التعالب ما بتفوتش أي فرصة لو تقدر من غير ما تأذي الأسد ، عشان كذا دائما هم عايزين يأذك ، عشان غيرانين من علمك يا شيخنا ، وانت مش المفروض تهتم أساسا بالناس اللي من النوعية دي . وعلى رأي الشاعر :

وإيه يضر البحر لو . . . عيل رمى طوبة فيه

وهيفضل شوية الهمج دول يقولوا كلام جاهل ، لكن أهل العلم والأدب اللي بجد عارفين الصح فين . ومن الآخر كذا ، الحسد ما بيأذيش إلا صاحبه .

أما بخصوص " المتنبي " والبيت بتاعه اللي ذكرته اللي يقول :

مفئس أحقر من أهيل الزمان دا . . .

فهو عموما راجل بيحب التصغير زي عينيه ، ويستخدمه كثير أوي ، زي ما قال في شعره :

" يا حُبِيبَة قلبي " ، " أحيمق " ، " الخويدم " ، " شويعر " ، عشان يصغر " حبيبة " ، " أحق " ، " الخادم " ، " شاعر " .

وخد عندك من دا كثير في ديوانه . وعموما التصغير مش وحش ، هي بتبقى زي لازمة عند الكاتب أو الشاعر ، وبتدي جمال مخصوص للقصيدة ، زي الشامة الحلوة اللي بتبقى في الخد .

أما بخصوص البيت إياه ، فهو قاله في " علي ابن سيار " في أنطاكية ، قبل ما يمدح " سيف الدولة علي ابن حمدان " ، والشعرا عموما يجوزلهم

يعملوا كذا، بدليل الآية اللي بتأكد على إنهم بيغيروا كلامهم وملهش.  
موقف ثابت: "ألم تر أنهم في كل واد يهيمون، وأنهم يقولون ما لا يفعلون".

وكلمة أهل عموما معناها جماعة، فلما حد يقول: "السلام عليكم يا أهل الدار" يبقى قصده يسلم على كل الموجودين مش واحد بس، بس ساعات بتستخدم لشخص واحد بس، زي ما نقول مثلا: فلان دا أهل كرم وأهل خير.

أما الحكاية اللي قالها "القطربلي" و"ابن أبو الأزهر" عن "المتنبي" ممكن تكون حصلت، وإن كان محدش يقدر يجزم إن "المتنبي" اتحبس في العراق، لكن في الشام دا مؤكد ومعروف للناس كلها.

واتقالى إنه لما كان حد بيسأل "المتنبي" عن معنى اسمه دا، كان بيقول إنه جاي من "النَّبوة" يعني حته أرض سطحها عالي شوية عن الباقي. وهو فعلا كان أعلى من باقي الشعرا اللي زيه، وربنا له حكمة في كذا أكيد، والموضوع في الآخر حظ، ومش لازم يكون آخرة المجهود دايما نجاح.

وهو في ديوانه كان فيه شوية أبيات بتبين إنه كان حاسس إنه أعلى من اللي حواليه، زي البيت اللي بيقول:

*أنا ما بخدش أوامر غير من ربنا*

بس مش كل اللي الناس بتقوله بيكون هو فعلا اللي بتعتقده، لأن الناس كدابة بالفطرة، ويمكن تسمع كلام من واحد ونحس إنه في منتهى الدين، بس هو في الحقيقة بيستخدم الدين كمكياج له عشان الناس تمدحه

أو عشان نفسه يوصل لحاجة من حاجات الدنيا . أو ناس تعمل نفسها  
مندينة ، وهي من جوة ملحدة .

وأنا معنديش شك إن الشاعر " الخزاعي " ملوش في الدين ، وكان  
هامل نفسه شيعي ، وهو كل غرضه إن ياخذ فلوس من العملية دي ، وعمل  
لنفسه نسب لأئمة الشيعة ، وهو أساسا كان مصاحب " أبو نواس " وماشي  
وراه في كل حاجة .

والناس اختلفت على " أبو نواس " ، يعني فيه منهم اللي قال إن كان  
بيصلي كثير ، بس كان بيصلي صلوات الصبح بليل . لكن في كل الأحوال ،  
هو كان ماشي مع التيار اللي كان ماشي معاه باقي الناس وقتها .

يعني النبي لما جه بين العرب ، كان كل همهم في الوقت دا هو الشعر ،  
ومش فارق معاهم أي حاجة تانية غيره . فيه ناس مشيوا ورا النبي ، بس الله  
أعلم نيتهم كانت إيه . لما الإسلام انتشر ، والعرب اختلطوا مع أهل البلاد  
التانية ، وسمعوا أهل العلم والمنطق ، والدكاترة والعلماء . ناس كثير منهم  
سابوا الإسلام .

والإلحاد موجود في كل العصور ، لدرجة إنهم يقولوا إن لما آدم كلم  
ولاده عن الآخرة والجنة والنار ، قالوله انت كذاب ومصدق هوش ، ومن  
يومها لحد النهاردا والناس بتلحد وهتفضل تلحد .

فيه ناس بتقول إن باشاوات قريش كانوا ملحدين ، وعندهم حق  
يقولوا عليهم كذا ، كفاية القصيدة اللي قالها " شداد ابن أسود الليثي " عن  
اللي ماتوا في غزوة بدر :

جت وسلمت علينا . . . ردوا السلام على "أم بكر"  
كفاية كلام عن باشاوات . . . قریش اللي ماتوا في بدر  
ومش مشرب ثاني خمرة . . . بعد موت أخويا هشام  
وقولوا للرحمن إن أنا . . . مليش ثاني في الصيام  
إزاي الراس بعد ما تقطع، يقولنا . . . "ابن كبشة" <sup>١</sup> إن صاحبها هيجيا نانم  
ومنعش الموت عني ليه أساسا . . . لما انت ناوي تحييني بعد ما تدوب عضائك  
وبصراحة ما يقولش الكلام دا إلا اللي ما بيخفش من الموت وبيشج  
شجاع وقت المعارك .

وتحكالي إنه أيام ما كان "المتنبي" عنده أملاك في منطقة "صف" <sup>٢</sup>  
"معرة النعمان"، شافوه وهو بيصلي في مكان اسمه "كنيسة الأعراب"،  
وإنه صلى ركعتين بس في وقت صلاة العصر. بس يمكن كان مسافر وعشاه  
كدا قصر في الصلاة.

وناس ثقة برضه قالولي إنه راح عند "بني عدي" وحاول يقنعهم إنه  
نبي، فقالوله: "طيب، الناقة دي صعبة أوي، لو قدرت تركيبها، هنصدق  
إنك فعلا رسول من عند ربنا". "المتنبي" راح عند الناقة دي، وعمل شوية  
حركات لغاية لما قدر فعلا يركبها. الناقة انخفضت في الأول بس بعد كدا  
هديت ومشيت معاه، فلما دخل على "بني عدي" وهو راكب على  
ضهرها، استغربوا جدا، وصدقوا فعلا إنه رسول.

---

8 اسم كانوا يبندهوا بيه النبي .

وانحكالي برضه إن "المتنبى" كان قاعد مع مجموعة كتاب في "اللاذقية". فواحد من الكتاب اتمور تعويرة جامدة أوي وهو بيسن القلم معاها بالسكينة، فراح "المتنبى" فوراً تف على الجرح وقال للراجل: "ما نلمسش الجرح خالص النهاردا، وابقى تعالالي أشوفها بعد كام يوم". ولعلا الكاتب سمع كلامه، والجرح خف. فبقوا مصدقين إن فعلا "المتنبى" يعمل معجزات وبقوا يقولوا إنه زي اللي بيحي الأموات.

وفيه راجل قال إن "المتنبى" استخى عنده في "اللاذقية" أو في مدينة نانية ساحلية، وكان "المتنبى" عايز يروح مكان ثاني، فخرج معاها، فطلع عليهم كلب وقعد يهوهو عليهم فترة وبعدين مشي، فـ "المتنبى" قال للراجل دا: "لما ترجع، هتلاقي الكلب دامت". فلما رجع الراجل لقي فعلا الكلب ميت. ومش بعيد المتنبى يكون حط للكلب سم وما قلش للراجل، وفيه أنواع كتير من سم الكلاب كانت معروفة في الفترة دي.

أما حكاية إن "القطربلي" و"ابن أبو الأزهر" يألفوا مع بعض كتاب فغريبة حبتين. وما سمعتش عن الحكاية دي قبل كدا. بتفكرني بحكاية الاتنين شعرا اللي بيسموهم "الخالديان": "أبو بكر محمد" و"أبو عثمان سعيد". كانوا مرة عند "سيف الدولة" ومشيو من عنده غضبانين. كان ليهم برضه ديوان مشترك، صعب أوي إنك تطلع فيه أي اختلاف في أسلوهم، وكان شخص واحد بس اللي كتبه. ودا غريب، لإن الإنسان بطبعه مختلف، ومفيش حد بيبقى متفق مع الثاني بنسبة ١٠٠٪.

اللي معقول شوية، إن واحد يتندي في كتاب ويكملة الثاني، زي حكاية "أبو سعيد السيرافي" اللي يقولوا إنه كتب في كتابه "المقنع أو



الإقناع" لغاية فصل التصغير، وبعدين مات، فكمّل ابنه "يوسد".  
الكتاب. ويمكن يكون دا حصل فعلا، مفيش مشكلة.

وكمّان فيه ناس ثقة قالولي إن "الموجز" اللي كتبه فعلا هو العالم  
النحوي "أبو بكر ابن السراج البغدادي" وإداه بعد كدا لـ "أبو سامي  
الفارسي" عشان يكمله. "الفارسي" غير شوية حاجات من هنا ومن  
هناك، وانتقال بعد كدا إن "الموجز" بتاعه.

الناس اللي كانوا بيحاولوا يحددوا تاريخ ديوان "المتنبي" قالوا إنه  
اتولد سنة ٩١٥ ميلادي، وإنه راح الشام سنة ٩٣٣ وقعد هناك فترة صغير.  
وبعدين طلع على العراق، وبرضه ما قعدش هناك كثير. والدليل على إن  
الكلام دا مظبوط هو إن شعره في الفترة دي كان بيمدح فيها أهل الشام.

وأما حكاية شكوته من زمنه وأهل زمنه، فهو كان مجرد ماشي مع  
نفس منهج الشعرا القدام مش أكثر، والشعرا القدام كانوا متعودين يشتموا  
كثير في الزمن، لغاية لما النبي قال: "ما تسبوش الدهر عشان ربنا هو  
الدهر". والحديث شكله سهل من برة، لكن من جوة فيه مفهوم ثاني جديد  
ومهم أوي، وهو إن محمد هو أول نبي يقول إن الزمن هو ربنا، ومكنش حد  
قبل كدا طلب من الناس إنهم يعبدوا الزمن، أو إن الزمن هو اللي خلقهم.  
وربنا قال في كتابه: "وما يهلكنا إلا الدهر".

وانت يا شيخنا اشتكيت إن مفيش حد عاقل يشتكي من حاجة مش عاقلة  
زي الزمن. ودا عشان فيه ناس فاكرة إن الزمن مجرد حركة أفلاك، حتى  
"سيبويه" كان كاتب في كتابه إن الزمن عبارة عن مجرد ليل ونهار وبيعدوا.

أما بالنسبالي ، فأنا عملت تعريف للزمن دا ما اعتقدش إن فيه حد قاله لبلي ، أو يمكن قالوه بس أنا مسمعتهوش . بالنسبالي ، الزمن عبارة عن حاجة أقل جزء فيها شامل كل حاجة ، على عكس المكان ، أكبر جزء فيه لا يمكن يكون شامل كل حاجة . أما الكون فشامل كل حاجة ، بغض النظر هن كونها كبيرة ولا صغيرة .

واللي قالوا : " وما يهلكنا إلا الدهر " وغيرهم من اللي اتكلموا عن الزمن أو شتموه ، مسمعناش إن حد منهم قال عن الزمن عاقل أو قدمله قرايين ، مجرد بس إنهم ورثوا النوع دا من الشعر من أجدادهم جيل ورا جيل مش أكثر . وكان الشاعر " عبد القيس " مسمينه " شاتم الدهر " ، وكان ليه أبيات بتقول :

ولما عرفت إن الزمن طريقه واعر . . . ولما ورلنا وشه المقرف القبيح  
وجبهته اللي عاملة زي القرد . . . ودقنه اللي ملوية زي التعابين  
افتكرت أمواتنا الله يرحمهم وقلت . . . : ياريتني أبقي معاهم دلوقتي من المتيين  
أما غيظك يا شيخنا من الملحدين ، فربنا يجازيك عليه خير إن شاء الله ، ويكتبها لك في أعمالك الصالحة ، زي ما هيجازيك إن شاء الله على صبرك على العطش والحر وانت بتحج ، وعلى الليلة الصعبة اللي قضيتها في " المزدلفة " . وأنا متأكد إنك دعيت ربنا وقتها إن يثبت الإسلام وينصره ويزود نور المؤمنين . لكن الإلحاد مرض قديم ومنتشر بين الناس من زمان ، وفيه شوية علماء وفقهاء يقولوا إن إذا فيه واحد أُلحد ورجع للدين تاني عشان خايف من القتل ، توبته ما تتقبلش . الكفار والمرتدين موضوعهم مختلف ، عشان المرتد لو رجع يتقبل منه الرجوع عادي .

ومفیش دیانة ولا ملة إلا وفيها ملحدین ، ویعملوا نفسهم إله ، موافقین علی شریعة دینهم ، بس هم فی الحقیقة غیر کذا . والناس اللی ... کذا لازم یتفضحوا وتتعرف نیتهم الحقیقیة ویتعاقبوا علی کذبهم .

وكان الملوك فی ایران بیقتلوا الملحدین ، وكانوا الملحدین اس ... "الدهریین" ومکنوش مؤمنین لا بالأنبیا ولا بالكتب المقدسة .

أما الشاعر الملحد "بشار ابن برد" فكان زیه زی باقی الملحدین . ومع ... بيقولوا إنهم لقوا فی کتاب من کتبه ، حته ورقة مکتوب علیها : "أنا کنت ... أشتم فلان الفلانی الهاشمی فی أشعاری ، بس ساحتہ عشان من قرایب النبی "

وكان بيقولوا إنه كان علی خلاف مع "سیبویه" ، وحضروا ... اجتماع عند "یونس ابن حبيب" ، فسأل "بشار" الناس اللی فی الاجتماع

- فیکم من یکتُم السر؟

کلهم ردوا علیه فی نفس واحد :

- فی بیر .

فراح مسمعهم قصیده بتقول :

یا قبيلة أمیه اصحوا وفوقوا من نومتکو . . . الخلیفة بقى هو الوزير

" یعقوب ابن داود "

والخلیفة الحقیقی بقى ملوش وجود . . . والثانی متلاقوه بین أنغام النای والعود

بيقولوا إن "سیبویه" راح وفتن علیه . وما اعتقدش إن "سیبویه"

یعمل کذا ، آیا كان دا كان راجل کبارة وعالم ، وحرکات النقص دي ما تطلعش منه .

ومرة ثانية كان بشار استعمل كلمة "نينان" كجمع لكلمة "نون" يعني سمكة. فيقولوا إن سيبويه اعترض على الجمع دا، رغم إن في كتابه "كتاب سيبويه" الجمع دا موجود، ودا يدل على إن فيه ناس كتير بتألف حكايات ملهاش علاقة بالحقيقة.

وبرضه قالوا إن "بشار" حلف ليشتم "سيبويه" في أشعاره، لـ "سيبويه" سبق بالخير عشان يبعد عن شره، وذكر شوية من أشعار "بشار" في كتابه.

ويقولوا إن الوزير "ابن داود" فضل ورا "بشار" لغاية لما انتقل، واختلفوا في سنه: فيه ناس بتقول كان عنده ٨٠ سنة وقتها وفيه ناس بتقول إنه كان أكبر من كدا.

وأنا ما بقولش إنه من أهل النار، واللي قلته قبل كدا دا كان مرتبط في الأول وفي الآخر بمشيئة الله، وربنا حلیم وهاب.

الكاتب "أبو عبد الله ابن الجراح" كان ذكر في كتابه "الورقة" شعرا من نفس جيل "أبو نواس" ومن الأجيال اللي قبله وقال عنهم إنهم كانوا ملحدین. بس محدش يعرف أسرار القلوب إلا اللي خلقها، وخاصة إن الفترة دي، كانت الناس بتخبي رأيها عشان خايفين من السيف. لكن دلوقتي كل حاجة بقت على عينك يا تاجر، وما بقاش فيه أسرار.

مرة زمان كان فيه واحد عنده صحاب شيعيين وصاحب ملحد. فعزم صحابه الشيعة عنده في البيت كام يوم، وطب عليه صاحبه الملحد وخطب على باب بيته وقاله:

قلبي مليان شكوك وحيران . . . ومتقسم بين الفكر والأحزان

فقاله صاحب البيت وهو غضبان :

- انت مين وعاييز إيه؟

فمشي صاحبه الملحد . بعدها بكام يوم قابلوا بعض ثاني ، فضا-

البيت قال لصاحبه الملحد :

- كنت هتفضحنني المرة اللي فاتت وهتبط سمعتي ، وكانوا هيفتكروا إيه  
ملحد زيك .

- طب اعزمهم مرة ثانية وأنا هصلح الموقف .

فعزمهم فعلا وعدى عليه صاحبه الملحد وقال :

قلبي مليان شكوك وحيران . . . ومتقسم بين الفكر والأحزان

فردوا عليهم كلهم غضبانين :

- تقصد إيه بكلامك دا؟

فكمل وقال :

زعلان على اللي عمله "عمر" . . . و"أبو بكر" في "علي" الغلبان

ومشي . فصحاب الراحل الشيعيين فرحوا أوي . وبعد فترة قابل

الراحل صاحبه الملحد وقاله :

- روح يا شيخ ربنا يكرمك ، كنت هروح في داهية ، بس انت بعدت

الشبهة عني .

كان برضه فيه واحد ملحد في "البصرة" عنده سيفين ، مسمي واحد

فيهم "الخير" والثاني "النجاح" ، فلما كان يشوف واحد مسلم يقوله :

"تصبح بالخير وتتمسى بالنجاح"

أما البيت اللبي قاله " أبو نواس " بتاع :

غرور مغني وظرف ملحد

فالنقاد قالوا إنه بيت مش قد كدا . وهو كان يقوله في راجل من قبيلة  
" الحارث " كان مشهور عن إنه ملحد وظريف ، وكان قريب من السلطان .

ونفس الحكاية مع " امرؤ القيس " لما قال :

النهاردا هشرب خمرة . . . وربنا مش هيعاقبني

وهو كان قصده إن أخيرا يقدر يشرب خمرة بعد ما كان محرمها لغاية لما  
ياخد بتار أبوه ، فدا تعبير عن فرحته ، مش معناه إن هو فعلا هيشرب ومش  
هيتعاقب . فالسياق كله لازم يتفهم الأول عشان المعنى الحقيقي للبيت يكون  
واضح ومفهوم وما يتأخذش الناس ظلم .

أما الشاعر " صالح ابن عبد القدوس " اتشهر بإنه ألد ، وما اتقتلش ،  
على حد علمي ، غير لما مسكوا عليه أدلة من كلامه وشعره . و " صالح "  
كان عنده ولد برضه قالوا عنه إنه ألد ، واتسجن فترة طويلة عشان الموضوع  
دا . لما " صالح " حس إنه قرب يتقتل بسبب إلحاده ، عمل نفسه إنه تاب وإنه  
رجع في كلامه . بس على مين؟ النبي كان عنده حق ، عليه ألف صلاة  
وسلام ، لما قال : " أنا جيت بالسيف ، والخير في السيف ، والخير بالسيف " ،  
وليه حديث ثاني يقول : " أمتي تهتفضل بخير ، طول ما هي شائلة  
السيوف " . والسيف هو اللبي خلى " صالح " يرتجع عن الإلحاد ، ويرجع  
للحق . وربنا قال في آيته إن لو الواحد ما تابش قبل ما يموت ، مش هيتقبل

منه إيمان بعد كذا: "يوم يأتي بعض آيات ربك لا ينفع نفساً إيمانها لم..  
آمنت من قبل".

أما "المقنع الخرساني" اللي قال على نفسه إنه إله، فدا راجل جاهل.  
ولو كان ربي كام جل وراعاهم كانوا هيكونوا أفيدله، ومكنش هيفدها،  
يقتل نفسه بالسّم. مهما الواحد عمل، مش هيفلت من الموت أبداً.

أما "الصناديقي" فهو كمان كان ملحد. ودا ظهر في اليمن سنة ١٨٣  
ميلادي. وكانوا المغنيات في فترته يقولوا:

خدي الدفوف يا حلوة واعزفي... واتكلمي عن أخلاق دا النبي  
خلاص راحت على الهاشمي... ومن قبيلة "يعرب" جالنا نبي  
ولا بقى فيه سعي ولا قبور تنزار... ولما يصوموا الناس، كلي واشربي  
ونامي مع اللي انتي عابزاه، ما هو مش... حلال للغريب وعلى أبوكي تتحرس  
والخمرة حلال زي مية المطر... ربنا نخلي لنا دا الدين، ويحفظلنا دا النبي  
إلهي ربنا يلعن كل اللي صدقوا الكلام دا وآمنوا بيه.

والنوعية دي من الناس، الله يلعنها، بتستخدم طرق مختلفة عشان تقنع  
الناس وتضحك على عقولهم، وما بيستحوش إنهم يدعوا الألوهية وما  
بياخدوش بالهم من فظاعة كلامهم. والناس لو لقت حد مختلف عنها، تنلم  
عليه بفضول. كان فيه واحد استخبي في مكان ومبقاش بيكلم حد إلا عن  
طريق خدام اسود وسماه "جبريل". في يوم من الأيام، الخدام بتاعه قتله  
ومشي، وبقت الناس تترى على الرجل وتقول:

سبحان الله، "جبريل" هرب من الحرام . . . وساب، اللي فاكرينه إله،  
على عرشه مقتول

ويقولوا إن "جبريل" عمل كذا من كتر الحرام اللي كان سيده بيحبره عليه.  
وياريتهم لما بيكذبوا بيكتفوا بالإمامة أو النبوة، لكن دول بيطلعوا  
لفوق أوي، لأعلى درجة.

والعرب أيام الجاهلية ما كنوش يقدرُوا يعملوا المصايب دي،  
بالعكس، كانوا بيعتمدوا في تكوين أرائهم على الحكماء وعلى كتب  
العلماء القدام. والفلاسفة مكنوش بيؤمنوا أساسا بفكرة الأنبياء، وكان أي  
حد يدعي النبوة كانوا يقولوا عليه غبي.

مرة "ربيعة ابن أمية الجمحي" حصل ما بينه وبين "أبو بكر الصديق"  
و"عمر ابن الخطاب" مشكلة، يقولوا إنه شرب خمر في نهار رمضان،  
فـ"عمر" ضربه. وبسبب مشاكله معاهم ساب الإسلام ودخل في  
المسيحية. وقال:

أنا آمنت بالديانة المسيحية . . . ومن النهاردا لا فيه شهر ولا عصر  
واسقوني خمر كل يوم لأنها . . . لا متحرمة ولا بتشرب في السر  
لو أبو بكر فضل هو الخليفة . . . يبقى مفيش خير في الحجاز ولا مصر  
ولو كان الإسلام هو الحق . . . فأنا سييته كله لأبو بكر

والناس غلظت لما سمحت لشوية منهم إنهم يدعوا الألوهية، دا كان عين  
الكفر والإلحاد وقتها، وكانهم بيغرفوا من الكفر غرف. والناس في الجاهلية  
مكنوش بيصدقوا أي حد يدعي النبوة، وما كنش دماغهم بتوديعهم لأكثر من كذا.



و"عمر ابن الخطاب" لما طرد كل اللي مكنوش مسلمين من الجزيرة العربية، الناس المطرودة حزنت أوي، فراجل من يهود "خير" اسم "بسمير ابن أدكن" قال في الموضوع دا:

"أبو حفصة" شادد حيله علينا بكرباجه . . . اهدى شوية، عشان اللي النهاردا عالي بكرة واطي

لو كان موسى عنده حق ما كنتوش انتو ظهروا . . . لكن الأيام دول، ودا وقتكم الأيام دي

بس احنا لينا شرف الكذب الأول، وانتو عشان . . . السلطة والنفوذ بتقلدوا نفس الطريق والخطاوي

واليمن بالذات كانت مشهورة باللي بيتكسبوا من الدين . وفيه ناس سافروا اليمن قالولي إن لحد النهاردا، فيه مجموعة من الناس كل واحد فيهم عامل نفسه المهدي المنتظر، وييلموا فلوس كتيرة جدا من الناس اللي معلقة عليهم آمالهم إنه ينقذوهم من النار .

وانحكالي برضه إن القرامطة في البحرين عندهم بيت يقولوا إن المهدي بتاعهم هيخرج منه في يوم من الأيام، وحاطين على باب البيت دا حصان، ويقولوا للناس البسيطة والجهلة: "الحصان دا للمهدي عشان يركبه لما يخرج بالحق" . وهم طبعا بيضحكوا على الناس عشان يسيطروا عليهم .

ومن أغرب الحاجات بقى اللي سمعتها كانت إن واحد من رؤساء القرامطة زمان، لما حس إنه خلاص بيودع الدنيا، جمع حواليه أصحابه وقالهم: "أنا نويت اتنقل النقلة الكبيرة، وأنا كنت بعثلكم موسى وعيسى

ومحمد، بس لازم هبعثلكو غيرهم". الله يلعنه، عمال يزود في الكفر، في عز اللحظة اللي هو المفروض يتوب فيها ويؤمن.

أما "الوليد ابن يزيد"، رغم سنه الكبير، إلا إن عقله كان زي عقل عيل لسه مولود. كان عنده إرادة من حديد، بس منفعتوش بحاجة، زي ما برضه ما "ماني" اللي كان بيسجدله منفعتوش بحاجة. وشربه للخمرة زود الطينة بلة، عشان يبقى في أوطى مكان في الجحيم، وساعتها ولا هيلاقى خمرة ولا حتى كاسات فاضية. بيقولوا إن هو اللي قال الشعر دا:

يا صحابي قريولي البنت "عبدلاً" . . . عشان أنا اتأكدت إنني مش رايح النار  
خليهم موهومين اللي عايزين الجنة، وأنا . . . هروضهم لغاية لما يدخلوا في  
دين الحمار

والأعجب إن الزمن يخلي واحد زي دا إمام للمسلمين على ملك كبير وضخم. ممكن كان فيه أئمة تانية ملحدين زيه، بس مكنوش بيقولوا عشان خايفين من الناس. وبرضه كان ليه قصيدة بتقول:

أنا الإمام وليد وليا الشرف . . . بحب أسمع الموسيقى والشعر الجمال  
وأروح لغاية بيت حبييتي . . . وما أخفش أنا من لوم العدال  
والدنيا إيه غير سماع أغاني . . . وخمرة تسكر في أباريق طوال  
ومش عايز حور عين الجنة . . . وفيه حد عاقل يصدق دا الجنان

ويقولوا إنهم لما اتلم الناس عليه عشان يقتلوه، دخل قصره وقفل الباب وقالهم: "هاتولي المزز وخدوا الملك، كذا كذا مش هينفعكو ولا يدوملكو."

الكلام ذا خلى الناس تقلب عليه جامد، ويقولوا إنهم شافوا راسه  
بعد كدا في بق كلب. ربنا لازم يعاقب الناس اللي زي دول. والناس  
ملهاش حيلة في الدنيا دي، اللي تاعبه كل اللي فيها. المفروض الخلافة تبتني  
للشخص اللي أخلاقه عالية وقدوة، واللي مفيش حاجة ترجعه عن الطريق  
الصحيح. لكن المصايب موجودة من أول ما ربنا خلق الشمس، ومحدث  
هيهرب من قدره حتى لما يروح قبره.

أما "أبو عيسى ابن الرشيد"، راجل ما يسدش في أي موقف. ولو اللي  
قالوه عنه من كرهه لأهل الأديان صحيح، يبقى ما مشيش على نفس طريق  
أسلافه الصالحين. وربنا لا بيهتم باللي بيصوم عشان خايف من عقابه ولا باللي  
ما بيصومش. فيه ناس بتقول حاجة وقلبهم مؤمن بعكسه، وأتمنى إن "أبو  
عيسى" كلامه يكون من وراقله وميكونش هو واللي زيه كافرين بالله ذملا.

كان فيه واحد شاف في الحلم الشاعر "عبد السلام ابن رغبان"  
المشهور بقلة أدبه وإلحاده، وهو في أحسن حال، فسأله في المنام:

- مش انت لما كنت عايش قلت الأبيات دي:

مفيش غير الدنيا، وفاكرين إن فيه آخرة... وكلها أوهام في دماغ ناس  
مرضى

- أيوة، بس أنا كنت بتلاعب بالكلام ومكتش قصدي كدا فعلا.

ويمكن يكون ناس كتير من اللي اتعرف عنهم إنهم ملحدين، ما  
يكونوش ملحدين فعلا، ويكون لسانهم بس طويل شويتين وفلت منهم،

لكن قلبهم على طريق الحق . ومش عشان ما صامش شهر ، يتعذب طول حياته ، ومش المفروض ييأس من رحمة ربنا لأن " لا ييأس من روح الله إلا القوم الكافرون " .

أما "الجنابي" ، فلو كان فيه بلد ممكن تتأخذ بذنب فرد واحد ساكن فيها ، كانت "جنابة" اللي في إيران اتأخذت بذنبه وعمرها ما كانت شافت رحمة ، لكن حكم ربنا عادل في كتابه : " ألا تزر وازرة وزر أخرى " .

وفيه خلاف على أسباب سرقة "الجنابي" للحجر الأسود . فيه ناس قالت إنه خده عشان يعبد ، لإن فيه ناس قالوله إنه الحجر دا هو إيد صنم معمول على شكل كوكب زحل . وفيه ناس تانية قالوا إنه خده عشان يعمل له مسند . أيا كانت أسبابه ، الله يلعه لحد يوم القيامة .

أما "العلوي البصري" بتاع الزوج ، فيه ناس حكّت إنه كان بيقول إن من نسب "عبد قيس" ، وبعد كدا غير كلامه وقال إنه من "أنمار" ، وكان أساسا اسمه "أحمد" ، بس غيره وخلاه "علي" . كان بيكذب أكثر ما بيتنفس . هو حب الدنيا بجنون لغاية لما غرقته ، وهيفضل كدا " ما دامت السماوات والأرض إلا ما شاء ربك إن ربك فعال لما يريد " . وهو اللي قال الأبيات دي :

قتلت ناس كتير عشان مصلحتي . . . والسيف هو اللي خلاني أبقي غني  
اللي يشوف قبري ما يظلمنيش . . . وربنا بستر من اللي هشوفه عند ربي

فيه ناس بتقول إن دي أبيات "عضد الدولة" ، وإنه شافهم في المنام ولما صحي كتبهم على الحبيطة ، بس أنا مش مصدق الكلام دا .

أما حكاية الناس التي غيروا اسم "رخة" وخلوها "رحمة" فأنا متأكد مصدقها وشكلها كلها كذب في كذب. وبرضه حكاية إن "علي" قال إن الزوج هيدمروا البصرة، وبعد كذا الناس غيروا كلمة الزوج وخلوها ربح، كلها كذب، لأن لا "علي" ولا غيره يقدرُوا يعرفُوا المستقبل فيه إيه، وربما قال: "قل لا يعلم من في السموات والأرض الغيب إلا الله". ومينفعش حد يقول من ١٠٠ سنة إن أمير حلب سنة ١٠٣٢ اسمه فلان الفلاني، وشكله كذا. وهيعمل كذا، ولو قال كذا، فهو مجرد شخص كذاب ودجال.

ولو حصل إن حد قال حاجة وتحققت بعد كذا، فذا مجرد صدفة، زي ما حصل مع الشاعر "الفضل ابن سهل" الذي قال في قصيدة ليه:

ربنا ما يسلط علينا غالب . . . ولا تكون نهايتي على إيد الغالب

واتقتل بعد كذا على إيد واحد اسمه "غالب". فحكاية زي كذا يا إما كذب، يا إما صدفة. عموما الدنيا مليانه عجائب، وفوق كل ذي علم عليم.

بيقولوا برضه إن القاضي "إياس ابن معاوية" كان يقول الحاجة وتحصل بعد كذا بالحرف، وكانوا يسموه "المكشوف عنه الحجاب"، و"الذكي". والشاعر "أوس ابن حجر" قال عنه:

"الذكي" الذي يقول الحاجة ويتحقق . . . كلُّه سمعها قبل كذا وشافها

أما "الحسين ابن منصور الحلاج" فذا كان شخص يبشر جهل. والناس لو كانت بتعبد الأصنام والحجر، فذا كان عشان عارفين إن مفيش إنسان خالي من العيوب. "الحلاج" كان عايز يبقى هو محور الكون، ولو

كان فضل في شغلته ولا كان فيه أي حد هيفتكركه أساسا. الناس ألفت حكايات كذب كثير عن "الحلاج". كل حكاياته وتاريخه حاجات غريبة ما يصدقهاش عيل صغير. ومن ضمن الحكايات الغريبة عنه إنهم لما جم عشان بعدموه، قالهم: "انتو فاكرين إن انتو بتعدمونني أنا، إنت بتعدمووا بقرة "المادراني". وفعلا، لقوا بعد كذا البقرة دي مقتولة في اصطابلها.

وفي الصوفية لغاية النهاردا، تلاقي ناس بتعلي مكانة "الحلاج" أوي، وبتحطه جنب النجوم. وقالولي إن في "بغداد" فيه ناس مستنين ظهوره، وإنه يبروحوا مكان ما اتصلب على نهر دجلة ويستنوه يخرج لهم. ودا جهل، بس مش حاجة جديدة على الناس. لدرجة إن كان فيه ناس بتعبد فرد عشان يخلي حظهم حلو، والعامّة كانت بتقول: "اسجد للقرد في زمانه". وأنا مقدرش أعمل حاجة زي كدا، بس الناس كانوا بيدخلوا على السلطانة "زبيدة" مرات "هارون الرشيد" عشان يسلموا على القرد ويتباركوا بيه، لغاية لما في يوم جه "يزيد ابن مزيد الشيباني" دخل مرة وسط الناس اللي رايحة تسلم على القرد وقتله.

وبيقولوا برضه إن الخليفة "يزيد ابن معاوية" كان عنده قرد ركبه على ظهر حمارة وحشية وخلاه يدخل مع باقي الأحصنة في حلبة سباق.

عموما الأفكار دي كلها من زمان أوي، من قبل "الحلاج" بكثير، لدرجة إن فرعون كان مؤمن بفكرة التجسيد وعشان كدا كان بيقول على نفسه إنه ربنا.

وكان فيه راجل بيقول لما يبسبح: "سبحانك سبحاني، غفرانك غفراني".

وواحد ثاني قال :

أنا انت ، مفيش شك . . . فسبحانك سبحاني  
وغضبك غضبي . . . وغفرانك غفراني  
وأنا أتجملد ليه . . . إن كان هو الزاني؟

وواحد ثالث قال : " أنا الله ، مفيش إله إلا أنا ، فسبحاني ما أعظم شاني " .

واللي يقول كلام من النوعية دي ما فرقش كتير عن البهايم . والمشكلة إن أغلب البني آدميين دماغهم مهوية ، ويعلموا خرافاتهم لعيالهم ، فيطلعوا هم كمان مش فاهمين حاجة ، وتفضل البشرية كذا من غير ما يتصلح حالها : " أم تحسب أن أكثرهم يسمعون أو يعقلون إن هم إلا كالأنعام بل هم أضل سبيلا " .  
واحد برضه من الناس اللي مؤمنين إن ربنا اتجسد فيهم قال :

وأنا ماشي في سوق بغداد . . . شفت ربنا فطرت من الفرح  
سألته : عايز تتجسد فيا؟ . . . فقال : بس خد بالك ، دا خطر  
لغاية لما يوافق إنه يتجسد فيا . . . مسجمله وأستنى منه أي خبر

والجماعة بتوع التجسيد دول ، بيقوا مؤمنين برضه بالتناسخ ، والمذهب دا عتيق أوي وجاي من أهل الهند ، وانتشر في الشيعة . ربنا يرحمنا ويهدينا .

فيه جماعة من الشيعة اسمهم " النصيرية " فيهم شاعر بيقول :  
يا ماما الحقى ، اختنا بقت فار . . . خدي بالك بقى وابعدي عنها القطط  
وواحد ثاني منهم قال :

سبحانك يارب كلك عجائب . . . وتبتعد عنا الشر بكل مجدة

جارنا المعجوز بقى حمار، . . . وبدل الهدوم، بقت قفّة وبردعة

وعشان الناس دي ما يبجيش في دماغها إلا الشر والمصايب، فبتقع فيها فعلا.

اتحكالي مرة إن كان فيه شاب أمور من ملوك الهند جاله جدري، فبص لنفسه في المراية ولقى نفسه خلقتة اتغيرت وبقت وحشة، فقام حارق نفسه عشان يتنسخ في شكل أحسن من كدا.

وقالولي ناس ثقة مش كدايين، إنهم كانوا في أرض السلطان "محمود"، وكان عنده جماعة هنود ولاد حلال، وكان بيكرمهم ويجازيهم على وفائهم ونبتهم الصافية ناحيته، ودايما كانوا أقرب الناس ليه، فبعت واحد منهم على راس جيش من جيوشه. بعدها بكام يوم وصله خبر إنه اتقتل. فجات مرات الراجل وجابت خشب كثير وولعت النار فيه ودخلت جوا الخشب دا وحرقت نفسها، والناس عمالة تبص في ذهول. بس طلع خبر موت جوزها مجرد إشاعة، فلما رجع جوزها وعرف اللي حصل، فجمع هو كمان خشب عشان يلحق مراته، فبقى الناس بيقولوله رسايل ويبجبوله هدايا عشان يوصلها لأمواتهم، حتى واحد إداله وردة يوصلها لواحد من ميتينه. خد الرسايل والهدايا ونط في النار.

واحد من اللي شاف الناس دي وهي بتحرق نفسها قال إن ساعات لما النار تلسعهم كانوا بيحاولوا يخرجوا منها، بس اللي حوالِيهم كانوا بيزقوهم فيها بالعصيان والخشب. فلا إله إلا الله: "لقد جئتم شيئا إذا".



وفي ناس بتبقى عاملة نفسها مؤمنة بالمذهب دا، لكن هم في الحقبه  
مش كدا. بيبقى عايزين يتكسبوا في الدنيا، وميعرفوش إنها مش دائمة. كان  
فيه واحد في المغرب اسمه "ابن هاني" وكان من الشعرا الكويسين أوي ١،  
المغرب، بس كان منافق شوية، وكان بيزودها وهو بيمدح "المعز لدين الله  
الفاطمي" لدرجة إن قال شعر للراجل اللي بيثيل الشمسية لـ "المعز" :

انت زي جبريل اللي كان مع النبي على طول  
على طول مع الخليفة وسعادتك باينة من غير ما تقول  
وفي مرة ثانية كان الخليفة راح يزور حنة اسمها "رقادة" : فـ"ابن  
هاني" قال :

رقادة زارها النبي والمسيح . . . رقادة زارها آدم ونوح  
رقادة زارها ربنا نفسه . . . وبعد ربنا، كله يهون  
والشاعر "ابن القاضي" برضه كان بيمدح "ابن أبو عامر" رئيس  
الأندلس، فقال في مرة :

مشيتك بس هي اللي تنتفد . . . مش مشيئة الأقدار  
واحكم وخد راحتك . . . انت الواحد القهار  
بس "ابن أبو عامر" اتضايق من كلامه وأمر إنه يتجلد ويتنفي من البلد .  
وغالبا "الحلاج" مكنش أكثر من راجل دجال، لا ذكي ولا بتاع،  
بس هم شوية من المتصوفة عملوا منه شيخ على القاضي، وهم مش عارفين  
اللي فيها .

أما "ابن أبو عون" فدا قعد يغير في رأي ورا الثاني، وضحك عليه "الشلمغاني". ويمكن تلاقي الفرد من دول أستاذ في صنعته وعالم وعنده بعد نظر، بس يجي عند نقطة الدين، تلاقيه مجرد إمعة ما شي ورا كلام الناس من غير تفكير.

عبادة ربنا دي حاجة غريزية، ونتيجتها مضمونة. والأطفال يسمعوا الكلام من الكبار ويفضل معاهم طول الزمن. والناس بتاخذ دينها من الجماعة اللي هي فيها من غير ما تتأكد هو صح ولا لأ، فلو حد اتولد في أسرة مجوسية بيطلع مجوسي، لو عيلته من الصابئة هيطلع صابئي. واللي يبطل اجتهاد عشان يفهم، هيبقى غبي وبليد. والعقل لو محدش استخدمه، هيصدي، لكن مين بقى اللي بيستخدم عقله صح في زماننا دا؟ متلاقش غير واحد في المليون هو اللي بيشغل مخه.

ساعات تلاقي واحد قرا في كتب العلماء بتوع زمان ومشي على تقاليدهم، لكن شوية وتكتشف إنه بيحلل الحرام ويبسوط الأخلاق، ومفيش حاجة وحشة إلا ويعملها، ويخون، ويكذب، ولو حد طلب منه علاج لمرض، يزود عليه مرضه ويستمتع بآله، فيبقى كل همه أساسا هو الفلوس، وكان عامل نفسه من أهل الحكمة والأخلاق.

والناس تلاقيها عمالة تشتم عن جهل في أهل الملل وهم أساسا فيهم بلاوي، بس زي ما ربنا قال: "كل حزب بما لديهم فرحون".

فيه جماعة تانية اسمهم "الإمامية" ودول مقتنعين إنهم عشان يقربوا من ربنا لازم يعفروا وشهم في التراب. وفيه متدينين تانيين شايفين تعفير

الوش ذنب ما يتغفرش . وتلاقيهم عاملين اجتماعات ومجالس وقعدات ذنوبهم  
وهم ثلاث أرباعهم أساسا ملحدين .

وفيه اللي بيعمل نفسه مع "المعتزلة" وهو مقتنع بأراء مذاهب تانية  
ويخوفوا الناس ويقولولهم إن ربنا مش هيسيب حد غير لما يدخله النار ،  
وتلاقيه هو غرقان لشوشته في الخطايا والذنوب والزنا ، ويعمل نفسه إن ربنا  
هو اللي جابره على الحياة دي ، رغم إن اللي جابره فعلا هو زعيمهم الشيخ  
"عبد الجبار الهمداني" . وماشي ليل ونهار على كلام شيخه وهو من جواه  
مش مقتنع ولا بنص كلمة من كلامه ، وشايفه شيخ معندوش لا أخلاق ولا  
دم .

واتحكالي إن واحد من شيوخهم المحترمين واللي ليهم أتباع كثير ،  
كان يبقى قاعد في قعدة ويلفوا عليهم بخمرة ، فياخذ الكاس ويشربه لغاية  
آخر نقطة فيه وبعدين يشهد اللي قاعدين معاه على توبته .

أما "الأشعرية" فلو اتعرفت حقيقتهم هتلاقيهم مليانين بلاوي . الله  
يلعنهم منين ما يكونوا . "الأشعري" زيه زي واحد تايه في الصحرا ، مش  
شايف قدامه من الشبورة ، ومش ما من على الناس اللي ماشيين وراه ، ولما  
تطلع عليهم الديابة ، تفرتكهم ، إلا اللي ربنا كان بيحبه وأنقذه بإنه خلاه  
يمشي ورا كلام السلف الصالح ، ونفذ اللي ربنا عايزه منه .

مساكين الأشعرية ، ماشيين ورا ناس تايهة ، ويبثقوا في ناس بيضحكوا  
عليهم ، ولو حاولوا يدوروا على الحقيقة عند شيوخهم ، مش هيلاقوا ولا  
حتى ربعها .

والشيعة يقولوا إن 'عبد الله ابن ميمون القداح' كان واحداً من أقرب أصحاب الإمام 'جعفر ابن محمد' ، وإنه قال عنه أحاديث كثيرة، بس ارتد بعد كذا، وقال على نفسه إنه نبي، فبقى شيوخ الشيعة لما يحبوا يقولوا حاجة من كلامه يقولوا: "قالنا عبد الله ميمون القداح قبل ما يرتد... " وقال مرة أبيات شعر:

اديني خمرة يا بني... ما أنا مش هعيش تاني  
والشيعة مضحوك عليهم... من "جعفر" الشيعاني  
وأنا كنت زيهم لفترة... بس عرفت الحقيقة اللي وجعاني

وزي ما قلت قبل كذا إن فكرة التجسيد مش بعيدة عن فكرة التناسخ. واحد حكالي مرة إن واحد من السحرة اللي كانوا عايشين في بلدنا زمان كان ماشي في يوم مع ناس صحابه، فعدوا على طور، فقالهم: "الطور دا أكيد هو "خلف"، حتى بصوا" وقعد بنده عليه: "يا خلف، يا خلف"، فالطور فعلا رد عليه وقال: "موووو" فقالهم: "شفتوا كلامي طلع صح إزاي؟"

وواحد تاني حكالي من اللي بيصدقوا في التناسخ إن أبوه جاله في المنام وقاله: "يا بني أنا روحي انتقلت في جمل أعور من ضمن جمال فلان الفلاني، وأنا نفسي في بطيخة". فخذ بطيخة وسأل عن جمال الشخص دا، ولقى فيهم فعلا جمل أعور فقرب البطيخة منه، فكلها بنهم واحد فعلا كان مشتبهها.

شفت بقي يا شيخنا الناس راحت لفين من قلة التمييز وقلة العقل؟

أما "ابن الراوندي" فذا كان شخص تايه في الدنيا. وكتابه "التاج" مينفعش حتى يكون جزمة بتتلبس في الرجلين. ومش هيعرف يهرب من

العقاب ومش هيلاقيله مكان يحتمي فيه من ربنا. وتاجه دا مليون شوا  
وكلابشات عقارب، إزاي فضل كل الوقت دا مقتنع بالأفكار الهائفة  
الطائشة بتاعة العيال دي؟ وتاجه دا وساخة عقل مش أكثر أو جزمة  
وشراب، وجزمة وشراب على فكرة دول اسم مكانين في جهنم.

تاجه مش تاج ملوك، دا تاج هيدمره، ومش معمول من الذهب، دا  
معمول من النار، وما اتزينش بالجواهر، دا اتزين بكাকা البقر.

وكتابه "الدامغ" اللي بيشتم فيه القراءن، فهو ما دمغش ولا ختم حد  
على قفاه غير اللي ألفه. وهو أضعف وأهيف من إنه يتذكر أو يتاخذ على  
كلامه، وعيب على "راوند" إن دا يكون واحد من أهلها.

والناس مؤمنين وملحدين عارفين ومتأكدين إن الكتاب اللي نزل على  
محمد قمة في الإعجاز، ومكنش له شبيه لا قبل ولا بعد، يعني ولا هو كان  
شعر، ولا شبه كلام العرب التقليدي، ولا زي كلام الكهنة، وكان واضح  
زي الشمس، ولو كانت الجبال عاقلة وسمعته كانت اتشقت واتفتفت  
مليون حنة من الإنبهار، وسبحانه لما قال: "وتلك الأمثال نضربها للناس  
لعلهم يتفكرون"، والآية الواحدة منه أو حتى جزء صغير من الآية لو  
اتقارنت مع كلام العرب كله، هتمسحه مسح وهتبقى زي القمر في ليلة  
كحلي، "فبارك الله أحسن الخالقين".

أما كتابه "القضيب" اللي بيقول فيه إنه ربنا علمه جديد، فهو خسر  
بيه الدنيا والآخرة، ياريتة قبل ما يكتبه كان اتزحلق من على ظهر جبل  
واتكسرت ضلوعه وعضامه مية حنة أو دخل في قلبه سيف طلع من الناحية

الثانية، أو كان ربنا كتب عليه مودة ما يستحملش عذابها حد . هيعمل إيه لما يسألوه عن كتابه دا؟ مين هينقذه يومها؟

وكتابه "الفريد" اللي شتم فيه النبي، خلاه وحيد ملوش صحاب ومذلول ومسكين . والحاجات بتبقى فريدة من نوعها لخلاوتها، لكن دا كان فريد في حقارته، زي الجمل الجربان اللي محدش عايز يقرب منه . والعرب بيقولوا على العقد كلمة فريد، بس هو العقد بتاعه من الذنوب والخطايا مش من الجواهر .

وكتابه "المرجان"، اللي معناه لؤلؤ صغير، فهو ما يسواش حتى حصى صغير، دا حتى أصغر وأحق من إنه يتذكر . مينفعش يكون في قيمة المرجان الأحمر الجميل اللي بيجيلنا من المغرب، دا آخره يكون جاي من الفعل "مرج" يعني ساب المواشي من غير رقابة، أو ممكن يكون من "مر جان" يعني فاكهة مرة علقم، أو إن شوية عفاريت (جان) عدوا من هنا (مر).

أما "ابن الرومي" فهو واحد من اللي بيتقال عليهم إن علمهم أكبر من عقلهم . يعني مرة لما كان بيدرس فلسفة، استلف كتاب من "أبو بكر ابن سراج"، فتأخر عليه، فـ"ابن سراج" قاله يا يرجعه يا يدفع حقه، فـ"ابن الرومي" قاله: أنا مش عيل عشان تهددني بالكلمتين دول .

والبغداديين بيقولوا إن هو من الشيعة، والدليل على كدا قصيدته اللي بتنتهي كلها بالجيم، بس أنا مش شايفه إلا إنه بيكتب زي باقي الشعرا مش أكثر .

هو عيبه فعلا إن كان، زي كثير غيره من الناس، متشائم وبيؤس  
بالفال الوحش. ودايما بيقوا مستنيين المصايب تنزل عليهم، وما يعرفوش  
إن الأمور كلها بإيد ربنا، ومحدث هيفلت من الموت. وفيه ناس تانية مؤمنة  
إن أي حاجة بتتقال بتتحقق، عشان كذا العامة قالوا: الإشاعة هي أول  
خيوط الحقيقة. وبيقولوا إن النبي قال البيت دا:

*اتفائلوا بالخير عشان... ما بيتقالش إلا وكان*

ومهما الناس قالت، معروف إن الخير في الدنيا شحيح، والشر زايد  
عنه بمراحل. والناس الطيبة بقت زي الشريرة، كلهم يمشوا في طريق مش  
سليم، وربنا لوحده هو اللي قادر يميز بينهم، ويساعد اللي فعلا مؤمن بيه.  
و"علقمة" قال: "غبي اللي يفتكر إن الغربان صوتها هيئذيه".

و"ابن الرومي" كان كذا، رغم إن كل حاجة بتحصلنا بأمر من ربنا،  
وملناش حق الاختيار. وبيقولوا إن النبي كان بيعس بوغوشة لما يعرف  
ناس معاني أساميها مش كويس زي: "مُرّة"، "شهاب"، أو "حباب"  
يعني حبة.

أما حكاية الشاعر "أبو عثمان الناجم" اللي حكاها عن "ابن  
الرومي" ففكرتني بحكاية الست اللي قالت لصاحبها: "أنا أبويا سمانني  
"نار" ومن ساعتها وأنا حياتي ملهلبة، واتجوزت واحد من قبيلة "جمرة"  
ليل ونهار يلعب بالنار، واسمه "توربا" يعني أرض، وهو إيدك منه  
والأرض وأبوه اسمه "جندلة" خلى حياتي مقندلة، وأمه اسمها "شكاكة"  
ودايما بتشك فيا وفي تصرفاتي ومش سايباني في حالي".

ردت عليها صاحبته وقالت لها: "أنا بقى أبويا سمانى " صافية " عشان  
كدا دايما تلاقينى صافية ورايقة، وجوزنى من قبيلة "سعد ابن بدري"  
فخلى الفرح والسعادة يدخلولي بدري بدري، واسم جوزي "محاسن"  
وهو كله محاسن، وأبوه اسمه "الحارس" فدأىما كان بيعرسنا وواقف في  
ضهرنا ويساعدنا، وأمّه اسمها "راضية" وهي دايما راضية عني وعن  
أخلاقى ومكنتش بتسعى في طلاقى".

والناس المؤمنة بالفال الوحش دول دماغهم مهفوفة، ولو جبتلهم مثلا  
حبة سمسم، يقلبوا الدنيا ويفتكروا إنهم هيموتوا من السم. ولو جبتلهم  
حمام يتشاءموا ويقولولك: "دا لونه أبيض زي لون الكفن". ويفضلوا كدا  
بقى طول عمرهم: قلقانين ومتشأمين، وأي حاجة يشوفوها يقلبوها لحاجة  
وحشة ومصايب. وعشان كدا "ابن الرومي" خلى كلمة جعفر جاية من  
جوع وفرار، رغم إن معناه الأصلي جميل، يعني نهر مية رايق، لكن الناس  
دي ما بتشوفش غير المصايب وكل حاجة وحشة.

وأعرف منهم ناس لو عايزين يسافروا مثلا يقولولك: لا بلاش ينابر  
عشان هي "يا نايم" ومفيهاش رزق، وبلاش "فبراير" عشان هي  
"فقراير" من الفقر، وخد عندك بقى باقى السنة على كدا.

الحكاية اللي انت قلتهاالي يا شيخنا عن "ابن الرومي" لما كان قرب  
يموت، إنه كان حاطط جنبه مية متلجة عشان يضحك بيها على الموت،  
وسيف عشان يداري بيه جنبه، ما يعرفش إن اللي مكتوب على الجبين لازم  
تشوفه العين، وممكن واحد يحفر لنفسه قبر في الشام ويموت في الهند أو  
اليمن، "وما تدري نفس بأي أرض تموت، إن الله عليم خبير".



وزي ما محدش يعرف هيموت فين، برضه محدش يعرف هيموت  
إزاي. فيه اللي كان خايف يموت من السيف، فوقعت على راسه طوبه  
صغيرة من جبل عالي موته، أو اللي كان فاكر إنه هيموت في سريره،  
فيموت بضربة سيف في الصحرا.

أما الأبيات اللي "الناجم" قال إن "ابن الرومي" قالها، فأنا ما  
اعتقدش إنه قالها بجد لأنها مش مطبوعة والوزن بتاعها ضارب. وعموما  
ربنا وحده اللي يعلم إذا كان "ابن الرومي" هيشخ الخنة ولا النار.

أما "أبو تمام"، مكشش ليه علاقة بالأديان، وحكاية "ابن رجاء" اللي  
انت كتبتها في رسالتك، حقيقية ومشهورة، ومعروف عن "أبو تمام" إنه  
ملوش خالص في الأديان. عموما، لو هيدخل النار فعلا، فكل قسايد  
الكويسة مش هتنتفعه بحاجة، إلا أول قصيدتين في ديوانه. لو كانت القصايد  
بتحس وتفهم، كانت أول قصيدتين دول حزنوا وعيطوا عليه وعملوه  
ميت، ولو عملوا كذا هتيجي باقي قسايد ديوانه يشاركوا معاهم زي  
النسوان المعدداتية، وبعدين تيجي كل قسايد اللي بتنتهي بالباء، وتتغاض  
فتعمله ميت أحسن وأكبر من الأولاني. وتتجمع بقى باقي قسايد كلها  
اللي بتنتهي بالتاء والثاء والذال والراء والعين واللام، وغيرهم، ويجمعوا  
الناس، ويعملوه عزا أكبر من عزا "أحمد ابن حنبل" اللي اتجمع في عزا  
فوق المليون راجل وستمية ألف ست، وكان أكبر عزا في الجاهلية  
والإسلام.

ولو "أبو تمام" مكشش بيصلي فهو اللي خسران، لو مكشش بيصلي لا  
فجر ولا ضهر، فهيقى يوم القيامة ملوش عذر، ولو مكشش بيصلي

العصر، يبقى هو اللي ضيع على نفسه إنه يتنبئه في الجنة كذا قصر، ولو مكنش بيصلي المغرب، من ريحة المسك والعنبر في الجنة مش هيقرّب، ولو صلاة العشاء فاتته، يبقى مش هيلقي في الجنة حور عين تدلعه وتهشّته .

بمناسبة صلاة العشاء، كان فيه ناس بيسموها صلاة "العتمة" والنبي منعها وقال في حديث له: "العتمة دي مش صلاة، دي الوقت الي بيحلبوا فيه الجمال" وقال كمان: "العتمة اسم بنت الشيطان" .

عموما اللي ما بيصليش عشان كسلان زي اللي مش مؤمن بالظبط، يا ريت "أبو تمام" كان جمع الصلوات في بعض ولا إنه سابها كلها. أمره الله بقى، بس الحق يقال، هو كان راجل مبدع وليه أفكار زي اللؤلؤ. وياريت متكونش آخرته في إيد "مالك" حارس النار، ويفلت من النار زي "الجعدي" أو "عدي ابن زيد"، لأنه في الآخر برضه كان راجل بيخاف ربنا ومؤمن بيه . وهو اللي قال :

هتجزى على اللي عملته . . . وأخري قبر هيلمى

أو ياريت كان عمل زي "زيد ابن مهلهل" اللي راح للنبي، والنبي شال عنه توب الغبا ونور بصيرته للإسلام .

أما "المازيار"، فحلل فيه النار والجحيم، وخليه يتحمل نتيجة عمايله، واللي اتكتب عنه يخليه يتلعن ليوم الدين. وربنا يرحم "ابن أبو داود" اللي فضح "الأفشين" اللي كل أعماله شين زيه . و"بابك الخرمي" هو اللي فتح الباب لكل الشرور، كان فاكر نفسه أحسن مجاهد، وهو ذنوبه

أكبر ذنوب في الدنيا ، وفي الآخرة هيتمنى لو كان اتدبح مية مرة على كل شخص قتله ولا إنه يدوق عذاب جنهم على اللي عمله .

اللي مستغربه فعلا هو " أبو مسلم الخراساني " ، كان واثق أوي من اللي بيعمله معرفش بناء على إيه . كان ماشي ورا سراب ومكنش مهتم غير بماديات الدنيا ، وهو أكيد غلط وأذنب لما اتمرّد ضد الخليفة العباسي " أبو جعفر المنصور " .

اللي عايزين الدنيا هيندموا بعدين ، بعد ما يبجي المعاد ويمشوا منها . ومع ذلك ما يصحش إننا نشتم الدنيا ، هي بتعامل ولادها كلهم بنفس الطريقة ، مفيش تمييز ، كلهم فيهم اللي مكفيهم . وتشوف الواحد من دول عمال يسعى عشان يجمع أكثر ، أكثر حتى من اللي محتاجه أو يستحقه ، رغم إن طريقه مليون شوك ، ورجله مليانه دم . والتانيين اللي بيقوا نايمين على ريش نعام وفي بقهم معلقة ذهب وعلى طول بطنهم مليانة ، مصيبتهم بتبقى أكبر لما يروح منهم كل دا . كل الحاجات الحلوة مسيرها بيجي يوم وتخلص ، زيتها زي أي حاجة في الدنيا .

والزهد مش هينجي حد ، ولا هيعلي حد ، والدنيا ما تقدرش تتحكم في القدر ، ولو فيه ناس فاكرة عكس كدا بيقوا غلطانين . والغيب ما يعلموش إلا الله ، والجاهل هو اللي فاكر نفسه عارف كل حاجة .

والناس اللي بيقولوا على " علي " إنه الله أو ولي أو أي كلام من النوعية دي كدابين ، وكذبهم قديم ، و " علي " لما عرف إن " عبد الله ابن سبأ " بيقول عنه إنه إله ، وعمال ينشر الخبر بين الناس أمر بحرقه هو

وجماعته. وصحاب "ابن سبأ" يقولوا إن "علي" ما متش وإن ربنا رفعه جنبه وإن اللي مات واحد شيطان خد صورته وشكله، وكل ما كانوا يسمعون صوت الرعد كانوا يفتكروا إن "علي" يسلم عليهم، فيقولوا: "وعليكم السلام يا أمير المؤمنين".

و"الكيسانية" اللي جاية من الراجل اللي اسمه "كيسان" وهو كان خدام عند "علي"، الكيسانية دول إيمانهم بـ "محمد" ابن "علي" إيمان في منتهى الغرابة، وما يدخلش دماغ أي حد عاقل. في الليلة اللي مات فيها "محمد ابن علي"، كان الخليفة العباسي "أبو جعفر المنصور" ماشي في طريقه لـ "مكة"، فشاف نار مهولة في الطريق، فقال للي معاه: "أهي النار دي لو كان شافها "الحميري" الكيساني، كان افكر إنها نار معمولة بخصوص عشان موت "محمد ابن علي".

و"علي" معروف عنه إنه من أوائل الناس اللي دخلوا في الإسلام، وكان راجل أخلاقه عالية جدا، والإمام "جعفر ابن محمد" ما يتخيرش عنه.

وبلغني إنه في "البصرة" فيه مجموعة من الناس فاكرين واحد اسمه "شاباس" إله، ويilmوله فلوس كتير بسبب الموضوع دا، وهو ياخذ جزء ضخم من الفلوس دي ويديها للسلطان عشان يكسر عينه ويخليه ينفذه أي حاجة يطلبها. والراجل دالو اتكشف على حقيقته، الناس هتعرف إنه مجرد حته شوارعي ولا يسوى نكلة. وقالولي برضه إن فيه ست في "الكوفة" شرحه.

واتقالى إن فيه ناس من اللي مشيوا ورا الملحد "ابن الراوندي" فاكرينه إله، وإنه علمه واسع ملوش آخر، ويقولوا عنه صفات ومعجزات، ربنا

يشهد إنه معندوش أي حاجة منها، وإنه هم كدايين وهو من الكفرة. وده واحد من أتباعه قال عن "ابن الراوندي":

يا موزع بين الخلايق رزقها . . . مش قسمة بشر، دي قسمة آلهة

و"ابن الراوندي" لو كان فاكراً إن هو فعلاً إله، فذنبه أكبر من أهرامات الجيزة. والله الناس اللي فاضلها شوية مخ هيموتوا من كتر غبا، الناس الثانية.

كان فيه في منطقة في حلب اسمها "النيرب" راجل اسمه "أبو جوف" كان بينضح جهل، وكان بيدعي النبوة، بس كان آخره إنه يخلي الناس تضحك عليه، ويدخل في حوارات هو مش قدها. مرة كان شايل كمية قطن عنده في البيت، فقال: "أنا قطني لا يمكن يتحرق، وأدي الدليل" وبعت ابنه بلمبة جاز وقاله يقربها من القطن. ثواني وكان القطن كله والع، والستات بقت عمالة تصوت، والرجالة اتلموا عشان يطفوا الحريقة.

واحد قال إن "أبو جوف" كان بيضحك عمال على بطل، فسألوه مرة: "انت بتضحك على إيه؟" فقالهم: "الإنسان بيضحك على أي حاجة هافقة، فما بالكو اللي ربنا رزقه من واسعة". وهو الراجل كان مجنون، واللي مشبوا ورا كلامه شوية أغبيا، وهو كذب كل كلام الأنبياء، لغاية لما جه يوم ووالي حلب قتله.

قبل الحكاية دي بشوية، كان فيه راجل عسكري روماني دخل على منطقة في الشام برضه اسمها "أفامية" وفاز فيها على جيش المسلمين، فواحد من المسلمين اندس وسطهم، وقتله.

فيه شوية ناس من الشيعة يقولوا إن "سلمان الفارسي" راح هو وجماعة صحابه عند "علي ابن أبو طالب" بس ما لقوهوش. شوية وشافوا وسمعوا برق ورعد، وفجأة "علي" نزل من السما على سقف بيته ماسك في إيده سيف غرقان دم، فـ "علي" قالهم: "أصل حصلت خناقة بين ملايكة في السما، وطلعت فوق أخلص ما بينهم وأصالحهم على بعض". والناس اللي بتحكي الحكاية دي، يقولوا إن "الحسن" و"الحسين" مش ولاد "علي" وإنهم ولاد "سلمان الفارسي". يارب خد كل الكذابين بقى.

شفت يا شيخنا الحال وصل بالناس لإيه؟ الناس تاهت واتعمت، والكذب للأسف بقى هو اللي ليه سوق اليومين دول.

أما يا شيخنا حكاية إنك عجزت، فالعمر مهما طول قصير، ومفيش حد يفضل على حاله أبدا، والعمر ينفوت هوا. وربنا طول في عمرك بعد ما قضيت شبابك كله في العلم والأدب، والشباب ما بيدومش، لكن اللي بتعمله في شبابك هو اللي بيدوم، وانت شبابك كله خير وأخلاق. وبعدين لو أنا وانت متفقين على إن المرحلة دي ملهاش لازمة، وعايزين نسيها، أومال زعلانين ليه بقى؟

أما عن الستات بعد ما الواحد بقى عنده ٧٠ سنة، فهما بيشوفوا الرجالة العواجيز زي ما يكونوا ديابة وهيفترسوا حمل. مرة حكولي إن "أبو عمرو ابن العلاء" كان بيصبغ شعره بالحنة، وجاله يوم وتعب أوي ورقد في البيت، فواحد صاحبه زاره وقاله: "تقوملنا بالسلامة إن شاء الله"، فـ "أبو عمرو" رد عليه: "ما أظننش بعد ما بقيت ٨٦ سنة". فزاره صاحبه دا تاني فلقاه بقى زي الفل، فراح "أبو عمرو" قاله: "متبقاش تقول لحد على اللي

قلت هولك " . ظريف كان أوي " أبو عمرو " دا ، فضل يصبغ شعره ومكش  
معرف أي حد سنه الحقيقي ، ولا حتى صحابه .

فيه طلاب ليا قالولي إنك يا شيخنا ناوي تتجوز . والله فرحتك من  
كل قلبي ، لأن دا معناه إنك هتستقر في المكان وطلاب العلم هيستفيدوا  
منك ، وهتبقى زي الشجرة اللي بتضل على الناس بأوراقها في عز حر  
الصيف ، واللي بتديهم فاكهة مسكرة ومستوية ، واللي بتطلع أحلى  
الروايح . بس انت أكيد تعرف نصيحة " الخليل ابن أحمد " : " الراجل اللي  
يعدي الستين ملوش لا في الستات العواجيز ولا الصغيرين ، لكن يختارله  
حاجة وسط ، " لا فارض ولا بكر عوان بين ذلك ، فافعلوا ما تؤمرون " .

وعلى رأي اللي قال :

لو جابلولك ست عجوزة متجوزهاش . . . ولو قلعت هدومك ، فيبقى  
عشان تجري أسرع

ولو قالولك دي في نص عمرها الثاني وخبرة . . . اعرف إن نص عمرها  
الأحلى هو اللي فلسع

ويمكن تلافيلك ست زي " أم عمرو " اللي كانت مرافقة " أبو الأسود  
الدؤلي " ، ويمكن لو اخترتها عجوزة يكون لسه فيها الرمق ، رغم إن معظم  
الستات العواجيز عاملين زي القماش المرقعة اللي لا تمسك ولا تتشاف حتى .  
والشباب ما بيدومش ، زي الشاعر اللي قال :

انتي فرحتي لو كنتي دايمة . . . لكن مفيش دوام لإنسان

وانت لو نويت فعلا يا شيخنا على الموضوع دا، هتلاقى الستات  
ابتدت تتخاف عليك، لأن اللي بتوزن الأمور صح، هتعرف إنك فرصة ما  
تفغش تضيعها من أيديها. ولو حبيت تتجوز واحدة عجوزة، مش هتكون  
انت أول واحد اللي يعمل كدا، وهتبقى زي الشاعر اللي قال :

لو البنات الصغيرين سابوني . . . يبقى الكبار هم اللي هينصفوني

أوزي الراجل اللي قال :

اتجوزت عجوزة، ودفعت فيها مالي . . . زي التجارة، فيه الرخيص وفيه  
الغالي

عموما العرب بيحبوا الستات الكبار الخبرة والعواجز، وعادي  
عندهم إن شاب صغير يتجوز واحدة في سن أمه. عندك النبي، اتجوز  
"خديجة" وهو لسه شاب وهي كانت كبيرة أوي في السن. و"أم سلمة"  
بعد ما مات جوزها في غزوة أحد، النبي اتجوزها، وقالتله لما جه يتجوزها :

- يا نبي، أنا ست كبيرة وما بستحملش الغيرة.

- لو كان على كبر السن، فأنا أكبر منك، ولو كان على الغيرة، فهدعي  
ربنا يشيلها منك.

وماعنديش شك إنك يا شيخنا لما كنت في مصر، كان عندك كام بنت  
يخدموك ويشوفوا طلباتك. ولولا إن الواحد لما بيكبر بيبقى عايز اللي يخدمه،  
كان أحسنه لو عرف يكفي نفسه بنفسه، وعلى رأي اللي قال :



العيشة مش أكثر من بيت وهو يرد الروح . . . من غير زعيق ولا دوشة  
منين ما تروح

"ابن القنصري" قالى مرة إنك كنت بتدور على ولد يساعدك، بس  
أحسنلك يا شيخنا إنك تحبيلك خدام يبقى تحت أمرك وطوعك وقت ما تحب،  
لأن الولد لو جالك مرة مش هيجيلك الثانية، وعلى رأي "البحترى":

هي العراق كلها ما فيهاش حد . . . يخدمني بدل ما للناس بمد اليد؟

وعموما الواحد لو قدر يخدم نفسه بنفسه يكون أحسن، بدل ما بيته  
يتملي خدامين ويبقى مضطر يضربهم عشان يسمعوا كلامه، أو يفضل  
يديهم في أكل عشان يكسر عينهم.

وناس كثير من أهل الأدب ولاد حلال، وطلبوا مساعدة من ولاد  
فعملولهم مشاكل كثير أوي. تلاقيه مثلا لما بيعته يشتري بطيخة، فيحاول  
الولد يضحك على البايع بأي شكل عشان يخرج نفسه مصلحة من  
الفلوس، بس البايع يبقى أذكى منه ويديله أصغر بطيخة عنده متساو يش  
نكلة. واللى يزود الطينة بلة، إنه وهو راجع بالبطيخة يقعد يلعب بيها  
وينططها من إيد لإيد، لغاية لما تقع منه وتتكرس ويبقى منظرها يسد النفس.  
ولو رجع بيها سليمة، تلاقيه يعدي الأول على صحابه وينزل معاهم الترفة،  
وواحد من صحابه ياخذها وياكلها قدام عينيه وهو بيتفرج ولا على باله.

أو ممكن يديه إزازة، ويبعته يجيب فيها لبن، فيتكبل ويقع واللبن يتدلق  
والإزازة تتكرس. وتحيل بقى لو الموقف دا حصل مع حد متشائم زي "ابن  
الرومي" مثلا، هيقعد يتخيل بقى إنه حياته كلها هتدمر زي ما الإزازة اتكسرت.

أعرف ولد عندنا في "حلب" كان يقول إن كان شغال عند "أبو أسامة الهروي" في مصر، وإنه كان بيعه أوي عشان أخلاقه العالية، بس "الهروي" باع الولد عشان مكش بيعرف يعوم. وأنا حككتلك الحكاية دي عشان أنا عارف معزة "الهروي" عندك.

أما عن أهل مدينتي "معرة النعمان"، فلو رأي الأعراب عني كويس، فمش غريب، والحمد لله، إن أهل مدينتي يكون رأيهم هم كمان حلو عني زي ما قلتلي يا شيخنا. بس هما والله بيطلبوا مني العلم كإنهم بيطلبوا من واحد أخرس يقولهم خطبة، أو زي اللي بيطلبوا دفا في عز شهور البرد.

وأستاذي الشيخ "أبو عباس الممتع" رغم سنه، بس قلبه لسه قلب طفل صغير بريء، وهو معايا ولا الإخوات، فضله عليه زي أبويا أو جدي. وفي أخلاقه زي ما قال ربنا: "وما لأحد عنده من نعمة تجزي".

أما خوفك يا شيخنا من إنك تعمل أي حاجة تغضب ربنا، فدا من علامات الناس ولاد الحلال اللي يعرفوا ربنا بجِد. بس برضه مش عايزك تيأس من رحمة ربنا، "قل يا عبادي الذين أسرفوا على أنفسهم لا تقنطوا من رحمة الله".

فيه أدباء كتير شربوا وغنوا وفي الآخر تابوا، وإن شاء الله تتقبل توبتهم. وعادي إن البني آدم يتوه في السكة أحيانا، وربنا بعد كده يوريه سكة الحق. وساعات الواحد بيتنقذ وهو خلاص على وشك الغرق. يعني شوف "الفضيل ابن عياض"، كان قطاع طرق، وحب خدامة وهو راجلها في يوم سمع واحد بيقرا القرآن ويقول: "ألم يأن للذين آمنوا أن تخشع

قلوبهم لذكر الله " فقال : " آه والله يا رب ، جه معاد التوبة يا رب " ، وتاب في ساعتها وبقي من الزهاد كمان ومن الناس العلماء الصالحين .

وشباب كثير كانوا مقضينها بالطول والعرض ولما كبروا اتعلموا وعرفوا الصبح من الغلط وبقوا بينصحوا الناس بالخير . ومغنين وعازفين تابوا وبقوا شيوخ وبيقفوا على المنابر ويقولوا للناس مواعظ . وهنروح بعيد ليه؟ ما عندك من ضمن اللي كانوا مغنين الخليفة "عمر ابن عبد العزيز" والإمام "مالك ابن أنس" ، واللي قال الكلام دا "ابن خرداذبة" لو بيكذب بقى يبقى منه لله .

ومعروفة حكاية "أبو حنيفة النعمان" إنه كان يبشرب مع الشاعر "حماد عجرد" ، فتاب "أبو حنيفة" بس "حماد" لأ. فسمع "حماد" إن "أبو حنيفة" بقى بيشتمه ويعيب فيه ، فكتبه :

لو إيمانك مش هيكمل . . . غير بشتمي وقل قيمتي  
فاشتم أكثر وعيب فيا . . . مع القريب وبرضه البعيد  
ياما مدحتني لما كنت . . . في المعاصي غرقان لشوشتي  
أيام ما كنت معايا تشرب . . . ولما يخلص تقولي : عيد .

وبعدين هما مش الصحابة كلهم كانوا هايصين في الحرام قبل ما ربنا يتوب عليهم؟ دا حتى بيقولوا إن "عمر ابن الخطاب" خرج من بيته عشان يروح يلعب قمار ، فملقاش حد ، فقال خلاص يروح الخمارة يشربله كاسين ، فبرضه ملقاش حد ، فقال : "ما بدهاش بقى ، أروح أسلم وخلاص ."

فربنا هو الهادي، مش هو اللي قال للنبي: "ووجدك ضالاً فهدى"؟

والكاتب "أبو معشر المدني" قال في كتابه "المبعث" إن النبي قبل الوحي كان دابح دبيحة للأصنام وخذ منها حنة وطبخها عشان ياكلها، وجه معاه "زيد ابن حارثة"، ابنه بالتبني، وراحوا الاتنين ياكلوها سوا في الخلا. فعدى عليهم "زيد ابن عمرو ابن نفيل" وهو كان راجل مؤمن بربنا وكان بيحرم الأصنام وما بياكلش من اللحمة اللي مدبوحة عشانها، وكان بيحرم كمان قتل البنات. المهم إن النبي و"زيد" عزموا عليه ياكل معاهم، فقالهم: "أنا ما بياكلش حاجة اتدبحت للأصنام، وما بياكلش حاجة ما اتذكرش عليها اسم ربنا، عشان أنا ماشي على دين سيدنا إبراهيم عليه السلام". فأمر النبي "زيد" إنه يرمي الأكل كله فوراً.

وكان فيه حكاية تانية إن "تميم ابن أوس الداري"، كان بيدي النبي كل سنة إزازة خمرة هدية، فلما اتحرمت، بقى النبي ياخذها ويدلقها على الأرض.

وأنواع الخمور لو بقت بتسكر تبقى حرام، لكن غير كذا عادي، وناس كتيرة من المشايخ شربوا خمرة. و"أحمد ابن يحيى ثعلب" قال إن "أحمد ابن حنبل" اتسأل عن النبيت، والنبيت عند الشيوخ غير الخمرة، ف"ابن حنبل" قال: "أنا نفسي سقيت الناس نبيت بيدي يوم ختان" خلف ابن هشام البزاز.

و"عمر ابن الخطاب" سمح للمسلمين إنهم يشربوا نوع نبيت اسمه "طلاء" مش متخمر من اللي كانوا بيعبعوه المسيحيين في الشام. ودي كانت

حاجة غريبة لإني أعرف إن "الطلاء" بيسكر. بس أساسا حلاوة الخمرة،  
إنها بتسكر، لكن غير كدا يبقى ملهاش لازمة، وباقى المشروبات أحسن  
منها وطعمها أحلى منها.

وربنا يبعدك يا شيخنا عن اللي قاله "أبو نواس":  
قالولي كبرت، قلت: كبرت بس لسه عارف  
أخلي إيدي تودي كاسات الخمرة للشفايف

والناس من زمان وهي بتشرب خمرة بس كانوا بيداروا، والأبيات  
بتاعة "الحسين ابن الضحاك الخليع" اللي نسبوها لـ "أبو نواس" بتقول: ٩

اللي يقولك إنه بيكره النبيث، اوعى تصدقه  
حتى لو حلفلك ميت يمين إنه عمره ما هيشربه

وأنا شايف إنه من النفاق إنك تشرب الخمرة لو قال الشيوخ إنها  
حلال، وما تشربهاش، لو قالوا إنها حرام، و "أبو نواس" كان عنده حق لما  
قال:

لوناوي تشرب ما تتمحكش في الناس  
خلي دائما أعمالك لله، مش للناس

وأنا شايف إن آن الأوان إنك تعلن توبتك يا شيخنا، عشان خبر  
توبتك يسمع في البلد، فيتلخوا عليك الشباب والعواجيز والأدباء  
ويباركولك. ويتجمعوا عندك ويسمعوا منك الحكايات والعلم المفيد،  
وتخطب في مساجد حلب، لأن من بعد موت عالم اللغة "خالويه" وحلب  
بقت حالتها الثقافية ما تسرش.

وخلي دائما في الندوات العلمية جنبك سكينه، عشان لو شفت مرة جنب أي جامع قربة خمره، تنط عليها زي النمر وتشقها نصين ويخرج منها النبيت زي الدم، ونقرا الآية: "إن الحسنات يذهبن السيئات، ذلك ذكرى للذاكرين".

ولو صاحب القربة راح اشتكى للسلطان، والسلطان سأله: "مين اللي عمل لك كذا؟" وهو قال اسمك، هيقولك السلطان: "عفارم عليك، راجل من ظهر راجل". وانت لما تعمل كدا مرة ولا مرتين كمان، هتلاقى بباعين الخمرة أساسا بيمشوا من طريق تاني لما يشوفك هالل عليهم من بعيد، زي ما كان "أبو سفيان" بيعمل من كتر خوفه من النبي.

ممكن يبقى السلاح اللي معاك عبارة عن مطواة صغيرة كدا عشان تعرف تخبيها، ولما تشوف أي قربة خمره تشقها. وساعتها اللي هيشوف المنظر دا ويكون قرا كتاب "المبتدأ" قبل كدا، هيفتكر على طول كلام "طالوت" لما أمر بنته اللي هي كانت مرات سيدنا "داود" إن هي تدخله على "دواد" وهو نايم عشان يقتله، فحطت قربة خمره في السرير وغطتها، فلما ضربه بالسيف والخمرة بلت السرير، افتكرها دمه، فندم على اللي عمله، وقرر يقتل نفسه وبنته بسبب اللي عمله، بس بنته مسكت إيده وفهمته كل حاجة، فشكرها على اللي عملته.

ولو شفت يا شيخنا واحد جاي يدخل الجامع وشكله مش على بعضه، لازم تخليه ينفخ عشان تعرف من ريحة بقه إذا كان شارب ولا لأ، ولو طلع شارب يبقى ملوش عندك يا شيخنا غير الجلد، ومش أربعين جلدة زي ما بيعمل أهل الحجاز، لأ، ثمانين جلدة زي ما بيعمل أهل العراق،

عشان يعرف إن الله حق. هو النبي كان بيكتفي بأربعين جلدة، بس لما "عمر ابن الخطاب" وصل للحكم، استقلها، فسأل "علي"، فشار عليه إنها تبقى ثمانين جلدة.

ولو حقيقي إنه أهل الآخرة بيعرفوا أخبار أهل الدنيا، فيمكن يكونوا حور العين بتوعك بيسألوا الأموات عن أخبارك، فيسمعوا مرة إنك في مصر، ومرة في العراق، ودلوقتي في حلب، فلو انتشر موضوع توبتك دا بين الناس، ومات واحد ابن حلال من أهل حلب وقال للهور العين على توبتك، مش بعيد تلاقيهم عمالين يغنوا ويرقصوا من فرحتهم بيك، والجارات بقى يجوا يهنوهم وبياركولهم عليك.

وأعوذ بالله من الناس اللي الكبر بدل ما يهديهم يخليهم يزودوا شرب الخمرة، كأنها هي اللي هتهون عليهم المصايب. زي الخليفة العباسي "عبد الله ابن المعتز"، اللي مراعاش حدود الخلافة ولا سنه وزود الشرب لما كبر. الغريب إنه هو كان هيموت على الخلافة وفعلا خدها ومكملش فيها شهر على بعضه.

وعلى فكرة، "المبرد" كان هو و"البحري" يشربوا، بس "المبرد" ساب السكة دي.

وانت يا شيخنا مش زي "أبو عثمان المازني" اللي لما الناس عاتبوه عشان يشرب قالهم: "لو شربي هو أكبر ذنوبي، هبطل شرب".

أما "إبراهيم ابن المهدي" فمكتش يصح إنه يعرض على "محمد ابن حازم" إنه يشرب خمرة. وبيقولوا إن "المعتصم محمد ابن الرشيد ابن

المهدي " طلب من "إبراهيم" إنه يغنيه، فـ "إبراهيم" عيط، المعتصم سأله: "بتعيط ليه؟"، فقال له: "أصل أنا كنت وعدت ربنا بني لو كملت ستين سنة أتوب، وأنا خلاص تيمت الستين". فـ "المعتصم" عفاه من الغنا والشرب.

والتوبة إذا مكتتش بجذ، يبقى مش هتقبل. كان عندنا واحد في البلد ييموت في الخمرة، بس لما كبر، قرر إنه يشرب خمرة مطبوخة بس. فكان لما يروح مع صحابه في سهرة شرب، كان بيحبيب معاه قربة بيها الخمرة المطبوخة بتاعته، وصحابه كانوا يشربوا من الخمرة العادية. فلما يمرروا عليه الكاس عشان يشرب فيه، يغسله من بواقي الخمرة بتاعتهم ويحط فيه خمرته هو المطبوخة، بس لما كانت بتخلص خمرته، دان يشرب معاهم من خمرتهم.

أما حكاية إنك تكلم نفسك وتعاتبها، فمفيش حد عايز يغير من نفسه، بس الموضوع بيبقى صعب، الزاهد بيبقى نفسه يبعد عن شهوات الدنيا بس مش قادر، زي ما الغزالة متقدرش تبقى لبوة، ولا الزلطة لؤلؤة، وشوف ربنا لما قال: "يوسف، أعرض عن هذا، واستغفري لذنبك إنك كنت من الخاطئين".

فيه ناس تلاقيها مؤمنة بالآخرة، ويوم القيامة، وبالأرحمانية، ومع ذلك ما بيرموش ولو حنة عضمة صغيرة لكلب، ولا بيدوا الخدمة ولو سلسلة بلاستيك، كإنه عمره ما هيموت. وكثير من اللي بيقروا الآية: "مثل الذين يتفقون أموالهم في سبيل الله كمثل حبة أنبت سبع سنابل في كل سنبلة مائة حبة والله يضاعف لمن يشاء والله واسع عليم" وهم مؤمنين بيها،



ويخافوا ربنا، ومع ذلك ما بيدوش إلا أقل القليل ، ومبيطقوش الشحاتين والمساكين . فما بالك بقى باللي أساسا مش مؤمن لا بآخرة ولا جزاء؟

يعني طبعا انت سمعت يا شيخنا عن الحكاية بتاعة لما "أبو طلحة" اتخانق مع يهودي وراحوا يحكموا النبي في مشكلتهم . والمشكلة كانت على نخلة موجودة بين جنيته اليهودي وجنيته "أبو طلحة" ، فالنبي قال لليهودي: " ممكن تديله النخلة وأنا أضمنلك نخلة بدالها في الجنة؟ " وفضل النبي بوصفله في نخلة الجنة وجمالها، بس اليهودي قاله: " لا يا عم، يفتح الله، أنا عايز أضمن حقي في الدنيا "، فـ "أبو طلحة" قال للنبي: " طب يا نبي، لو أنا ادبته جنيته كلها، تضملي جنيته بدالها في الجنة؟ " النبي قاله آه، فوافق "أبو طلحة" وخذ اليهودي وراح على جنيته، وكانت مراته وعياله قاعدين فيها بياكلوا منها، فراح مدخل صباعه في بقهم واحد واحد وخرج منها البلح اللي كانوا بياكلوه، فمراته سألته:

- بتعمل كدا ليه في عيالك يا "أبو طلحة"؟

- عشان أنا خلاص بعث الجنينة .

- اوعى تكون بعثها بخسارة

فحكالها اللي حصل، فقرحت بيه .

ولو قلت للمؤمنين بتوع الأيام دي إديني طوبة وربنا يعوضك عنها في الآخرة بسبيكة ذهب، مش هيوافق، ولو قتلته إديني خدامتك العورا وربنا يعوضك عنها في الآخرة بحورية، برضه مش هيوافق . والمشكلة إن دول كدا المؤمنين، فما بالك باللي مش مؤمنين لا بالآخرة ولا بالعذاب؟

أما "فاذوه" اللي دماغه اتشفشت وبقت زي الهريسة، فخذ جزاؤه، رغم إنه، سبحان الله، إيد الهون مش معمولة عشان تهرس راس بني آدمين. بس كل واحد وله نهاية، والمصايب بتيجي في أي وقت، وهو فضل يأجل في التوبة، وكان زي حبيبة "امرؤ القيس" لما قالها:

عمالة تقولي بكرة وبعد بكرة... بخلائة علينا ليه يا قطّة؟

ويقولوا إن العالم "أبو الهذيل العلاف" كان بيلف في الشوارع يقول للناس: "اوعوا تعملوا زي الخدام بتاعي"، عشان هو كان عنده خدام فضل برضه يأجل توبته لغاية لما في يوم وقعت على راسه طوبة بطحته ومات.

وأنا أول مرة أسمع فيها عنك يا شيخنا كان من واحد متخصص في أوزان الشعر من "واسط" في العراق. قال إن هو شافك في "نصيبين" في سوريا. كنتو في اجتماع مع "أبو الحسين البصري". وبرضه سمعت عنك لما أنا كنت مع عالم اللغة "أبو أحمد عبد السلام ابن الحسين"، الله يرحمه، كان راجل قمة في الأخلاق، ولقيت عنده كتب مكتوب عليها اسمك. وانت أشهر من نار على علم، ومش محتاج حد يقعد يشرحلي انت مين. زي عالم الأنساب "البكري" لما سأل "رؤية ابن العجاج":

- انت مين؟

- أنا "ابن العجاج".

- تمام، أنا كذا خدت اجابتي.

والعلماء اللي انت درست على أيديهم، فدلول زي الشمس اللي بتنور عقول طلابها، ومجرد النظر ليهم شرف، فما بالك باللي خد من علم

كل دول؟ وهم أكيد نورولك طريقك، زي ما "الكيتاني" أكيد فهمك معاني سور القراءان، وكإنك اتعلمتها على إيد الرسول نفسه، أو من جبريل مباشرة. وأكيد برضه سهلولك فهم اللغة العربية، لدرجة إن كتاب "سيويه" بقى سهل زي المية بالنسبالك، وبقيت بتمشي في اللغة العربية من غير مساعدة.

وطبيعي إنك تبقى صاحب "أبو الحسن المغربي" لأنه كان راجل بجد، وبيساعد أهل الأدب وطيب معاهم وكان زي ما يقول الشاعر:

ولو شفتته مع أخوه وصاحبه . . . متعرفش مين فيهم أقربله

أما الخمس حجات اللي انت عملتهم، فإن شاء الله ربنا يدخلك الجنة من أول حجة، وتتبرع بالأربعة الباقيين لأهل العلم اللي ملحقوش بحجوا. وأنا متخيلك وانت واقف مع باقي الحجاج، وكل واحد مشغول بالدعاء، وانت عمال تفكر في كلام التلبية، وعمال تشوف وزن الكلام والموسيقى بتاعته: "لييك اللهم لبيك . . . لبيك لا شريك لك لبيك"، "لييك ربنا لبيك . . . والخير كله بيديك".

ومتخيلك برضه وانت على وشك إنك تبوس الحجر الاسود، فتفتكر الأبيات اللي قالها "قيس":

افتكرتك يا حبيبتى وأنا وسط الحجاج والناس

ودعيت ربنا في بيته بقلب مليان إخلاص:

يا رب توب عليا من الخطايا والذنوب

بس حبي لليلى عنه أبدا ما هتوب

ويمكن تكون افتكرت برضه الأبيات بتاعة " عمر ابن أبو ربيعة " وانت  
بتعمل الطواف :

بطوف مع اللي بيطوفوا . . . وبسجد لله طول الليل  
وأقرأ قرءان وادعي ربنا . . . يحزن عليا قلب الجميل

الأبيات دي جميلة جدا، بس فيها شوية عيوب في النحو، وسبحان  
الله، مفيش أي حاجة خالية من العيوب .

ومتخيل إنك وقت النفر، بعد ما رميت الجمرات ورجعت على مكة  
من " منى " ، افتكرت البيت :

ودعي قلبي يا حبيبي . . . خلاص جه وقت الفراق

مفيش بين الموت والحياة إلا . . . شعرة تفصل ما بين العشاق

لو فضلت في مكة المدة كلها ومع كل الحجاج اللي انت عملتها يا  
شيخنا، يبقى أكيد بقيت تعرف مكة زي كف إيدك . ولو كنت بتسافر اليمن  
أو أي دولة تانية وكنت بتروح مكة تحج في الموسم بس، فتوابع هيك  
أكبر، وهتكون أقرب للرجوع لربنا .

ويمكن كمان تكون رحت عند " المغمس " اللي وقف فيها فيل " أبرهة "  
واترحت على الشاعر " طفيل الغنوي " عشان فيه ناس بيقلوا إنه لحق  
الإسلام وقال قصيدة في مدح النبي، رغم إن القصيدة محدش لقها في ديوانه .  
ويمكن تكون كمان افتكرت أبيات " أمية ابن أبو الصلت الثقفي " لما قال :

آيات ربنا واضحة . . . ما ينكرهاش إلا جاحد  
حتى قيل أبرهة . . . فضل هنا في المكان راقد

ومش بعيد تكون برضه فكرت في أبيات "نقيل ابن حبيب الخثعمي" ، اللي  
كان مشارك في حرب الفيل لما كان "أبرهة" عايز يدخل مكة :

لو كنتي شفتي اللي أنا شفته في "المغمس" . . . كنتي ساحتيني يا رودينا يا  
نور العين

ربنا ساعدنا بطيور يرمي عليهم حجر . . . ودوروا عليا الإثيوبيين ، وكلّهم  
ليهم عليا دين

اللي عايز أعرفه فعلا هو انت يا شيخنا عملت حج بس ولا حج  
وعمرة؟ وإن شاء الله متكونش شفت هناك واحدة ست عجوزة تقولك :  
"انجوزني جواز متعة زي ما الشيخ "عبد الله ابن العباس" فتى وقال إنه  
حلال" وتكون يا شيخنا افكرت الأبيات اللي بتقول :

وبعد الطواف قالتلي : ملكش نفس . . . نكمل بالفتوى بتاعة ابن عباس؟  
مش عايز حته طرية معاك تمتعك . . . طول الليل لغاية لما يصحوا الناس؟

أما ولاد "جوهر" اللي اتقتل وانت في الحج ، فحظهم وحش ،  
وأبوهم الدنيا غدرت بيه بعد ما كانت راضية عنه ، زي الجواهر اللي في تاج  
الملوك ، ليها قيمة طول ما الملك لابسها ، لكن وقت ما يقع ، بتروح قيمتها .  
هو كان قائد الجيش ، بس الجيش معرفش يحجميه من الموت .

أما عن "أبو القاسم المغربي" اللي كان صاحبك ، فعلى رأي اللي  
قال : "اذكروا محاسن موتاكم" ، حتى لو كان وحش في الدنيا ، بعد موته ما

يجوزش عليه إلا الرحمة . ويمكن " أبو القاسم " قال اللي قاله وعمل اللي عمله في ساعة غضب . واللي يسامح الناس وهم لسه عايشين ، أولى بيه إنه يسامحهم بعد الموت ، وسلام واحد على حد في قبره ، أحسن من ألف سلام على الناس في القعدات والندوات . وأكد انت عارف البيت اللي قال :

بروح لصاحبي في آخر مكان هو فيه

يعني بيروح يزور قبره .

أما حكايته معاك لما استغرب إنك كتبت أوصاف الشمعة في شعر بسرعة ، فمتضايقش ، سمعتك في الأدب وسرعة بديهتك معروفين ومشهورين زي "الحسن" ، و"الحسين" عند عيلة "هاشم" ، وهو فيه حد يستغرب إن السحاب بينزل مطر؟ أو إن الشمس بتدي حرارة ونور؟ وسمعة شيخنا منتشرة زي ريحة اللافندر في الصحراء ، بس فيه ناس مزاجها كدا تتخاقل وتعتكن على العالم كله ، رغم إنه هو عارف قيمتك في الأدب كويس أوي . وعموما فيه أكثر من طريقة وقت تأليف الشعر اللي بتثبت سرعة البديهة . مثلاً فيه الارتجال ، ودا انت فيه ما شاء الله عليك في منتهى السرعة . وفيه إنك تقول بيت واحد بس ، وتقول للشاعر الثاني : "كمل انت بقى" .

وأما "أبو عبد الله ابن خالويه" وحكاية إن راح يدور في الكتب عشان يجاوب على السؤال ، فدا مش عن جهل وإنه نسي لا سمح الله ، لكنه مجرد بيحب يتأكد من الكلام قبل ما يقوله عشان يكون موثوق فيه . وإنه ياخذ رأي الناس اللي معاه أحسن ما يبقى رأيه هو بس . ومن ساعة ما مات مفيش حد تاني أبدا عرف يحل محله في الشام ، وفراقه كان علينا صعب

أوي، زي يوم موت "هشام ابن المغيرة" لما حزن أهل مكة كلهم عليه  
لدرجة إن فيه شاعر قال :

مكة بقت بتترعش من الرعب . . . ما خلاص راح مننا هشام  
كان شجاع وكريم ويحميها . . . وراجل بجده مش مجرد كلام  
وكان حنين مع الكل من غير . . . فروق، سواء غلابة أو عظام

وعالم اللغة "عبد الواحد ابن علي أبو الطيب" كان عنده كتب كتير،  
زي "الإتباع"، و"الإبدال"، و"شجر الدر"، و"الفرق" وغيرهم، بس  
كلهم ضاعوا لما الروم دخلوا الشام وقتلوه هو وأبوه. وكان "ابن خالويه"  
مسميه اختفاسية عشان كان قصير.

واحد معرفة ثقة حكالي إن كان في مجلس مع "خالويه" وجاله واحد  
من طرف "سيف الدولة الحمداني" بيقوله تعالى عشان "أبو الطيب" عندي  
وعاين أسألكو على كام حاجة. فصاحبي قالي إنه راح "للمتنبي" وقاله  
علو الحكاية، فـ"المتنبي" اترياً عليهم وقاله: "هيقعد بقى يسألهم في  
حب. كتب اللغة العربية".

و "أبو الطيب" كان فيه بيته وبين: "أبو العباس ابن كاتب البكتمري"  
: معرفة وقاله مرة :

يا واد يا عبس انت حبيب قلبي . . . وانت نورنن عيني من جرة  
لوفيه نجة . . . ما يفاك اشكيابي . . . وارغي ومتخافش دي السهرة - تلوة  
وع . . . "أبو الطيب"، بالإضافة إنه عالم لغة، كان ساعات يكتب شعر.

وانت في رسالتك يا شيخنا مدحتني كثير ، وربنا وحده هو اللي يعلم إن أنا لا لبيا لا في الطور ولا في الطحين . وكل ما كنت أقرر أبطل شغل ، تبجي ظروف تمنعني . وانت لو كنت قعدت في مدينتي "معرة النعمان" سنة واحدة بس ، مكنتش سمعت أي حد حتى بينطق اسمي . لكن انت كل الناس عارفك ، وعلمك مغطيني من ساسي لراسي ، والكلام اللي في رسالتك مكنش كلام عادي ، دا كان جواهر متقدرش بتمن . انت بس كل الحكاية إنك طيب ، والطيب بيتخدع في الناس كثير ، عشان كذا اتخدعت فيا .

وانت كنت قلتلي يا شيخنا إنك لما رحت مصر ، فكيت عن نفسك شوية هناك ، ففي حكمة بتقول ، "فكوا عن نفسكو من غير ما تنسوا ربنا" ، و"أحيحة ابن الجلاح" قال في بيت شعر ليه إن الواحد بيزهق والمفروض يفك عن نفسه من وقت للثاني .

وانت كان المفروض وانت هناك إنك تستغل وقتك وتفيد الناس من علمك ، عشان السن برضه له تأثير ، وانت لو كنت ادبتهم أقل جزء من علمك كان هيكفيهم ويفيض ، ونقطة واحدة من علمك تفرقهم . وراجل من قريش قال :

أحلى حاجة إنني كبرت واتهديت . . . عشان كل ما بفتكر شبابي بحس بالندم  
مكنتش عاتق لا خيل ولا ستات . . . حتى شربت نبيت أحمر بلون الدم

كل حاجة وليها آخر ، وانت أكيد يا شيخنا حققت خلاص كل اللي نفسك فيه ، والدنيا سراب يطلعلك لسانه . وانت قعدت مع ملوك ووزراء كثير ، وأكيد سمعت عن حكاية الملك "النعمان ابن المنذر الأكبر" لما ساب



ملكه كله وبقي يلبس لبس عادي بدل الحرير ، وكان عايز يفضل هايم في الأرض ، وهو اللي 'عدي ابن زيد' قال فيه :

الملك اللي عنده قصرين . . . ومبسوط بملكه المنتشر منين ما يروح  
في لحظة فكر وقال : طيب وهي . . . إيه الفائدة لما كله في يوم هيروح ؟

والسكر متحرم في كل الملل ، وسمعت إنهم في الهند ما بيخلوش  
واحد بيسكر يبقى ملك عليهم ، عشان شايفين إن دا غلط ، لأن ممكن تحصل  
مصابة في المملكة ، ويبقى مش دارى بحاجة ويخسر ملكه وهو سكران ومش  
فايق .

الله يلعن الخمرة ، بتقلل من قيمة الناس ، ومبيجيش من وراها أي  
فائدة ، واللي يصطيح بيها ، بيمشي للمصايب برجليه . واللي يتمسى بيها ،  
بيمشي للذنوب برجليه ، واللي يعشقها عقله بيخف ، ويبعد عن طريق  
الحق بسرعة . واللي يرضى بصحبته ، يبعد عنه الوقار ، ويتبقى ملوش  
مواقف واضحة ، ويبقى زي العيال ، ويتمنع عنك النجاح والتوفيق ،  
ويتفضح سرك ، ويتخليك زي الميت وانت حي ، ويتخلي الصاحب يغدر  
بصاحبه ، ويتمرض صاحبها . وناس كتير جالها السل ، وماتوا في عز  
شبابهم بسببها وهم لسه ملحقوش يعيشوا الدنيا .

وانت يا شيخنا الحق ابعدها عنها ، وكفاية الحزن على صحابك اللي ما  
توا بسببها ، وزى ما قال "الجعدي" :

افتكرتهم وقلبوا عليا المواجه ، والحزن عليا فرض  
كانوا لسه معايا إمبارح ، والنهاردا بقوا تحت الأرض

وفيه ناس، لما شافوا المصايب بعينهم، حرموا على أنفسهم الشرب لغاية لما يقابلوا وجه كريم .

وأنا مبسوط إنهم رجعولك فلوسك اللي كانت اتسرقت منك، وهم البنات اللي زي بنت أختك دي كلهم كدا، ما بيحترموش أنفسهم غير لما توريهم العين الحمرا .

وفلوسك لو كانت من مصر فدي حاجة حلوة أوي . مرة " عمرو ابن العاص " قال لـ " معاوية " :

- حلمت إمبراح بيوم القيامة وإنك كنت متغطي بالعرق لحد بقق .
- وما شفتش أي حاجة من فلوس مصر في حلمك؟

فانت فلوسك يا شيخنا أكيد كانت من مصر، ومكنتش الفلوس العادية اللي بيتعامل بيها الشعب، لأ، دي فلوس الملوك . والحمد لله إنه حفظلك فلوسك، وحصلش معاك زي الناس اللي بيحوشوا الذهب عشان بعد كدا يصرفوه على الخمارات والستات . زي الشاعر " المرقش " اللي قارن الذهب بوش حبيته المدور، وهو لو كان شاف فلوسك يا شيخنا كان عرف إنهم أجمل من حبيته .

والفلوس دي انت أكيد خدتها من ولاد الناس النبلا، يا إما عشان ساعدتهم في حاجة أو عشان مدحتهم، لكن ما كسبتهمش في رهان ولا هتصرفهم في كلام فارغ . وعموما الفلوس عند أي حد، سواء عيبط أو ذكي، أهم من الختم بتاع " عبد الملك ابن مروان " اللي بيقولوا إنه كان أول خليفة يعمل عملات في الإسلام . وعملاتك مش من العملات السكة اللي

جت مع البيزنطيين، لكن عملات وفلوس حقيقية مسلمة جاية من الشام. ولو الشاعر اللي زعل عشان باع حصانه وبدله بجمار عشان يأكل بالفرق عياله خد زي عملاتك يا شيخنا، مكنش زعل ولا حزن على حاجة.

فالحمد لله إن فلوسك رجعتلك، وما اتصرفتش على الخمرة. ودا عشان انت فلوسك حلال، وما اتوسختش بالذنوب والمعاصي. وانت يا شيخنا ناصح وعارف إنت بتدي فلوسك لمين وبتوديهها فين، وزې ما قال ربنا: "ومن أهل الكتاب من إن تأمنه بقنطار يؤده إليك ومنهم من إن تأمنه بدينار لا يؤده إليك". والآية دي نزلت على الرسول في وقت كان الناس لسه عندها دم، لكن دلوقتي لو سلفت حد ولو حتى نكلة، تبقى عينيك في وسط راسك من قلقك على فلوسك.

بس المفروض الأمانة تنتشر أكثر في العالم كله، وتبقى هي القاعدة مش الاستثناء. وجزاء الواحد على أمانته في الآخرة كبير. بس دا ما يمنعش يا شيخنا إنك تاخذ بالك من فلوسك، وتحافظ على اللي باقي منها، لإنهم مجوش بسهولة، ووجودهم حاجة تفرح.

وبما إن فلوسك عبارة عن ٨٣ دينار، ففلوسك كدا أكثر من صحاب موسى اللي ربنا قال فيهم: "واختار موسى قومه سبعين رجلا لميقاتنا" وأكثر من عدد مرات الاستغفار اللي في الآية: "إن تستغفر لهم سبعين مرة فلن يغفر الله لهم"، وأكثر كمان من دراعات السلسلة اللي في الآية: "في سلسلة ذرعها سبعون ذراعا فاسلكوه".

يقولوا إن الفلوس بتداري عيوب الناس، بس اللي عنده أخلاق  
بجد، ما بيقيسش الناس بفلوسهم، ومهما كان الأخلاق هتفضل أحسن من  
الغنى، زي ما الذهب هيفضل قيمته أعلى من الفضة. وأكيد انت عارف  
حكاية "سعيد ابن العاص" لما سأل "الخطينة" :

- مين أحسن واحد بيقول شعر؟

- "أبو دؤاد الإيادي" اللي قال :

البخل والجشع مش بس عيب . . . دول بيخسفوا عمر النبي آدم

- ومين بعده؟

- "حسان ابن ثابت" لما قال

أحلام كثير قتلها الفقر . . . والغنى بيغطي على النباء والجهل

- ومين بعده؟

- "أعشى قيس" لما قال :

الصبح بتبقى في غاية اللطافة . . . وبالليل بتركبك السخافة

- ومين بعده؟

- ما خلاص يا عم بقى . هتخليني أكره كل الشعرا اللي أعرفهم ولا إيه؟

بس الذهب حلو مفيش كلام، يطري على الواحد في الحر، ولو دفتته  
ما بيحصلوش حاجة، ولا بيصدي ولا بيبوظ، وقيمته فيه على طول، مش  
زي الجواهر اللي لو اتكسرت قيمتها تنزل الأرض. والذهب ممكن تحطه في  
الشكل انت عايزه، ممكن يبقى أنسيال يرن في الإيد، أو خلخال يتعايقوا بيه  
الستات، أو يبقى كاس للشرب لزوم الوجاهة. والأهم بقى إنه لما بيسيح في  
النار معدنه مش بيتغير.

أما بنت أختك اللي حاولت تسرقك، ربنا يهديها ويصلح حالها،  
فهي شكلها اعتبرتك زي أبوها أو أمها، وحببت تكبش من فلوسك. وهم  
القرايب كدا، فيهم وفيهم. حكايتك فكرتني بالشاعر اللي قال:

أنا ورايا ابن أخت هياخد بتاري... شجاع ومبيخفش وهيطفي ناري

وبرضه بحكاية "الهجرس" اللي خاله قتل أبوه وهو لسه جنين في بطن  
أمه، فلما كبر طلب إنه ياخد بتار أبوه. بس هي بتفكرني أكثر بقى بأخت  
"توبة ابن مضرس" اللي خاله قتل إخواته الاتنين "طارق" و"مرداس"،  
فانتقم لأخواته وقتل خاله. وكان زعلان على إخواته أوي، وكتب فيهم  
أشعار كثيرة، وسموه بعد كدا "الخنوت"، يعني اللي ما يقدرش يتكلم من  
كثر العياط أو الغيظ. وقال:

أمي بكت بحرقة لما شافت دم أخوها على سيفي سايل

قتلها: طارق ومرداس عندي أغلى من دم كل القبائل

ويمكن تكون بنت أختك لقطت حاجة من علمك، فخذ بالك من  
تفكيرها أكثر من طول إيديها. وانت عارف إن الشاعر "زهير ابن أبو  
سلمى" خد كثير من علم خاله "بشامة ابن الغدير الغطفاني" في الشعر. في  
يوم، "بشامة" كان ببودع، فد "زهير" راحله وطلب منه فلوس.  
فد "بشامة" قاله: "ما كفاكش كل الشعر الجميل اللي علمتهولك؟"

فيه في حلب برضه ستات شعرا، ممكن بنت أختك تبقى واحدة منهم،  
والستات دول في الشعر أحسن من الرجالة أحيانا لأن ودنهم في الموسيقى أحسن.

يعني كان فيه راجل أعمى كان حافظ القرآن كله وكان بيْفهم في شوية مسائل دينية كدا . كان وهو صغير عنده واحدة بتشتغل خدامة وكانت برضه ساعات بتروح تعمل مكياج للبنات في الأفراح . الراجل دا كان بيقول شعر بس الأوزان عنده كان ضايعة تماما . فكان يقول الشعر قدام البنت دي فتقوله : " يا لهوي عليك ، الوزن واقع منك خالص " . فيخاصمها ويفتكر إن هي اللي غلطانة . فيصحى الصبح ويسأل ناس بتفهم في الشعر ، فيقولوله إنه هي كان عندها حق . فيعدله ويرجع يقوله قدامها فتقوله : " كدا تمام ، دلوقتي اتظبطت " .

كان فيه برضه بدوي اسمه " علوان " وبرضه كان ميح خالص في حكاية الأوزان دي ، وكانت مراته أشطر منه ، وودنها بتلقط الغلط بسرعة . ومرة مراته ألقت شعر على ابنها " رجب " اللي مات ، بس حست إنه مش موزون ، وفضلت تعدل فيه لغاية لما اتظبط من غير ما تغير من معنى الكلام أي حاجة .

وربنا قال : " يا أيها الذين آمنوا إن من أزواجكم وأولادكم عدوا لكم فاحذروهم وإن تعفوا وتصفحوا وتغفروا فإن الله غفور رحيم " .

أما " أبو بكر الشبلي " ، الله يرحمه ، كان راجل أخلاق ، أثنى بس إنه ما يكونش مشي في سكة الملحدين واللي بيؤمنوا بتناسخ الأرواح ، وفيه ناس قالولي إن هو صاحب الأبيات دي :

" عامر " المجنون قال إنه بيحب . . . وأنا سكت وكتمت جوابا حيي ويوم القيامة لو سألوا : فين . . . العاشقين ؟ هكون واقف لوحدي

لو كانت الأبيات دي بتاعته فعلا ، فهو كدا يبقى ظلم باقي الناس اللي يتحب ، ومحدث يعرف هو كان يقصد إنه بيحب ربنا ولا البني آدمين .

وأنا آسف أوي والله يا شيخنا على التأخير في الرد، بس الوقت كان ضيق ومعرفتش أكتبلك قبل كدا. وزى ما انت عارف، أنا مبقدرش أكتب غير لو الشخص اللي بيكتبلي معايا، فلو غاب، يبقى مفيش إملاء. لولا كدا مكنتش اتأخرت، لكن أنا حظي زي الحصى المرمي على الأرض في كل حنة.

وليك مني أعظم سلام وتحية، وسلامي لكل أهل حلب من كبيرها لصغيرها.

والحمد لله رب العالمين. الرسالة خلصت، وربنا نعم المولى ونعم النصير،<sup>٩</sup> وصلى الله على سيدنا محمد النبي وآله الطيبين الطاهرين وسلم.

## المحتويات

### الصفحة

(١) أصل الحكاية .....	٥
(٢) الهدف اللبي في نيتي .....	٧
(٣) هترجم لأنهي مستوى لغوي؟ .....	٩
(٤) منهجية الترجمة .....	١١
(٥) فهرس رسالة ابن القارح .....	١٥
(٦) فهرس رسالة الغفران .....	١٧
آخر كلام .....	١٩
<b>رسالة ابن القارح</b>	
(١) بداية الجواب .....	٢٣
(٢) عن الملحدّين واللبي ضلوا الطريق .....	٢٩
(٣) شكوى عامة من حال الدنيا .....	٤٥
(٤) حكايات عن النبي .....	٤٩
(٥) ابن القارح يعبّات نفسه على تقصيره وانشغاله بالدنيا .....	٥٥
(٦) تصليح صورته قدام " المعري " .....	٥٩
(٧) ييمجد في " المعري " ويشكره ثاني .....	٦٥



- (٨) بيشتكي من ضعفه وقلة حيلته ..... ٧١
- (٩) نهاية الجواب ..... ٧٣
- رسالة الغفران لأبو العلاء المعري ..... ٧٥
- (١) بيسلم على ابن القارح ..... ٧٧
- (٢) المعري بيتخيل ابن القارح في الجنة ..... ٨٩
- (٣) المعري بيتخيل إزاي ابن القارح دخل الجنة ..... ١٢٥
- (٤) عزومة الجنة ..... ١٣٥
- (٥) الحوريات ..... ١٤٣
- (٦) رحلة "ابن القارح" لأهل النار ..... ١٤٧
- (٧) الرجوع للجنة ..... ١٧١
- (٨) رد المعري على كل جزء في جواب ابن القارح ..... ١٧٩

## أصل الحكاية

اشتمعني الكتاب دأ؟ ومنين جت فكرة ترجمة كتاب من العربي لـ... "العربي"؟  
الكتاب دا اشتريته من حوالي ١٣ سنة. كان أملي كبير وقتها إني أحمل مقارنة ما بينه وبين دانتي وعمله الأدبي "الكوميديا الإلهية"، خاصة بعد ما سمعت عن احتمالية إنه يكون سرق (مش بس اقتبس) الفكرة من المعري (عرفت بعد كدا إن تقريبا خلق رينا كلهم عملوا مقارنة بين الاتنين دول وصرفت نظر).

المهم، هدف المقارنة كان واضح في دماغي وقتها، فقررت أقرأ الكتاب، إذ أفتح أول صفحة من الكتاب كدا، مفهمش حاجة. أقلب الصفحة، بوضه مفهمش حاجة. طيب سبني من المقدمة خالص، أدخل على البهاريز مباشرة، بس النتيجة مختلفتش كتير: مفهمتش حاجة والمثل كلني وركنت الكتاب. تمر شهرين، وأفتح الكتاب وأقول بثقة: "معلش، أنا كنت لسه صغيرة، بس دلوقتي أنا عرفت عن العربي كتير، وأكيد هفهم المرة دي"، وكالعادة، مفهمتش أي حاجة. وفضل السيناريو دا يتكرر كل كام سنة وفضلت النتيجة واحدة.

من مقدمة الكتاب.

ولدت ناريمان الشامي في مدينة القاهرة سنة ١٩٨٣. حصلت على ليسانس آداب إسباني وتحمل درجة الماجستير في تعليم اللغة العربية للأجانب من الجامعة الأمريكية بالقاهرة. ترجمت إلى العربية رواية "هكذا كانت الوحدة" للكاتب الإسباني خوان خوسيه مياس والتي نشرتها الهيئة العامة المصرية للكتاب سنة ٢٠٠٩، ورواية "شقيقة كاتيا" للكاتب الإسباني أندرس باربا والتي صدرت عن دارالنشر "لينوي" بسوريا في ٢٠٠٨ ورواية "نية حسنة" لنفس الكاتب وصدرت عن نفس الدار في ٢٠١١. صدرت لها رواية "سفر إعادة التكوين" - الكتب خان للنشر في ٢٠١٣. تعمل الكاتبة حالياً أستاذة للغة العربية بجامعة طوكيو للدراسات الأجنبية باليابان حيث تعيش مع زوجها وابنتها.